











God Tanquin, Masas, Japan, St. François Xavier... (par EARTOLI, Daniel)







# RELATION DES MISSIONS

DES PERES

# DE LA COMPAGNIE

DE IESVS,

DANS LES INDES

# ORIENTALES.

Où l'on verra l'estat present de la Religion Chrestienne, & plusieurs belles curiositez de ces Contrées.

> Dressée par vn Pere de la mesme Compagnie.



## A PARIS,

Chez IEAN HENAVLT, Libraire-Iuré, ruë Saint Iacques, à l'Ange-Gardien, & Saint Raphaël.

M. DC. LIX.

AVEC PRIVLEGE DY ROY.

Acc 84-469 automobile to the terminal on the transfer of the second or health of the stop all readers



A

# MONSIEVR

MONSIEVR

LE CHEVALIER

DE MESMES.



ONSIEVR,

Ie ne pouuois pas adresser cette Relation des nouueaux progrez de la Foy, dans les Indes Orientales, qui se sont faits par la

## EPISTRE.

vertu de l'Euangile, qu'à celuy, qui a arresté depuis peu le progrés des Infidelles sur les Mers du Leuant par la force de son courage. Ces zelés Missionnaires ont imprimé la candeur dans les ames des nouueaux Chrestiens par les eaux du Baptesme, & accrû les Annales de l'Eglise, en augmentant le nombre de ses Subiets: & vous auez fait rougir plus d'une fois les flots de l'Hellespont & de l'Egée du sang des Turcs, & rendu le Détroit des Dardanelles plus celebre par vos combats dans nos Histoires, qu'il ne l'estoit dans les Fables des Poëtes par le funeste naufrage du fameux Leandre. De sorte que ie puis dire Sans vous flater, que si le Fils de Dieu, qui a presché la Paix & declaré la Guerre en sa naissance, a mis la parole de la Predication dans la bouche de ces deuots Conquerans, pour negocier la Paix du nouueau Monde, entre son Pere & les hommes de bonne volonté; il vous a mis pareillement l'espée à la main, pour faire la guerre auantageu ement aux Ennemis de son Estat. Vous l'aués maniée auec autant d'addresse & de succez pour les interests de la Religion dans les plus sanglantes messées, que vos Ancestres ont porté celle de la Iu-

## EPISTRE.

stice dans les fonctions des plus éminentes charges pour le service de nos Roys, & pour le bien de leurs Peuples. Ils ont presque tousjours Presidé auec autant de suffisance, que d'integrité dans les plus Augustes Compagnies: ils ont imposé le Sceau par leur autorité aux volontez Souueraines, qu'ils auoient fortifiées par leur Conseil; ils ont dispensé les Thresors de l'Estat auec autant de Sainteté, que les Deniers du Temple, ils ont fait triompher & fleurir les Lys parmy les glaces du Septentrion dans les plus épineuses deliberations de l'Europe. Et vous, Monsievr, qui n'auez non plus beson de la Gloire d'autruy, pour vous rendre recommandable; que des empruns de la Fortune, pour parer vostre vertu; Vous auez paru dans les plus grands dangers auec un mesme visage, que dans les plus agreables diuertissements: vous n'auez pas receu moins d'esclat du sang des Infideles, dont vostre bras est encores teint, que de la Pourpre, qui est non seulement hereditaire, mais comme naturelle à ceux de vostre Illustre Maison: En vn mot, vous auez presque acheué en combatant la Gloire, que vos Peres vous auoient acquise en naissant, & rendu l'Auguste nom

ā iij

## EPISTRE!

de De Mesmes, autant glorieux sur la Mer, qu'il l'estoit desia sur la Terre, & si connu à tous, qu'il ne peut estre caché, qu'à ceux, qui n'ont pas la connoissance d'eux-mesmes. Comme i'en suis parfaitement instruit, Monsie va, i'ay voulu le publier par l'impression de cet Ouurage, auec les obligations particulieres, que i'ay à tous ceux de vostre Illustre Familles, en qualité de

## MONSIEVR,

Vostre tres-humble, tres-obeissant, & tres-obligé seruiteur, IEAN HENAVLT.



# TABLE

## DES CHAPITRES

#### DE CETTE RELATION.

DE CEITE RELATION.
Chap. 1. E Voyage aux Indes Orientales des Peres de la Compagnie de Iesus, en page 4
Chap. 2. Le depart des Vaisseaux de Lisbonne, &
les commencemens du Voyage. p.6
Chap. 3. La Flote en pleine Mer ne veut point se
jeparer. p. 14
Chap. 4. Les exercices de pieté, pratiquez pendant
le Voyage dans les Vaisseaux.  Chap. 5. Les accidens diuers de ce Voyage.  p. 18  p. 34
Chap. 5. Les accidens diuers de ce Voyage. p. 34
Chap. 6. L'arriuee de la Flotte a Goa. p. 69
Chap. 7. La reception faite aux Missionaires par les Peres de Goa, par le Public de la Ville,
par les Eglises des Indiens conuertis. p. 73
Chap. 8. Les raretez, & les autres curiositez natu-
relles remarquées en ce Voyage. p. 86
Chap. 9. L'autre Voyage par terre des Peres François
de la Compagnie de Iesus , allans aux Mis-
Jions des Indes. p. 98
Chap. 10. Les Missionaires rendus à Goa, & les cho-
Jes remarquables de cette ville-là. p. 110
Chap. II. De l'Estat de la Religion Chrestienne, &

tier de S. François Xauier, & des effets au
sa protection sur la Ville de Goa. p. 117
Chap. 13. Merueille du tres-sainct Sacrement, arriuée
l'an 1654. au Territoire de Salsete de l'Ar-
cheuesché de Goa, & les devotions publiques
qui ont esté faites pour l'honnorer. p. 127
Chap. 14. Les M sonaires partent de Goa, & leur
chemin iusques à Macao, ville frontiere de la
Chine. p. 139 Chap. 15. L'arriuée de nos Missionaires à Macao,
leur entrée dans la Chine, & l'estat où y est
la Religion Chrostienne
la Religion Chrestienne. p. 153 Chap. 16. Les nouuelles escrites de la Chine , l'an 1657.
le 16. d'Octobre, qui regardent les particula-
ritez de la Religion Chrestienne. p. 159
Chap. 17. Les Missionaires sont partagez dans les
lieux de leurs emplois.  Change Rand de la Politica Changiagne de la
Chap. 18. L'estat de la Religion Chrestienne dans les
Royaumes du Iapon, de la Cochinchine, de
l'Ethiopie, & du Tunquin. p. 184
Chap. 19. Les dernieres nouvelles de la Chine, & des
autres pays voisins, receues cette presente
année 1600 au mois de Mars. D. 198

Chap. 12. De la merueille de l'Orient, qui est le corps en-

Fin de la Table.

Chine, & de ce qu'il a appris à Goa. p. 204

p. 216

Chap. 20. Du Voyage du Pere François Clement à la

Chap. 21. Diuerses autres choses remarquables de la

mesme Relation.



#### RELATION DES MISSIONS de la Compagnie de I Es v s dans les Indes Orientales.

#### AVANT-PROPOS.

E sçay, qu'il y a plusseurs personnes de vertu, qui s'interessent par vn zele digne d'vn cœur Chrestien à l'auance-

ment de la Religion, dans ces vastes contrées des Indes Orientales, qui attendent auec ardeur d'en apprendre des nouuelles asseurées; dautant qu'il ya dessa quelques années, qu'on n'en n'a point sceu par aucune voye bien certaine, ny par aucun écrit, qui ait paru pub'iquement au iour.

l'ay dressé cette Relation pour contenter leur louable curiosité; elle est composée sur les lettres, & sur les memoires de plusieurs de nos Religieux François, que le zele des ames, lequel est le propre caractere, & le vray

A

Relation des Missions

esprit de nostre Compagnie, a porté à entreprendre les trauaux des Missions establies depuis long temps en ces contrées si spacieuses & si peuplées. Certainement elles semblent dans nos iours meures pour la moisson, puisqu'on y voit les grands Royaumes ouurir leurs portesentieres à la Foy, selon que les Relations precedentes le témoignent par les conuersions très-nombreuses des Insideles.

Aussi Dieu qui a tousiours en reserue dans ses thresors, des instrumens propres pour l'execution de ses desseins, a tiré des cinq Prouinces, que nostre Compagnie a dans la France, bon nombre d'excellens ouuriers, afin qu'ils employent les belles qualitez de vertu, & de science, dont il les a enrichis, à poursuiure les conquestes de son Euangile, commencées par sainet François Xauier, & par plusieurs autres de nos Religieux animez du même zele dans ce païs de l'Orient, & même à en entreprendre de nouuelles dans les Nations; que la diuine Prouidence n'a découuertes tout recemment ces années dernieres

que pour les éclairer des lumieres de la Foy, par la predication de ces hommes

Apostoliques.

Cette Relation est composée de trois parties. La premiere partie comprend les voyages de nos Missionaires iusqu'à Goa, l'vnsurmer, l'autresur terre. Le narré de tous les deux contient plusieurs choses remarquables, soit en matiere de pieté, ou bien en ce qui appartient aux choses naturelles, tant de la mer que de la terre, & de l'art de la marine. La seconde les accompagne iufqu'à Macao, ville frontiere de la Chine, ramassant aussi par leurs chemins, diuerses belles curiositez de l'vn & de l'autre genre. La derniere represente l'estate de la Religion dans la Chine, & dans les contrées adjacentes, ou circonuoisines, quisont la Cochinchine, le Tonquin, le Hainam, le lapon, & d'autres, & declare le departement des Missionaires dans les diuerles Missions de ces Royaumes.



mission broth

## CHAPITRE I.

Le voyage aux Indes Orientales des Peres de la Compagnie de Iesus, en l'année 1655.

A description de ce voyage sera l'entrée de cette Relation. Le Leéteur y trouuera d'autant plus de satisfaétion, qu'il la verra plus remplie de diuerses choses qui meritent d'estre sçeuës.

Nous mettrons en teste celles qui regardent la pieté: car elle sut merueilleuse en cette nauigation, de sorte que pour les exercices de deuotion, reglés par les heures de la iournée, & distribués selon la diuersité des iours de Festes, ou bien des iours ouuriers; les vaisseaux où ils se pratiquoient auec vne exactitude tresponctuelle, ils sembloient estre changez en autant d'Eglises slotrantes. Nous parlerons en suite de la vicissitude des fortunes de la mer differentes, bonnes & mauuises, à quoy les grandes courses qui se sont sur cet Element, sont d'ordinaire su jettes; comment on s'y est comporté, &

comme on en est sorti: car il y a des particularitez notables, qui peuuent seruir de direction à ceux qui entreprenent de semblables voyages, & qui d'ailleurs donnent de la satisfaction à ceux qui se contentent de les faire par la simple le-

Aure, ou bien de la seule pensée.

Apréson en estallera les raret ez de diucrses sortes, dont la mer est riche & seconde, en poissons, en oiseaux & en autres especes de natures. Ensin nous sinirons par le succez heureux du voyage, où l'on apprenda ce que ie n'auois point encore veu marqué dans d'autres Relations, & qui pourtant merite la connoissance des loüables curiositez, ie veux dire l'accueil admirable fait à nos Missionaires à la descente des nauires, auec des demonstrations extraordinaires de ioye & de deuotion.

Or comme la lecture des histoires contente l'esprit d'autant plus que leur verité a de meilleures guaranties celle-cy acét auantage, qui peut donner au Lecteur toute asseurance de sa sidelité, qu'elle est en tous ces cinq Chess mentionnez, tirée du journal, qu'vn des

A iij

Relation des Missions

Peres embarqué dans l'vn de ces vaisseaux a dressé, specifiant iour pour iour distinctement tout ce qui seur est arriué durant le cours du voyage, & que de Goa il a icy enuoyé écrit de sa propre main.

#### CHAPITRE II.

Le depart des Vaisseaux de Lisbonne, Et les commencements du voyage.

de quatre vaisseaux, vne Patache petit vaisseau, vn Galion grandvaisseau, l'Admiranté parfaitement beau & grand vaisseau, la Capitainesse qui les commandoit tous, & qui portoit le Vice-Roy nouueau nommé pour les Indes Les vaisseaux auoient encore leur nom de Baptéme, comme l'on parle: Le premier s'appelloit saince Terese, le second saince François, le troissémele Saince Sacrement, dont la Gazette Françoise a parlé honorablement comme ille meritoit, ayant à son retour des Indes, combatu luy seul contre quatre vaisseaux

aux Indes Orientales.

Dunquerquois & Hollandois, aussi grands que luy, vn iour entier, & s'estant fait chemin libre au trauers d'eux malgré tous leurs essorts: le quatriéme le Iesus.

Ils auoient aussi tous à la Pouppe l'imagedes choses dont ils portoient les noms. Outre cessaincts noms ils auoient aussi la plus part vn nom d'aduenture, pris de quelque euenement, triste ou ridicule qui leur estoit arriué. Ainsi entre autres le Gallion nommé saince François s'appelloit E! Disterado, c'est à dire le banny, à cause d'vn facheux accident suruenû; c'est que pendant qu'on trauailloit à attacher la Statuë de ce Sainct, elle tomba du haut de la Poupe en bas, & en tombant, écrasa vn homme. Or comme porte la coustume en Portugal d'enuoyer aux Indes tous les Criminels pour bannis, & en vn exil, ils appellerent ce vaisseau El Disterado, le banni, parce qu'alors il y alloit aprés cette mort.

Nos Missionaires estoient au nombre de vinct einq, onze François, onze Portugais, & trois Italiens. Aprés auoir en l'honneur de faire la reuerence à leurs Mosestez Portugaises, aux Princes, & Relation des Missions

à la Princesse, laquelle témoigna vne assection particuliere à nos François.

Comme l'on l'appareilloit, voila que s'eleue vne tempeste causée subitement par vn vent contraire, qui fut stily d'vne grande pluye qui troubla le temps tout d'vn coup si horriblement que l'on ne croyoit pas pouuoir démarer du port deuant Pasques; cette apprehension iettoit vn peu d'ennuy parmy les allegresses que ces braues cœurs goustoient aux approches d'vn voyage, qu'ils auoient si ardemment poursuiuy, & dans lequel ils brûloient d'enuie, dese voir déia bien auancez. Ce qui redoubloit leur peine; c'estoit la maxime vsitée parmy les Portugais d'augurer mal de tous les voyages des Indes, s'ils ne se commencent au mois de Mars, qui cependant tendoit à la fin.

Mais Dieu releua leurs esprits par vn changement subit du temps; car la pluye cessa en vn moment, & le vent contre toute attente, deuint aussi bon qu'on le pouuoit souhaitter. Voilà donc nos passagers à qui le vingt-vniéme de Mars on donne pour reueille-matin auis de se tenir tous prests. Comme ils ne tenoient plus à la terre, & que leur cœur estoit déia sur la mer, ils se trouuent au rendezvous, que le Pere Procureur des Indes leur auoit assigné. De là portant le Crucifix pendu au col, comme disans omnia mea mecum porto, ie porte auec moy tous mes biens, ils gagnerent le port en dili-

gence.

Deux barques les attendoient à la riue, qui les conduisirent aux vaisseaux où ilsestoient destinez. La distribution fut telle: le Gallion eut pour son partage quatorze de nos Missionaires, sept François, tous Prestres, quatre Portugais fort ieunes, & les trois Italiens aussi Prestres, dont l'vn nommé le Pere Spinola estoit le Superieur de cette saincte Escadre, dépendant neantmoins du Pere Freira Portugais qui estoit le Superieur de toute la Mission, homme de haute vertu, de rare prudence, & grande experience, qui auoit fait le voyage des Indes déia d'autres fois, outre celafort habile dans les sciences, & excellent Predicateur.

Son département fut dans la Capi-

canesse, où estoit le Vice-Roy. Il auoit aucc luy sept Portugais, & quatre François, tous Prestres, entre lesquels estoient trois freres natifs de Compiegne, nommez Motel, qui tous par vne conformité assez rare de vocation du Ciel sont entrez en la Compagnie, tous trois par vne Conspiration encore plus rare d'vne seconde vocation à la Compagnie, se sont deuouez à la Mission de la Chine. Le Pere Superieur les voulut auoir tous trois dans son vaisseau, estant rauy de la vertu de cestrois cœurs, qui ne paroissoient qu'vn seul par cette vnité de vocation redoublée, & les auoit luy méme demandés au Pere Prouincial, qui auoit fait tout ce partage.

Le Lundy matin vingt-deuxième de Mars, le Vice-Roy se rendit à la Flotte, & entra dans sa Capitanesse. La premiere volée de canon ayant esté tirée pour signal du depart, on croyoit que les deux autres deuoient suiure, & qu'en suitte l'on deuoit mettre à la voile: Mais il ne s'y rendit, que pour y receuoir le Roy qui y vint sur les sept heures, accompagné de l'élite de sa Noblesse, & de force

Trompetes. Il fit grace de ce iour là pour acheuer l'appareil, & du suivant, si le vent ne se faisoit pas meilleur: mais il se sit dés l'apresdinée bon iusques au dernier souhait.

Alors donc la seconde volée de canon sut tirée, & la troisième le lendemain à six heures du matin. A même temps les voiles se voyent déployez, & auant dix heures les ancres ayant esté, non leuées, mais pour plus grande magniscence, coupées, voila les Vaisseaux au vent, & qui commence à cin gler. La Patache toutes sois demeura pour garder la ceremonie de Portugal, qui est que le General de la Flotte doit attendre en pleine mer les ordres du Roy; & comme s'il ne sçauoit pas sa route, l'apprendre des settres, qu'elle luy apporte, lors qu'il est déia en course.

Or de ces lettres il y en a de deux sortes; les vnes portent sur le repliy pour estre ouvertes presentement; les autres disent en termes exprés pour estre ouvertes seulement après le Cap de Bonne Esperance, & il ne se trouve maintenant aucun Vice-Roy si mal aduisé, qui les ose

ouurir auparauant, parce qu'il est arriué à plusieurs qu'estant obligez de rebrousser chemin auant le Cap doublé, de rendre tout ouuerts les ordres, qu'ils ne de-uoient lire qu'aprés, & par consequent d'estre eux-mêmes à leur confusion les accusateurs, & les témoins de leur desobeissance.

Mais desia toute l'artillerie des vaisseaux rendoit les deuoirs aux saincts lieux, qui sont le long du port de Lisbonne, & faisoit l'honneur, selon la coustume, aux forteresses par les salues des canonades reiterées. Le port estant aussi passé, le Pilote de la barre, comme on parle, se retire, & le Pilote de châque bord prend son gouvernail: car les Pilotes en ce païs ne vont que de barre en barre, aussi bien à Lisbone, qu'à Goa, & ce sont d'autres Pilotes qui conduisent tant pour l'entrée, que pour la sortie du port.

Cependant nos Missionaires disant tous le grand à Dieu, nos François à la France, les Italiens à l'Italie, les Portugais au Portugal, & tous vniuersellement à l'Europe, estoient dans vne si grande allegresse, & dans des transports si visibles, que cela seul eust esté capable d'échauster vn cœur froid. On leur voyoit même tomber les larmes des yeux par vn excez de ioye qu'ils auoient peine de contenir, en se voyant sur vn nouuel element, qui bien que de soy peu aimable, comme n'estant pas naturel, les deuoit conduire au terme de leurs sain &s desirs. Comme ils furent sortis du port, ils ne sesentoient pas marcher, tant ils alloient gayement, & vistement: mais à peine deux heures furent-elles passées, que beaucoup commencerent à sentir, du fond du cœur les effects du voyage & de l'air de la mer.

En vn motil y eut bien de la bile répanduë: mais on n'en vint pas iusqu'au
sang, ainsi que souuent il arriue dans ces
rencontres. En vn iour ou deux la furie
du mal se passa, & puis c'estoit à se deffendre à l'enuy, comme gens de cœur,
à qui auroit esté le plus, ou le moins batu, & abbattu. Il y eust de nos François
qui n'eurent durant cette tempeste bilieuse, qu'à rire, ou plustost à soulager
les autres, à cause de la bonne habitude

qu'ils s'estoient faite dans le traje & de France à Lisbonne. Enfin ce tribut ayant esté payé à la mer, tous s'en trouuerent plus gays, & plus dispos.

## CHAPITRE III.

La Flotte en pleine mer ne veut point se separer

A ioye de tous redoubla à la veuë de la Patache chargée des ordresnecessaires au voyage. Sa diligence à ioindre le reste de la Flotte fut louée & admirée, sur tout lorsque l'accident suruenû, qui auroit dû la retarder, fut diuulgué; car les ordres qui luy auoient esté consignez au port, estant par hazard tombez dans la mer, il luy fallut en attendr d'autres: mais tous creurent que cette fortune estoit vn traidt de faueur, menagé par la diuine Prouidence. En effer elle disposa par ce peu de retardement qui estoit interuenu, que le premier iour de la nauigation fust la feste de l'Annonciation de la tres-sain & Vierge, laquelle autres fois sous les Empereurs

Chrestiens estoit honorée, & inuoquée sur le port de Constantinople, sous le nom De odigitria, qui signifie la conductrice par les chemins. ainsi le voyage se commençant sous de si heureux auspices, tous auoient sujet de bien augurerde son progrés, & d'esperer encore mieux de son yssuë par la rencontre d'vn iour si fortuné. Car les bonnes esperances conceuës auec vn solide fondement à l'entrée des grandes entreprises, haussent merueilleusement les courages. Ils peu-uent tout par la vigueur qu'elles leur inspirent, parce qu'il leur semble le pou-uoir Possunt, quia posse videntur.

En effet la Flotte commença dés ce iour à marcher tout de bon à pleines voiles & dés lors on s'apperceut de la foiblesse du Galion, à suiure les autres vaisseaux. On le tenoit trop chargé, & d'ailleurs il n'estoit pas bon voilier, quoy que du reste il fust excellent, particulierement pour ne pas prendre eau, comme estant fabriqué de bois des Indes, qui a cette proprieté remarquable, & tres-importante pour la nauigation: car le bois des Indes est plus serré, & moins poreux: ce

qui fait que l'eau ne peut pas s'y infinuer si facilement, & n'y trouue pas tant d'entrée: Quoy qu'il en soit, beaucoup de. passagers impatiens de la pesanteur de ce vaisseau, pressoient auec instance, qu'on l'abandonnast de bonne heure; puisque dans les plus fortes mers, il faudroit necessairement qu'il demeurast en arriere; ils souhaitoient méme quelque tempeste qui les enleuast bien loing de sa veuë, & donnast occasion & pretexte de le laisser seul prendre vne autre route, comme par necessité. Les Mariniers secondoient ardemment ce dessein, sur tout autant de fois qu'il leur falloit abbatre les voiles pour l'attédre. Mais le Vice-Royne peut iamais estre persuadé d'auancer chemin, au hazard de quitter ce vaisseau, au contraire, il donna vn commandement tresrigoureux de l'attendre autant de fois qu'il s'eloigneroit. Le Pilote l'executa ponctuellement: mais auec addresse; car pour couurir sa foiblesse, il alloit de nuit en biaisant, à droite & à gauche pour perdre temps, & pour empescher les cris des plus impatiens.

Le Pere Superieur auoit remonstré au

Vice-

Vice-Roy, qui faisoit grand cas de ses auis, à cause de sa prudence, & de son experience en ces voyages, combien il importoit de ne pasabandonner ce vaisseau, ny ceux qui estoient dedans. Il auoit égard principalement à nos Religieux, qui estoient confiez à sa conduite. De vray si la necessité le tenoit separé d'eux, de nauire, il luy estoit trop rude, & même intolerable de les perdre tout à fair de l'œil; telle estoit la tendresse de cœur qu'il auoit pour cu'x: Mais quoy que pour ce vaisseau, le voyage ayt esté plus long d'vn mois, ou de cinq semaines, il parut toutefois en diuerses rencontressur le chemin, ce que vallut d'auoir suiuy l'ordre donné par le Vice-Roy, & le conseil suggeré par le Pere Superieur. Enfin le Pilote qui estoit le plus interessé en ce retardement, le toleroit auec patience, parce que selon qu'il l'auoit découuert à vn des nostres, deuant que de demarer du port, vne personne de rare vertu, & en qui il auoit toute consiance, l'auoit asseuré que tous ces quatre vaisseaux surgiroient tous ensemble heureusement au port de Goa.

### CHAPITRE IV.

Les exercices de pieté, pratiquez pendans le voyage dans les vaisseaux.

'On dit d'ordinaire: Qui ne scait pas prier, aille sur mer, Qui nescit orare, adeat mare; parce que les perils qui sont aussi frequents sur cét Element, qu'il est inconstant & perfide, apprennent, ou plustost obligent à prier ceux, qui sur terre, où ils se tiennent asseurez, le negligent, & ce qui est pis, quelques fois s'en mocquent. Mais en cette nauigation que nous décriuons, la priere y estoit si bien venuë, qu'il n'y auoitrien de contrainct, ny de forcé. L'exercice en estoit si familier, & si exactement obserué, qu'il sembloit que châque vaisseaufust vne Eglise domestique: Domestica Ecclesia, selon la parole de sain& Paul, 20m16. & que les Passagers se fussent embarquez, comme pour faire d'vn voyage, vne procession continuelle, où les louanpsal. , ges de Dieu retentissoient à toutes les heures du jour, sur ce grand theatre des

eaux, où il paroist si admirable: Mirabilis in altis Dominus.

Et de vray sil' Eglise est vne maison de priere, ainti que l'a desinit nostre Seigneur: Domas mea, domus orationis vocabitur, les prieres se faisoient aux heures reglées dans ces vaisseaux, matin & soir, publiquement: Mais pour ne m'arrester point à ce qui est commun en de tels voyages, voicy ce qui n'est pas vulgaire. Les Messes y estoient continuées depuis la pointe du iour iusqu'à haute heure, bien auant dans la chaleur, ordinairement à deux Autels pour les bonnes Festes & les Dimanches, ou bien quand il y auoit risque de la perdre à attendre trop, iusqu'à trois.

Qui le croyroit, que dans vn voyage des Indes, lequel a duré cinq mois, il y ayr eu des Prestres qui n'ayent manqué que deux ou trois fois de dire la Messe iusqu'à Goa, cinglant sans cesse sur les vastes plaines de huict, ou dix mille lieuës de mer, où les vents, les tempestes, les pluyes, & toutes les autres iniures de l'air dominent si furieusement, & font des changemens de saisons si soudains,

& presque plus frequents que l'on ne compte d'heures en vn iour, & cependant il y a eu de nos Peres qui depuis Pasques, où ils se virent en haute mer iusqu'à Goa, c'est à dire cinq mois de voyage, qui ne trouuent que trois iours ausquels la rigueur extréme du mauuais temps leur aytraui l'honneur, & le bonheur d'approcher du sainct Autel.

Dieu les a fauorisez d'vne prouidence tres - particuliere en ce que dans cette grande assiduité, & dans ce grand nombre de Messes, iamais d'accidens fâcheux ne leur soient arriuez parmy tat de tourmentes dont les vaisseaux ont esté souuent agitez, & rudement battus.

La mer, le vent, la pluye, auec tant de bourasques si subites, sembloient conspirer auec eux, ou plustost obeir à leur de-uotion, en ce qu'elles ne s'éleuoient, que tantost au commencement de la Messe, tantost à la fin, qu'il n'y auoit plus de risque, le plus souuent dans l'entre-deux des Messes, ou bien lors qu'elles estoient toutes finies, ou qu'elles ne continuoient plus. En vn mot, il sembloit que le Fils de Dieu renouuelloit son ancien miracle,

& horsmis seulement qu'il ne paroissoit pas visible Imperabat ventis & mari, estant present actuellement au tres auguste Sacrement. Il commandoit à la mer & aux vents, d'où le calme suivoit, sinon tousiours grand, au moins tel que le divin Sacrifice se pouvoit celebrer auec decence, & sans peril du costé de cette action si adorable, & auecrepos & asseurance de la part de son Ministre.

Et certainement ceux qui estoiet dans les vaisseaux, voyant la fermeté du temps si reglée aux heures de la presence réelle de Nostre Seigneur sur les Autels, parmy les fougues de son inconstance, qui fai-soit de si beaux ieux aux autres parties du iour, disoient tous auec estonnement; Qualis est hic, quia venti & mare obediunt ei? Quel est celuy-cy, parce que les

vents, & la mer luy obeissent?

Or ce qui enstamoit la pieté des Prestres à ne point se priuer aucun iour de ce tres-salutaire Mystere, c'est que toutes leurs Messes estoient priuilegiées, & pour eux, & pour les Trespassez. Adioustez qu'estant tous si proches de la mort, à vne, ou deux planches prés, toutes leurs Communions leur estoient vn sain&t Viatique iournalier, & aternitatis auxilium, selon la parole de l'Eglise, & comme le peage pour le passage dans l'Eternité. Heureuse, pour conclure ce traid si remarquable, la necessité qui les obligeoit de dire châque Messe, sinon comme la premiere, au moins comme la derniere! Helas pourquoy ne pas faire le méme sur terre, puisque tant de morts soudaines nous peuuent de l'Autel emporter dans le tombeau: Et ce qui est plus formidable, de la presence de l'Agneau de Dieu, qui oste les pechez, nous presenter deuant le Tribunal du méme Dieu, Iuge & Vengeur eternel des crimes,

Mais rentrons dans le cours des deuotions de nos vaisseaux. Aprésdisné le Chapelet s'y recitoit hautement à deux chœurs, & cét exercice tenoit lieu des Vespres. Les Peres Dominiquains qui estoient du nombre des passagers, auoient la conduite de cette bonne œuure, comme le Rosaire est vne des belles productions de leur sainct Ordre; Pour nos Religieux, qui tous se tiennent

des plus zelez seruiteurs & enfans de la tres-saincte Vierge, ils y estoient aussi des plus assidus, & y attiroient les autres par leur exemple. Quant à la priere du soir, la direction en estoit commise à nos Peres par vn droi& acquis depuis le voyage du premier Missionaire qu'a eu nostre Compagnie aux Indes, & qui en est aussi l'Apostre le grand sain& François Xauier. On disoit donc les Litanies des Saincts qui estoient suivies d'vn sermon, d'autres fois d'vn Catechisme, ou bien d'vne sorte d'entretien sur la vie du Sain& du iour, ou de deux, ou trois Saincts, dont les Festes auoient precedé. Cette tasche estoit commiseà vn Pere Portugais, qui la fournissoit excellemment? Qui ne dira que tous les iours d'vn tel voyage, ne fussent vne celebrité de Festes continuelles? Certainement tous en auoient les fonctions. Il n'y auoit que le plus, ou le moins de splendeur, & d'appareil exterieur qu'on leur donnoit auec les Communions & les Confessions, qui les distinguassent des Festes effectives:

Mais comment estoient - elles cele-B iiii brées? La mer en ces devotions sembloit estre rivale de la terre, & la solemnité de ces grands sours ne cedoit rien dans ces vaisseaux, à celles qui se pratiquent dans les Eglises. Il les faut parcourir pour voir cette verité dans son plein iour.

La premiere Feste qui écheut dans le Voyage, sur celle de Pasque. Elle se sit auectoute la celebrité qu'elle pouvoit avoir sur terre le Pere Superieur de la Mission avoit diverses pieces de devotion venuës de Rome, & d'autres raretés pour l'ornement d'vne Chapelle. Tout cela sut estalé sur les Autels dressés pompeusement. Le Vice-Roy y contribua des parements d'Eglise, bien plus magnisiques que les nostres, quoy qu'ils ne sussent pas méprisables; outre cela son argenterie tres-riche, avec quantité de luminaires, & de vases de senteur à la mode de Portugal.

Ce Seigneur fort pieux sit vne autre chose depuis preserable à tout cela, saisant faire Pasque deux sois à tout le gros du hauire. Cela s'executa en ce que les premieres Semaines du voyage estant passées, il enuoya demander tous les

noms de ceux qui s'estoient confessez. Or comme l'on n'auoit obligé aucun à cét ordre auparauant, tous venoient en suite, après qu'il sut proclamé, pour auoir les témoignages de leur Confession: les Confesseurs qui ne les pouuoient pas reconnoistre, seur répondoient qu'ils auoient employé aux Confessions leurs oreilles, & non pas leurs yeux. Sur cela vint le commandement du Vice-Roy de ne donner le ration, qui est le pain, ou le viure du Roy, à personne qui n'eust son billet de Confession. Ce fut alors vne belle presse, la Confession donnant à manger. Pasque par ce moyen alla iusqu'à l'Ascension.

Mais que ne fit-on pas en ce iour-là, qui est la grande deuotion de Portugal? Les Messes, les Confessions, & les Communions durerent toute la matinée. Le sermon commença sur les dix heures & demie, & dura vne heure entiere. Le Pere Superieur s'en acquitta dignement par vn discours solide, animé d'vn beau seu & d'vn zele tres ardent. Suiuit aprés l'Oraison iusqu'à Midy & demy, selon la coustume de Portugal, qui est de faire ce

iour là priere à midy, pour accompagner Nostre Seigneur au Ciel, où il monta alors, selon qu'ils se le persuadent. Le Colloque fut tout en flammes par la bouche des canons. Il estoit plus d'vne heure que personne n'auoit disné dans le vaisseau, la deuotion ayant occupé les esprits tout le matin, & au delà: Ne fait - il pas beau nauiger de la sorte, quelle rareté que d'entretenir le feu de la deuotion

Sur les eaux pendant tant d'heures!

La Pentecoste eut sa solemnité toute entiere: Mais la Feste du sainct Sacrement fut celebrée à la Pouppe, auec vne pompe extraordinaire. La premiere Messe que dit ce iour là vn de nos Missionaires qui auoit pris les sainctes Ordres deuant que de s'embarquer, redoubla la deuotion. Le Vice-Roy voulut communier de la main du nouueau Prestre, & assista à la Predication d'vn de nos Peres nommé Emanuel Suares, qui rauit par son eloquence toute l'audience, & acquit beaucoup d'honneur à la Compagnie, en presence d'vn grand nombre d'autres Religieux qui l'ouirent. Peut estre iusqu'alors, la mer n'auoit esté iamais sanctisiée, des primices d'vne nouuelle Prestrise, au moins l'histoire ne raconte point d'autres exemples d'aucun Prestre, qui ayt dit sur mer sa premiere Messe dans vn vaisseau.

Pour continuer le narré de ces Festes, celle de sainct Antoine de Pade, qui est le treizième de Iuin, surpassa de bienloin les magnificences des autres qui l'auoient precedé. Il ne faut pas s'en estonner, puisque c'est le Patron de Lisbonne, & l'vn des principaux Prote-Acurs du Portugal. On commença plusieurs iours auparauant à dresser vne Chappelle au milieu du nauire, à quoy on trauailloit iour & nuit. La Feste venuë, tout ce qui se peut faire pour la solemnité d'vn grand Sainct, y fut obserué, auec toute la splendeur imaginable, sans le deduire en particulier. Les Peres Dominiquains auoient pris cette Feste à leur soin. Leur Superieur y prescha excellemment en presence du Vice-Roy, dont il estoit parent. Ce Seigneur tressplendide, qui au iour de la premiere Messe, dont nous venons de parler, auoit fait ressentir les douceurs, & les

magnificences de la terre, au disné où nous auions inuité les principaux du nauire, les sit encore gouster aux vns & aux autres en cette Feste. Apresdisné la Tragedie, & le diuertissement suiuit la deuotion du matin. Le Vice-Roy y auoit par honneur conuié les nostres: mais le Pere Superieur s'excusa ciuilement sur la coustume de nos Peres, gardée en telle occasion, qui est de s'abstenir des representations publiques, si elles ne sont tout

à fair pieuses.

Sainct Iean Baptiste n'eut iamais pour la celebrité de sa naissance de plus beaux feux. Quatre nauires brûloient pour luy dés le soir auec mille artifices de poudre à canon, qui surmontant les tenebres de la nuit, faisoient sur la mer vn iour éclatant comme en plein midy. L'on peut penser l'estonnement des poissons, & comme à grandes bandes ils accouroient du sond des eaux à ces lumieres inopinées: Le iour de sainct Pierre & sainct Paul soussirient vn peu du mauuais temps: la solemnité n'ayant pû se faire publiquement, auec la magnificence deuë à ces grands Princes de l'Eglise, &

comme tous le desiroient: Mais pour les nostres la Feste fur double, premiement à cause que dans nostre Compagnie qui professe la vie Apostolique, & l'imitation de ces saincts Apostres, elle est en singuliere veneration. En second lieu pour la renouarion des vœux, qui se publia hautement chez nous, comme vn iour tres-solennel, les iours des deuotions preliminaires gardez exactement. Elle se fit donc à porte close dans le Camerauté, qui estoit nostre Chapelle particuliere. Le Superieur qui ne demandoit qu'à bien faire, voulut aussi que tout le reste y sust obserué, comme dans nos autres Maisons.

Au quatriéme de Iuillet, qui est la Feste de saince Elizabeth Reyne de Portugal, pour l'honneur, & pour l'interest de la Nation, il y eut vn renouuellement de deuotion: rien n'y sut obmis, & tout y parut Royal. C'est chose admirable de voir comme les Portugais se portent à ces solemnitez. Ie crains que le Lecteur ne se lasse plustost d'en entendre tant, que les Portugais de les faire; car ils y sont infatigables, & la derniere semble

tousiours auoir esté vnique.

Depuis le iour desain & Ignace nostre glorieux Fondateur, iusqu'à ce que la Flotte débarqua au port de Goa, ce ne sut presque qu'vne Feste continuelle. Il n'y en eut aucune, à Pasques prés, qui eust vn nombre approchant de Confessions, & de Communions. Aprés que le Martyrologe qui seruoit pour annoncer la Feste, eust intimé celle du Sain & elle se sit entendre par vn tonnerre éclatant, de coups multipliez d'artillerie.

Dés le soir tous les vaisseaux parurent chargez de slammes, & l'air n'eut pas besoin d'Estoilles, ny de Lune toute la nuit pour auoir de la lumiere. Le lendemain la Chapelle ayant esté bastie au milieu du Tillac, la Messe y sut chantée auec vne pompe extraordinaire. Le Vice-Roy y communia, & entendit la predication du même Pere Suarez. Nos François asseurerent qu'ils n'auoient iamais entendu si bien précher de sainct Ignace. La Mousqueterie, & les plus grosses pieces de l'Artillerie suppleant au dessaut des Cloches,

firent vn tres-agreable carillon. Le Pere Superieur pretendoit d'inuiter par honneur au repas les principaux du nauire, & auoit donné les ordres necessaires pour les preparatifs: Mais le Vice-Roy le preuint par sa magnificence pleine de courtoisse: car il enuoya de sa maison vn disné entier, auec mille excuses tresobligeantes, sur ce que le iour estoit de poisson, qui par consequent, l'auoit empesché de mieux faire.

La Feste de sain & Dominique ne ceda en rien à celle de sain & Ignace. Il suffit de dire que tout y fut égal pour éuiter l'ennuy d'vne plus longue Relation. Nostre-Dame des Neiges, qui croyroit aprés tant de Festes si voisines, & le lendemain iour de la Transfiguration, qui est la grande indulgence de Portugal, furent encore deux solemnitez semblables aux precedentes pour les nombreuses Communions.

Enfin l'Assomption de la tres saince Vierge ferma, ou pour mieux dire couronna toutes ces Festes par toutes les deuotions, & par toutes les autres splendeurs exterieures qui furent reiterées

pour honorer son triomphe au Ciel.

Portugais soient tres-enclins à celebrer les solemnitez des Festes, les Religieux pourtant y contribuerent aussi beaucoup de leur part: car les iours qui les precedoient, ils en recommandoient la celebrité, l'vn dans le Catechisme, l'autre dans vn entretien qui se faisoit à dessein aux Mariniers, & aux Soldats. Et alors on leur saisoit prendre de bonnes resolutions des se bien mettre auec Dieu, lequel par sa bonté versoit ses benedictions sur ces sai nêtes pratiques auec telle abondance, qu'ele fruit en estoit visible, & le changeme int des mœurs notables.

La choi e se sit auec plus d'estude pour la Feste de l'Assomption; car il n'y eut coin si recu sé du nauire, qui ne sust visité pour sig inisier à tous en particulier, qu'il falloit terminer ce voyage par une bonne Consession, & laisser les ordures du nauire, dans la mer: L'on vit le succez de ce s'exhortations familieres des la veille de la Feste, & le lendemain la de-uotion continua bien auant dans le iour. Les nosstres sortans dés l'aube du iour

pour

aux Indes Orientales?

pour leurs deuotions ordinaires qu'ils vouloient faire deuant que le Monde vinst, ils en trouuerent desia si grand nombre, qui les attendoient à la porte, que quittant; comme l'on dit, Dieu pour Dieu, ils furent obigez de seruir ce bon peuple aux Confessions, & aux autres

exercices de pieté.

Pour clorre ce Chapitre, il se peut dire, considerant tous ces exercices de deuotion si assidus & si seruens, que leur voyage n'a esté qu'vne Mission continuelle de grand trauail à nos Missionaires: mais aussi de tres-grande vtilité. Iamais il ne se sit en mer vne plus riche pesche, que de tirer du vice tant d'ames, & de les gagner à Dieu; Ex hoc iam homines capiens, pouvoit dire N. S. à châcun de ces braves Pescheurs des hommes Cette premiere pesche faite en allant est vn presage, & vn essay de celle que vous ferez quand vous pescherez tout de bon dans ces vastes & spacieuses Regions de l'Orient où ie vous envoie.

portrained language of state

Luc. 53

## CHAPITRE V.

Les accidens diuers de ce voyage.

TL semble qu'vn voyage où Dieu est si bien seruy, & où la pieté, comme le Pilote, tient le Gouvernail des cœurs, aussi bien que des vaisseaux, ne doit se promettre qu'vn temps propice, vn air serain, vne mer calme, tous les vents fauorables comme à sa solde : en vn mot yn cours de continuelles prosperitez: Ouy, mais dans la Nacelle où est le Sain& des Sain&s, le Fils de Dieu qui rend plus d'honneur & plus de seruice à son Pere, même en dormant, que l'homme le plus éminent en saincteté ne peut faire en veillant, la tempeste se fait si bien sentir, qu'elle se voit toute conuerte de flots, & en perileminent de fa perte.

Mais Nostre Seigneur, dit sainct Iean Chrysostome, veut que ses plus zelez seruiteurs passent par l'épreuue des afflictions communes, & comme vn bon maistre d'escrime, il les exerce afin qu'ils

ne s'abbatent point de crainte dans les disgraces que le monde leur suscite, ny ne s'eleuent de vanité parmy les honneurs, dont il les gratifie: Vt palestra Magister optimus ad vtrumque discipulos exercebat, ne aut terrore vincerentur aut honoribus efferrentur. La pensée de sain& Hilaire sur ce sujet, doit estre considerée fort soigneusement par les hommes Apostoliques, que Dieu destine au Ministere si sublime desames, quelque seruice qu'ils luy rendent, & quelque haut talent qu'ils ayent, toute leur confiance dans toutes les trauerses, soit tousiours attachée à son secours, & qu'ils viuent en la dépendence totale de sa grace. A Deo in periculi metu & vexatione speremus, at que viinam vel spes sera confidat sese periculum posse euadere Christiintranos servitute Math.

vigilante. Et qu'aprés tout leur esperance & leur confiance de sortir des dangers, soit en Iesus-Christ, si l'on se tient

vigilans & fidels en son service.

Mais pour nous remettre aprés cette digression, dans nostre route, Dieu a fourni à nos Missionaires parmy tous les honneurs qu'ils luy ont rendu pendant

cette nauigation si sainte & sireligieuse, des occasions frequentes & pressantes de s'aguerir contre les frayeurs des maux, de ne point s'enfler des faueurs, dont il les honoroit, afin d'establir, & comme d'encrer toute leur esperance en sa pure misericorde.

Nous rapporterons auec plus de briéueté qu'il se pourra les euenemens diuers de ce voyage, où les prosperes, & les fauorables se trouuent mélés auec les sinistres, & les fâcheux: Mais la diuine Prouidence par son œil tousiours ouuert & veillant a conduit toutes ces contrarietez au plus grand bien de ses seruiteurs.

Au commencement de la nauigation, les vaisseux eurent le vent si à gré, qu'en cinq iours, ils se virent à la hauteur de l'Ise de Madere, quoy que souuent le passage de Lisbone à cette Isle soit d'vn mois, & d'ordinaire de quinze iours entiers: Mais voicy vne seconde prosperité; ce trajet ne se passe presque point sans faire l'essay de quelque grande tempeste; Témoins les cinq nauires Anglois qui estoient partis de ce Port, vn peu deuant

la Flote: car ils furent si furieusement assaillis & battus de l'orage dans ce méme passage, qu'vn d'entre eux fut contrainct de relacher à Lisbone, pour se raiuster, & les quatre autres ont esté dissipez aux quatre parties du monde, sans qu'on air eu nouuelle de ce qu'ils sont deuenus.

Nos vaisseaux par vn bon heur particulier eurent la mer si propice, que le vent continuant tousiours d'estre bon, & à souhait, ils gagnerent, non sans admiration de tous, dés le septiéme d'Auril le Cap-verd, que le Pilote leur fit doubler, passant entre la coste & les Isles. Il y auoit plusieurs petits vaisseaux qui alloient au Bresil, & qui s'estoient ioincts à la Flore, afin qu'elle leur seruist de conuoy, iusqu'à ce qu'ils eussent passé ces lieux quisont les plus dangereux, à cause que les ennemis y tendent des embuscades, à la faucur de ces Isles. Ils se separerent icy pour prendre leur plus droite route, quelques bateaux de ces diuerses Isles vinrent aussi aborder la Flotte, pour sçauoir si le Vice-Roy ne vouloit rien de leur seruice, ou enuoyer des lettres à

Lisbonne. L'on fait assez souvent remplir en ces lieux les pipes d'eaux, qui ont esté deja vuidées, & on y renouvelle les oranges auec les autres rafraichissemens: Mais ce premier trajet ayant esté expedié si lestement, on ne sit autre chose, que de les charger de lettres pour Lisbonne, & de se décharger de celles

qu'on auoit apportées.

Mais peu aprés ils furent attaquez de trois grands ennemis. Le premier fut la Coste de la Guinée, climatle plus pestilent, qui soit en toute la nature. Le Pere Superieur qui en vn autre voyage des Indes auoit veu sept des nostres, tous braues Missionaires emportez icy par vne siévre maligne, & quatre autres reduits à l'Extreme - Onction; vsa de toutes les precautions possibles pour garder le reglement dans les emplois, & le regime pour le viure, qui est necessaire caril y a de certaines choses particulieres dont il faut se premunir contre la malignité de l'air de ce lieu.

Il ordonna de plus, comme vn bon Medecin; car il estoit tout à tous les siens, qu'on eust à deceler son mal, s'il se pouuoit, dés le premier iour : mais aussi dés la premiere heure, & dés le premier moment, & dés les premieres atteintes, selon la maxime si commune, Principis observa. Il aucrtitaussi qu'on ne trouuast point mauuais si dés le premier accez de la siévre, ils exhortoit vn chacun à se preparer à la mort, parce qu'en esset toutes les siévres sont en cette coste pestilentieuses, & toutes les maladies consequemment mortelles. La crainte de ce lieu sembloit sussissant donner la siévre, ou au moins le frisson: mais iamais toute la bande ne se porta mieux, en suivant les ordres de ce bon & vigilant Superieur.

Le second ennemy estoit la chaleur. Ils alloient vers le Soleil à pleines voiles, & le soleil se hastoit vers eux à toutes brides. Il ne s'en falloit qu'vn degré, & vn quart vers le dixième d'Auril, que le soleil ne sust à leur paralelle: mais la nuit il se passa, & leur laissant le Sud, ils luy quitterent le Nort. Les chaleurs immenses redoubloient tousiours, nonobstant leur éloignement mutuel, parce qu'ils aprochoient tousiours plus prés de

la ligne.

40 Relation des Missions

Le troisième ennemy fut vn grand vaisseau qui ayant paru dés la pointe du jour, mit l'alarme bien chaude dans toute la Flote: car il donnoit à craindre qu'il ne fust suiuy d'autres semblables. Le iour venu, n'ayant rien découuert dauantage, pendant qu'ils se mettoient de plus en plus en estat de dessense, l'on enuoyale reconnoistre. Le Vice-Roy estoit monté de sa Vacanda (ainsi se nomme sa demeure ordinaire) à la Pouppe auec les Ossiciers, & de là auec des lunettes de toutes sortes d'âges & de portées, ils regardoient ce vaisseau qui monstroit vne mine bien siere, & vne contenance fort asseurée.

Les autres vaisseaux de l'armée auoient arboré leurs estendars: mais lapetite Pàtache executant auec vne vitesse prodigieuse le commandement du Vice-Roy, estoit déja à l'ennemy. Ce fut vne voix commune de tous les Officiers de la Flotte en laquelle ils éclaterent vnanimement dans vn moment, disant, les fols, les fols, ils sont perdus: mais ce petit vaisseau ayant entendu la voix, aprés s'estre auancé, allant comme vn bidet qui double le pas lestement, au

dernier point où il commença à courre risque, tourna bride sur le champ, & retournant comme en poste, admiré méme de ces ennemis d'auoir si iustement, & si prestement executé son ordre, cria de tout son effort. Hollandois, Hollandois.

Il n'enfallut pas dauantage pour donner à tous enuie d'aller à eux. Les autres
vaisseaux enuoyent demander au ViceRoy la permission de fondre dessus,
asseurant que l'auantage du vent dont
l'ennemy se preualoit, ne luy seruiroit
pas même pour échaper: Mais la response du Vice-Roy sut que sa Majesté ne
luy auoit déclaré en ce voyage des Indes,
d'autres ennemis que ceux qui s'opposeroient à sa route, qu'en ce cas, il s'asseuroit d'eux, qu'ils se monstreroient
tous gens de cœur, comme il l'auoit tousjours creu, & en voyoit des témoignages.

A méme temps le sifflet du Contre-Maistre ioua au lieu du tambour, & la voix du Pilote sut ouie à la place de celle du Capitaine. Il parut alors, que par vn traject special de la prouidence diuine Relation des Missions

l'on n'auoit point abandonné le Galion: car sans doute il auroit esté enleué par ce vaisseau ennemy, s'il eust esté rencontré seul.

Mais la ligne du costé du Sud, & le Soleil du costé du Nort, leur faisoient plus de peine que l'ennemy en front, & déja ils sentoient les extrémes chaleurs de la Zone torride, que les Portugais appellent Las Calmas: Mais ils entroient de plus en plus dans le calme qu'ils nomment Las Calmarias. La diminution des vents est lors sensible, bien que de temps en temps ils auoient certaines nuées de vents frais, qui les poussoient vn peu. Enfin ils se trouuerent au terme, qu'on ne parloit plus de marcher; Ils estoient à trois degrez, & quarante-cinq minutes prés la ligne, & c'est iustement le peril, depuis le quatriéme degré iusqu'au second, ou au premier. Les courants contraires les auoient aprés fait retirer imperceptiblement de cinq minutes, & alors le calme fut plein, & les voiles se voyoient pendans aux Masts, comme des rideaux à des colomnes d'vn lit, & le vaisseau bransloit aussi peu qu'vn rocher

planté au milieu de la mer.

C'est vn estat propre pour apprendre, & la patience, & l'impuissance de l'homme, & la soûmission deuë à vne souueraine vertu. Mais il est certainement horrible, & plein d'épouuante : car il fait voir plus de six cent personnes enfermées dans un vaisseau, exposées à des chaleurs cuisantes au milieu d'vn trajet, où ils se sentent consumer, & rostir à petit seu par tout le corps, depuis la teste iusqu'aux pieds : où de plus ils contemplent de leurs yeux leurs viures, leur boisson, & en vn mot tout ce qui fait leur subsistance, & d'où dépend leur vie, se gaster, & se corrompre par la chaleur de ceclimat, & par la malignité de l'air. Enfin ce qui est le comble de tous malheurs, qu'ils ne peuuent pas faire vn pas, ny pour auancer, ny pour reculer, afin de se sauuer de ces fournaises du Ciel, & de la mer, & du nauire: car les chaleurs intolerables qui les enuironnent de toutes parts, leur rendent ces lieux des fournaises embrazées, sans qu'il y ayt, ny coin si retiré, ny trou si petit, où l'air tout allumé ne penetre, & où l'on puisse 44 Relation des Missions

bas dedans & dehors, par tout ce n'est plus que chaleur, & que seu, qu'on respire; les slammes attirées par les narines saisssent le cerueau, & le sont boüillir au dedans, les poulmonsen sont dessechez, le cœur embrazé, le sang allumé & boüillant; en vn mot tout le corps reduit en seu & en slammes, n'est plus qu'yne sournaise viuante, & vn bucher animé, qui n'a de vie & de sentiment, que pour se sentir brûler, & viure à ses cruelles ardeurs.

C'est à peu prés l'estat où se trouuent les corps des hommes dans les intemperies de ce climat, pendant que les corps des vaisseaux, surpris comme d'vne subite paralysie, & d'vne facheuse immobilité, sont arrestez, & comme cloüez sur les ondes, toutes inconstantes & liquides qu'elles soient. L'experience en fait sentir plus que la plume ne sçauroit dépeindre; & le sentiment du mal est tout autre, que la parole ne l'exprime. Mais aprés tous nos genereux Missionaires se reiouissent parmy ces soussir, quam segnior suit ignis, qui foris vsit, quam

qui intus accendit, comme par le le grand sainct Leon, de sainct Laurent. Ils experimentent le même, le seu qui les brûloit au dehors, estoit plus lent, que celuy qui les allumoit au dedans, Flammis tuis superari charitas Christi stamma non potuit. La slamme de charité qu'ils auoient pour les us. Christ ne peut estre vaincuë par les slammes de la Zone Torride. Enfin il leur estoit doux de passer par ce seu, asin de courir au salut des ames, puisque le vray zele passeroit même par les braziers d'enser pour les retirer, s'il en estoit besoin, comme dit S. Gregoire le Grand.

Il est vray que par les soins amoureux de la diuine Prouidence qui ne dort, ny ne sommeille dans les interests des siens: Ecce non dormit, neque dormitat, aprés qu'ils eurent donné des preuues d'vn courage ardent à sonseruice, ilseurent sujet de dire auec le Psalmiste. Transsuimus per ignem & aquam & eduxisti nos in refrigerium. Nous auons passé par le seu & par l'eau, & vous nous auez conduit au rafraichissemét: car durant cette bonace si importante, & si brûlante, ils apperçeuoiét de sois à d'autres de douze

ou de quinze lieuës approcher des nuées qu'ils appellent de vents frais, & tirer vers eux auec la rapidité comme d'vn chariot volant. A cette veuë les voiles se preparoient pour n'en rien perdre, & pour auancer, quand ce ne seroit que

d'vn pas.

Mais ces nuces poussant premierement leurs haleines fraiches, venoient peu à peu à s'épaissir, puis à se resoudre en eau, & enfin à se décharger en pluye douce, qui seruoit d'vn bien agreable rafraichissement. Ce calme fournissoit l'occasion d'vn autre diuertissement, qui les consoloit extraordinairement, c'est que les vaisseaux s'entreuisitoient les vns les autres: car les bateaux alloient à la rame, & les premiers Officiers de la Flotte se rendoient à la Capitanesse, pour faire leur Cour, & pour complimenter le Vice-Roy. Nos Religieux se defererent aussi ces deuoirs mutuels, & iouirent de la presence les vns des autres durant ces iours de temperature, plus moderée.

Mais comme ces calmes se prolongeoient, le Pilote sur l'experience qu'il auoit de longue-main de ces routes, comaux Indes Orientales.

mença à apprehender si viuement le danger, dont la Flotte estoit menacée, qu'il auertit hautement qu'il ne falloit pas moins craindre six iours de cétte demeure immobile, que six semaines, & qu'il estoit temps desormais de recourir à Dieu, vû qu'il n'y auoit point d'apparence de sortir de ce poste si perilleux, sans vne grace speciale du Ciel. Il adjoustra de plus, qu'il y auroit moins à redouter si l'on estoit plus auancé en mer, &

plus eloigné de la coste.

Pour obtenir ce rafraichissement qu'il demandoit, il se resolut d'en procurer à ceux qui en auoient besoin: mais d'vne autre maniere. Comme il estoit sort pieux & charitable enuers les ames de Purgatoire, il sit luy-même la queste dans le nauire pour elles. Les Religieux offrirent leurs messes pour vn nombre de iours, les Seculiers contribuerent iusqua la somme de cent liures pour en faire dire d'autres. La queste ne sut pas si tost ache-uée le soir, que voilà le vent non seulement auec la ioye; mais auec l'admiration de tous qui loüerent la bonté de Dieu de ce que selon sa parole, Bien-

Relation des Missions

heureux sont les Misericordieux, parce qu'ils obtiennent la misericorde: Beati Misericordes, quoniam ipsi misericordiam consequentur. De vray Dieu leur enuoya ce rafraichissement au mémetemps qu'ils le procuroient à ces ames si tourmentées dans les seux du Purgatoire. Le Pere Superieur de la Mission dît alors de bonne grace, En verdad estant almas sisteraon honradament. Ces ames ont fait fort honorablement, parce qu'elles donnoient au méme temps, qu'elles receuoient.

Ce vent causa d'abord deux grands biens, l'vn fut de rabbatre tout d'vn coup, & de moderer l'extrémité de la chaleur l'autre de tirer les vaisseaux du danger de rester immobiles les semaines entieres, & de rostir là à petit seu des ardeurs de ce climat: le troisiéme suivit incontinent aprés: mais ce fut par vn autre vent qui se nomme des generaux, c'est qu'il leur sit passer la ligne peu à peu. Le premier iour de ce vent ils se trouuerent à vn degré & vingt-cinq minutes au delà; le second au delà de deux degrez & demy; le sixiéme au delà du septième: & ainsi ce même vent soussant toufiours

tousiours, & les courans qui sont là frequens, les portans, ils se virent en peu de iours hors des perils & des ennuis pafsez. Les Mariniers ne manquerent pas à leur ordinaire de faire grande Feste sur ce passage, auec des inventions dignes de leur esprit, ily cut force dances, & force masquarades à leur mode: mais la piece la plus galante, fut vne deliberation pour iuger comment on procederoit à l'encontre de cette ligne, afin de remedier à l'aduenir à ses desordres, & de la punir du passé, pour auoir fait iusqu'à ce iour tant de peine, & tant de peur aux voyageurs, principalement à ceux qui vont de Portugal aux Indes.

Mais le Pilote qui iettoit ses pensées plus loing, quoy que la ligne sut passée, & que le vent continuast bon, sans se laisser aller à ces passe temps, se tenoit tout pensis, & portoit vn visage des iours critiques. C'est qu'il sentoit approcher le Cap de sain à Augustin qui est au hui- diéme degré, passage tres-perilleux, où quatre heures de mauuais temps, deconcertent & renuersent toute la conduite du plus habile Pilote: carquand on est

venu à son éleuation, on rencontre infailliblement les vents en Prouë, lesquels il ne peut surmonter, s'ils sont grands, que s'il les surmonte, il y faut mettre tant de temps que les Mocaoms, (ce sont les vents reglez) se perdent, & se passent. Or aprés on ne rencontre plus que des vents d'orage, auec lesquels l'on ne peut acheuer le voyage cette année-là, de sorte que les plus sages Pilotes sont obligez de se rendre volontairement au Bresil, & de là à Lisbonne pour recommencer l'an suiuant le voyage, & pour tenter s'il sera plus heureux dans vn nouuel embarquement: Mais le Pilote auoit si bien pris ses mesures, & auoit vsé de tant de preuoiance, que ce Cap fut plustost passé que veu, & luy tout ioyeux en alla donner la nouuelle au Vice-Roy, laquelle par le sifflet fut portée à tout le vaisseau, & aussi-tost pour action de grace, tous dirent le Pater & l'Aue. l'on ne monstra point tant de ioye dans le vaisseau pour aucune autre rencontre, comme pour l'asseurance de cette nouvelle.

Comme les chaleurs augmentoient plustost qu'elles ne diminuoient, l'on vint aussi à diminuer l'eau : car depuis que la ligne, & le Cap desain& Augustin furent passés, châcun ayant misson esprit au large, encore que d'ordinaire cela ne se fasse qu'aprés auoir passé le Cap de Bonne Esperance, parce que iusqu'à ce terme, les plus expers Pilotes ne peuuent rien dire d'asseuré du voyage, l'on auoit trouué tel nombre de pipes d'eau vuides, que cela ierra de l'apprehension dans les esprits. Il yauoit des auberges, Rancho, disent les Portugais, où plusieurs se mettent à viure ensemble, qui se figuroient auoir de reste cinq à six pipes d'eau, & ils n'en trouuerent qu'vne, & encore à demi écoulée. C'estoit vn autre mal heur, que l'eau estoit alors corrompuë par vn vice ordinaire de la ligne, & la corruption estoit à tel point, qu'il y auoit de la peine à l'approcher seulement de la bouche.

Vn autre surcroy de facherie sut que iamais elle ne pût estre bien remise, & pour vne demie pipe qui se trouuoit raisonnable, il en falloit passer vne pipe & demie de mauuaise, & de puante. La plus part sentoient d'étranges répugnances à vser de tel breuuage: Mais la neces-

Relation des Missions sité les obligeoit de les aualer.

Quelques-vns des Peres s'en estant abstenus deux ou trois iours pour l'incomodité qu'elle leur causa dans l'estomach, & demeurant sans boire au milieu de ces extrémes chaleurs, s'en trouuerent aprés si dessechez, & la bouche siaride, qu'ils ne pouuoient consommer la Ste Hostie à l'Autel. Le biscuit se resentit aussi de l'infection de ce climat: mais non pas tant. L'on se seruit de celuy qui estoit pour les poules, comme ayant esté moins gâté, & on leur donna l'autre : enfin toutes ces incommoditez estant essuyées, personne ne manqua de faire reflection, si pour auoir demeuré ce peu de temps sous l'intemperie de ce climat de la Zone Torride, on auoit tant souffert en toutes sortes de manieres; que seroit-ce que d'auoir à viure vne éternité entiere sous terre en ce lieu de tourments preparez aux méchans. Quis poterit habitare de vobis cum igne deuorante, dit Esaie. Quis habitabit cum ardoribus sempiternis? Qui pourra de vous - autres demeurer auec le seu deuorant? Qui demeurera auce les ardeurs eternelles? Helas l'eternité dans ces feux est bien vne autre chose

que de passer la Zone Torride, ou bien

d'y demeurer quelques iours!

Or comme les vaisseaux auançoient vers le Cap de Bonne Esperance, tous s'estonnoient de la douceur du vent & de la mer, comme de choses extraordinaires aux approches de cét horrible passage, qui est la terreur des Pilotes, & le Chef d'œuure de leur art. Celuy qui gouuernoit cette Flotte, ne se fiant point à ces apparences, auoit fait mettre toutes choses en estat pour resister à l'ennemy commun de tous les nauires: c'est la tempeste qui semble auoir icy estably sa demeure, & dressé son fort, il n'yen a point d'autre à redouter en cét endroit : car chacun lorsqu'il en approche, ne songe qu'à vne seule chose, qui est de se sauuer soyméme, de ce Cap si esfroyable, & de son hyuer, auquel seul temps, il se peut neantmoins passer. Donc par ordre du Pilote, quelques-vns des Masts estoient trauersez les autres affermis auec de nouueaux cables, & le reste des autres meubles du vaisseau estalez, & disposez pour en tirer auantage dans la necessité.

L'on iugea qu'on estoit prés de ce Cap

Relation des Missions

tant redouté, à la veue de certains cotbeaux blancs, qui commencerent à paroistre, comme auparauant l'on auoit déia aperceu quelques autres oiseaux qui ressembloient à nos pigeons, dont nous rapporteron vne proprieté admirable au Chapitre suiuant: Mais enfin le Cap sit sçauoir luy même à tous, qu'il estoit present, & donna à entendre par ces effroiables signes auant - coureurs, que c'estoit luy-même. Dés le soir ce ieu commença, l'air estoit deuenu comme vn obscur brouillart; la mer se monstroit comme ayant pris son visage de colere & de furie: certainement c'estoit vne veue qui demandoit vne asseurance extraordinaire, que d'oser la regarder: Mais c'estoit bien encore pis de l'entendre dans l'agitation de ses flots, dont les moindres sont des coups de tonnerre épouuantables. Quoy qu'on fust retiré dans vn petit coin, l'on en fremissoit de frayeur. Les plus accoustumez, & les plus endurcis à ces nauigations ne se parloient pas seulement en ce temps-là: Ceux qui l'ont experimenté se persuadent aisement, que ce ne sera pas vn fremissement

de mer, selon que parle l'Euangeliste, d'autre nature que celuy-cy qui à la sin du monde pronostiquera le iugement. Toute la nuit se passa parmy ces fracas & grondements furieux, celuy-là estoit bien habile qui par ce tremblement & cette secousse de la mer ne sautoit pas du haut en bas de son lit, ou qui se pouuoit arrester à quelque chose, & ne

roûloit pas sur les planches.

Mais le matin venu, ce fut pour ainsi dire vne estrange aubade: dans vn momenton vit en l'air vne grosse nuée d'eau qui vint à verser & à fondre tout d'vn coup sur les vaisseaux, & y versa vn deluge de plusieurs centaines de tonneaux. Tout au dedans ne sembloit plus qu'vne mer haut & bas, tous les estages en estoient chargez & couuerrs. Les yoyageurs se figuroient de n'estre plus dans vn nauire mais de nager au milieu des ondes. Quelques-vns des petits enfans coururent risque d'estre emportez de la force de l'eau dans les abysmes par les ouuertures, d'où ces torrens se déchargeoient le plus: mais on y accourut; Enfinle plus fort du mal se termina à peu, comme il

D iiij

arriue souuent en ces menaces d'vne ruine totale.

La Patache n'ayant pû resister à cette violence extréme d'eau, s'estoit separée, & auoit perdu sa route, ce qui tiroit de signalez dommages; car c'estoit particulierement en cét endroit où elle deuoit seruir pour faire la voye; marcher deuant & asseurer les autres du fond. En quoy les grands vaisseaux risquent là beaucoup plus que les petits. L'Admirante prenant le deuant, sit l'office de la Patache, pour tenter le gué, & en effet ayant trouué fond, arbora aussi-tost son estendart pour signal. Le Pilote de la Capitanesse après auoir pris ses asseurances par luy-même, afin de ne pas manquer son coup, alla au Vice-Roy pour luy déclarer de sa propre bouche qu'ils estoient au Cap, & que pour les en asseurer, s'il l'agreoit, il le luy feroit voir. Le Vice-Roy vint aussi tost à la Poupe, & la sonde ayant esté ierrée aprés cent quatre. vingts brassées de cordeau, l'on trouua le fond, & l'on en tira de la terre,

Ce, Cap sembloit ce iour là comme vn furieux lié, ou comme vn frenetique qu i est dans ses bons interualles dautant que la mer; contre sa coustume estoit calme & le vent doux sans que le froid se fist sentir, & sans aucune apparence de l'Hyuer, qui regne toutesfois là en co temps. La veuë du Cap, & de la terre tirée du fond, fut suiuie aussi-tost d'vne grande ioye, les coups de sifflets retentissoient & redoubloient de toutes parts auec mille autres éclats d'allegresses: mais pour le Vice-Royilsentit alors vne pleine satisfaction; car au méme moment que ce Cap est passé, il deuient parfaitement V.ice-Roy. Sajurisdiction absolue commence depuis le Cap. Il doit prendre aprés ce passage, le baston de commandement, & alors, il a droit d'ouurir les lettres qu'on luy auoit donné fermées au départ de Lisbonne. le diray aussi que les Religieux de la Compagnie sont censez alors tout à fait Indiens, & ceux qui meurent aprés, ont leurs suffrages des morts dans les Indes. Pour les Portugais tous aussi dés-lors deuiennent en méme temps Higaldos, Nobles. Il n'y en a pas vn, qui desormais ne se dise fils de Comte, ou de Duc. Tel est le pouvoir de ce Cap si fameux à en78 Relation des Missions noblir à si bon marché.

Mais comme l'on tâchoit de gaigner le Nort pour entrer dans la terre de Natal, & delà tirer à l'Isle de sain& Laurens voilà vn vent contraire qui les fait descendre au Sud, & aller iusqu'au trenteneufiéme degré. Tous les plus experts de la marine dirent qu'il ne leur estoit iamais arriué de descendre si bas. Ce poste les mettoit hors de leur experience, & par consequent hors de leur force. Le vent sembloit s'estre rendu plus traitable, & se faire de plus en plus de pouppe, & en arriere: Mais subitement il grossit furieusement sur le midy, lorsque le Pilote estoit en estat de prendre le Soleil. Comme il vit qu'il redoubloit, il fit ausli-tost commandement d'abbatre la grande voile: mais ce fut trop tard; car vn coup de vent tout extraordinaire ayant donné dedans, mit en pieces la grande vergue, & la rompit comme vne allumette, bien qu'elle fust aussi grosse que deux hommes peuuent embrasser, & la vergue estant rompuë, elle déchira en lambeaux la voile.

Le risque fut alors extréme : car la

voilen'estant plus gouvernée & le nauire estant sans vergue qui est son contrepoids comme celuy des danseurs de cordes, le vent les emportoit sans obstacle à son gré, & ce qu'on apprehendoit encore plus, vn second coup de vent de pareille surie, estoit capable de rompre le mast, qui à

veuë d'œil souffroit beaucoup.

Mais pour apporter tout ce que l'art & la crainte suggeroit de remede: Voilà les cinquante Matelots, & les soixante & dix Gramets qui sont comme des Soûmatclots tous en besognes, les vns à la voile, les autres aux cordages: Le plus habile fut vn François, qui bien qu'il ne fist que de releuer d'yne grande maladie, au moment qu'il vit le coup; saute en diligence au plus necessaire, & commence à coupper la voile, qui par le débris de ses pieces emportoit le vaisseau: or pendant que les gens de mer trauailloient en haut, tous les autres Religieux & Seculiers auoient en bas la main à l'œuure, pour éuiter ce peril commun: Enfin la tempeste venant à relâcher, on auoit mis vne nouuelle vergue & vne autre voile mediocre, qui ne laisseL'on reprit donc la route, & tous reprirent aussi courage. Alors commencerent à paroistre les Dorates, poisson fort beau, & qui est particulier à la mer des Indes, laquelle se monstroit bien tranquille, d'où aussi cette mer des Indes se nomme des Nautoniers la mer morte à comparaison de celle du Cap, & de celle qui est deuant. On ressentit à lors l'Hyuer de la terre de Natal qui est au mois de Iuillet, tres-fâcheux pour les pluyes, & pour les froids qui continuent iusqu'aumois de Septembre.

Comme l'on tiroit à l'Isse de sainct Laurens qui a vne toute autre temperature d'air, on veilla à n'estre pas surpris des bancs, dont quel ques-vns sont fermés, & se trouuent tous les ans, les autres sont mobiles, & se forment d'années en années, & par consequent sont bien plus à craindre, d'autant qu'on y

tombe, sans qu'on y pense.

A ce sujet l'on redoubla les gardes, & les sentinelles de nuit : bien que des cinquante Mariniers qui sont dans vn vaisseau, il y en ayt toussours quinze posez la

61

nuit en diuers endroits du nauire, pour auoir l'œil aux voiles, & à toutes les autres choses qui regardent la nauigation. De plus la garde se faisoit auec des tambours de basque, qui battoient toute la nuit, & de demy quart d'heure en demy quart d'heure vn corps de garde portoit toutes les voix à lautre, & l'autre ré-

pondoit à toutes ces voix.

Ces rondes n'empéchoient pas celles du Pilore, & du Sous-Pilore, du Maistre, & du Contre Maistre, qui par fois la nuit se trouuoient aux lieux d'où il n'entendoient pas assez de bruit, l'on estoit déjaà quarante, ou cinquante lieuës de cette Isle, lors qu'on commença ces diligences extraordinaires, auec lesquelles les Officiers ne se sentoient pas encore trop asseurz. Alors on regrettoit fortla Patache qui estoit tres-necessaire pour aller la premiere sonder le gué, & pour prendre langue de la seureté des passages; enfin Dieu par sa bonté l'aiant sauuée de mille dangers qu'elle auoit courus parmy les tempestes passées, la renuoya bien à propos. Elle parut donc la croix à la pointe, pour marquer la

misericorde de son Liberateur, les ioyes furenttres-grandes à sa veuë, sur tout des Nautoniers qui virent ce guide venir si

à propos à leurs secours.

Les mal - heurs frequents arrivez fur ces bancs, obligent àtoutes ces precautions. Méme depuis peu vn vaisseau de six cent personnes s'y estoit perdu, il n'y eut que six vingt personnes qui peurent se sauuer, tout le reste demeura englouty dans les flots, & de ces six vingt hommes, so. s'estant mis en trois petites barques faites du debris du vaisseau, deux furent absorbées dans les eaux, la troisième arriuant à vne coste, fut prise par des Barbares, qui donnerent la vie à quatorze des plus ieunes, & tuerent tous les autres. Ces quatorze furent racheptez, il y en auoit vn de ceux - là dans le vaisseau, qui racontoit toutes les circonstances de ce naufrage si desastreux.

Cette vigilance eut son effet, on esquiua ces bancs, & la Flottearriua heureusement à l'Isle de sainct Laurens, & quoy que le vent sust doux, le Pilotene le prenoit que moderément, pour ne

point tomber dans les abysmes cachez. Cette Isle est au delà de l'Equateur, au regard de l'Europe. Sa plus grande partie est dans la Zone Torride, l'autre dans la Temperée, qui a les rajons du Soleilà plomb, & le même Astre deux foix en son Zenith. Les iours y sont presque tousiours egaux, le plus grand est de treize heures & de quelques minutes. Sa longueur est plus grande que celle de la France, non pas sa largeur, du costé du Septentrion, d'où cette Flotte la courroit: elle répond au Mozambic, qui est vne forteresse des Portugais, où ils ont vne habitation, & nos Peres vn College, ce sont eux qui administrent les Eglises, ou Paroisses, qui font tout le Christianisme de ces païs-là. Nous toucherons plus bas quelque chose des raretez de l'Isle de sain & Laurens.

L'on découurit en suite l'Isle de Combro: Vn des Peres estant dés la pointe du iour à son Oraison, sit le premier cette découuerte, & il y gaygna les gans: car c'est la coustume de la marine, que le Pilote reconnoit tousiours ces diligences & donne vne recompense à ceux qui les 64 Relation des Missions

premiers découurent quelque lieu important. Cette Isle paroist éleuée extrémement, & s'il y auoit crainte d'vn second deluge, il faudroit venir là, comme l'on dit pour mourir le dernier. On approcha d'vn banc qui se nomme lean de noua, plus prés qu'on ne pensoit. Il est terrible pour les nouueaux Pilotes qui ne sçauent pas se dessendre contre les courans de l'eau, d'où les plus experimentez sont surpris, & entraisnez, sans qu'on puisse y resister; & en suitte il faut indubitablement perir: mais le Pilote sceut s'en retirer adroitement. Ainsi cette Isle de Combro qui est la derniere terre qu'on d'écouure iusqu'à Goa, estant passée, tous les dangers des bancs, toutes les craintes de la tempeste auoient cessé du costé de cet Element: mais non pas de la part des hommes; c'est à dire des Holandois, qu'on apprehendoit dauantage à mesure qu'on approchoir des Indes.

L'ordre fut donc donné de se bien disposer à les receuoir, s'ils se presentoient: l'on faisoit faire souuent l'exercice aux Soldats, les Mariniers trauail-

loient

loient à vne sorte de tranchée entre-tissuë de cables qu'on tend dans les assauts tout le long du vaisseau. L'on alloit à pleines voiles, & à grandes voiles qu'on auoit remises auec la grande vergue: Mais aprés toute la crainte des hommes enparoissoit plus rien depuis qu'on ne

craignoit plus les Elements.

Il n'y eut qu'vn accident lugubre de la mort soudaine d'vn Pere Dominicain, qui troubla la ioye. Il estoit dans le Galion, sans aucun Compagnon de son Ordre, nos Peres le secoururent, & l'assistement le mieux qu'il se peut & aprés que la violence du mal l'eust emporté en peu d'heures, suy sirent ses sunerailles auec tout l'honneur possible. Ensin l'ordre estant venu du Vice-Roy, & de son Superieur qui estoit dans vn autre vaisseau, d'où la rapidité du cours de la Flotte ne suy permit pas de passer en celuy du malade, il sut ietté dans la mer auec les ceremonies ordinaires.

Comme le vent estoit en Pouppe, & tres-bon, le voyage reusissoit à merueille, ils repasserent la ligne sans aucune mauuaise rencontre : Car repasser la ligne Relation des Missions

n'est que comme vn ieu, où il n'y a rien de dissicile, ny d'orageux, à cause que cela se fait ordinairement dans la saison du bon vent, outre que l'air n'y est pas pestilent, comme en cette fatale co-ste de Guinée, pour la chaleur, elle y estoit aussi grande, toute sois plus suportable, à cause du rafraichissement des vents.

Là dessus on delibera s'il falloit tirer droit à Goa, ou bien en quelqu'autre lieu, d'où l'on pût auoir nouuelle de son estat present. La crainte qu'on auoit des Hollandois fut en partie cause de cette deliberation: Mais il fut arresté qu'on iroit tout droit à Goa, deuant que l'ennemy peust auoir aucun auis de la Flotte & se mettre en mer, comme il le pourroit faire, d'autant que l'Hyuer commençoit à passer à Goa, les Pilotes estant appellez confirmerent tous vnanimement cerreresolution, de gaigner au plustost le Port de Goa, sans donner par le rétardement aux ennemis le loi sir de se mettre en mer, pour venir affronter la Flotte.

Ils continuerent donc le voyage, ne

voguans plus en marchands, ou en passagers: mais en gens de guerre. Les Soldats bien aguerris ne faisoient plus l'exercice, mais ils estoient disposez en faction en divers quartiers, l'on ne s'éucilloit plus qu'au son du tambour, les vaisseaux sembloient des citadelles, châque piece d'artillerie estoit partagée à son Officier, les boulets tirez dehors, & mis en estat, toutes les autres munitions de guerre preparées, enfin tout ce qui appartient à la dessense du vaisseau, auec les nouuelles fortifications acheuées, ne respiroit plus que la guerre, & le courage que l'ardeur martial, dont tous se monstroicht animez contre l'ennemy.

Le septiéme d'Aoust, ils estoient au septiéme degré de la ligne vers Goa, auec vn si grand vent, que s'il n'eust esté en pouppe, il eust passé pour tempeste, tant il estoit impetueux, & ébranloit si furieusement le vaisseau. Cette iournée fut la plus grande du voyage, elle passa cinquante lieues, & approcha de soixante, les courans contribuoient aussi à cette vitesse. Le Pilote s'en désiant, sit abbatre toutes les voiles les vnes aprés les autres:

mais comme ils alloient encore trop fort fans voile à cause que l'impetuosité du vent s'attachoit aux cordages, on lâcha les voiles mais en les trauersant desorte que le vent ne prenoit plus le nauire qu'en flanc, & même l'on le mit tout à fait à la Cape, & ainsi les vaisseaux ne

marchoient plus.

Le Pilote se gouvernoit ainsi pour ne point approcher des terres en temps de pleine Lune, qui estoit tout proche: mais pour demeurer en pleine mer : car d'ordinaire les pleines Lunes sont orageuses à Goa. De plus il ne vouloit pas approcher des terres, qu'aprés auoir pris la hauteur du Solcil: enfin il auoitreconnu par plusieurs experiences, qu'il ne fait pas seur d'entrer dans les terres par vn vent si extraordinairement fort. C'est pourquoy comme il continuoit dans cette même violence, il eust recours au méme remede, dont il s'estoit seruy pendant le calme de la Guinée pour le faire leuer; Il sit vne queste nouuelle pour les ames du Purgatoire (chose estonnante) que vit tout le vaisseau: la queste se fit le soir, & le vent cessa le matin dans cetto furic qui estoit à redouter, Dieu voulut monstrer & à l'entrée, & à la sin du voyagepar ces graces redoublées, combien luy plaist la charité enuers les ames de Purgatoire, ensin c'est sa parole, date, & dabitur vobis. Autant qu'on leur donne, Dieu donne autant pour elles.

## CHAPITRE VI. L'arriuée de la Flotte à Goal

E vent s'estant rendu au souhait du Pilote, la Flotte alloit à toutes voiles, la Patache luy frayoit le chemin, auec ordre de marcher à telle distance, qu'on la vit tousiours, & de ietter la sonde à chaque quarto, c'est à dire, six fois pendant toute la nuit: car le quarto fait la sixième partie de la nuit.

L'on cherchoit par tout la terre, & elle sembloit fuir. Tous experimenterent ce que dit l'Oracle Diuin, Spes qua differtur, assignt animam, l'esperance disferée asslige l'ame, les heures duroient plusque des iournées, sur tout à ceux qui estoient obligez de ieûner pour n'a-

E iij

Relation des Missions

uoir pas bien ménagé leurs viures: mais enfin la Patache ayant tiré de la terre auec la sonde, elle le sit entendre à toute la Flotte par vn coup de canon qui estoit le signal donné. Elle reitere incessamment l'auis tant attendu par vne seconde volée de canon, & alors tous les vaisseaux iettent leurs sondes, & comme tous se furent asseurez par leurs propres yeux de la terre, ce ne sut plus que ioyes, que coups d'artillerie pour saluër le port de la ville de Goa, & pour appeller les Pilotes de la barre.

L'on continuoit d'aller tousiours de bel air, iusqu'à cequ'vne pluye les arresta, elle fust l'vnique qu'ils eurent, nonobstant l'Hyuer: mais grosse & pesante, & propre du climat de Goa, laquelle sembloit les vouloir accabler si prés du Port, on prit donc resolution de ne pas aller plus auant sans guide, & l'on mouilla l'ancre en cét endroit. Aussi-tost l'on dépesche en diligence la Patache à la forteresse auec ordre de se tenir à la portée du canon sans rien dire de la Capitanesse nu de ce qui venoit dedans.

Incontinent deux Pilotes de la Barre

aux Indes Orientales.

71

se rendirent à la Flotte auant la nuit aucc toutes sortes de rafraichissements, excepté de l'eau fraische, qui estoit pour, tant la plus desirée. Le lendemain matin vingtième d'Aoust on entra dans la Barre & lors se découurirent les montagnes de Goa, belles à cause de la verdure de l'Hyuer qui dominoit alors dans ce pays: car en Esté il n'y a pas sous ces cimes vn filet d'herbe pour l'extrême secheresse

du pays.

Nos Missionaires deuant que de débarquer offrirent rous à Dieu le sainct Sacrifice de la Messe en action de grace pour tous les biens-faicts receus de sa bonté infinie durant vn voyage diuersisié de tant de hazards, leur ioye du reste estoit extraordinaire de se voir entierement désaicts de l'Europe, & deuenus tout Indiens. Celuy qui les deuoit prendre, vint auec vne Galere destinée pour le Vice-Roy, qu'ils accompagnerent per honneur à la sortie du vaisseau, eux ne songeans plus aussi qu'à la leur.

Ce qui les pressoit dauantage, estoit de ne pas perdre la marée; de vray comme ils l'auoient auec le vent fauorable, ils passerent en peu d'heures ce bras de mer qui s'étrecit de plus en plus à mesure qu'on approche du port. Il faict vn Belueder, ou vn aspect merueilleusement agreable à l'œil: car on passe comme entre deux bordures qui sont de part & d'autre chargez de Quintas, ou Palmares. C'est à dire de maisons des champs reuestuës d'vne verdure qui satisfait particulierement la veuë, ces Palmares sont de tres-beaux arbres. Or voir cela du milieu de la mer aprés cinq mois de voyage, où la veuë estoit bornée à des planches d'vn vaisseau, augmente sans doute le contentement d'vn tel spectacle.

Mais ce qui leur parut de plus gentil, ce furent quelque maisons basties sur le riuage à la Françoise: elles estoient petites: car elles n'auoient qu'vn estage: mais qui estoit éleué, & où l'on montoit de chaque costé par de beaux escaliers auec vne iustesse tres-bien proportionnée, & outre cela deux vergers ou Palmares qu'elles auoient à leur slanc, y donnoient vne grace singuliere.

## CHAPITRE VII,

La reception faicte aux Missionaires par les Peres de Goa, par le Public de la ville, & par les Eglises des Indiens conuertis.

A 1s pour ce qui appartient à la reception qu'on fit à nos Missionaires, elle sut merueilleuse, non pas nouvelle, ny extraordinaire: car toutes les sois qu'il vient vne Mission, c'est à dire, vne multitude de Missionaires de Portugalaux Indes, on leur fait la même, aussi affectueuse, & aussi magnifique.

Neantmoins comme dans les autres Relations, qu'on aura pû auoir de ces voyages, l'on ne trouue point ce sujet décrit si amplement, ny si bien particularizé en ses circonstances, comme le Pere qui a enuoyé cette derniere, l'a couché exactement selon qu'il l'a veu de ses yeux, & qu'il y a eu bonne part. Ie choissiray ce qu'il a de plus remarquable pour le representer dans cét écrit. Ce narré

74 Relation des Missions

seruira à faire connoistre premierement l'estime & l'honneur que Dieu se plaist de procurer même dés cettevie à ceux, qui pour embrasser les trauaux de la vie Apostolique, abandonnent tout ce qu'il y a de doux & d'éclatant en ce monde. Mihi autem nimis honorificati sunt amict tui Deus. Dit l'Eglise des sain ets Apostres en empruntant ces paroles du Psalmiste, i'honnore vos amis iusqu'à l'excez; en second lieu paroistra dans les splendeurs de cette reception la gratitude de ces pays Orientaux, qui font vn accueil si caressant, & si honorable à ceux qui courent à leur secours pour le bon-heur erernel.

Or cette reception exposera le plus court qu'il se pourra, en retranchant plusieurs choses que la modestie oblige de taire, ce que sirent premieremnt les Peres de Goa en accueillant nos Missionaires, puis ce que le Public y voulut contribuer de sa part, & ensince que les Eglises des Chrestiens conuertis, que nos Peres gouuernent, y apporterent de leur costé.

Quand au premier, à peine les Missio-

naires aprés estre descendus du vaisseau, eurent-ils auancé dans le chemin, que voi-la vne troupe de nos Peres de Goa qui vinrent au deuant d'eux, & incontinent aprés vne autre où estoit le Pere Recteur du College, & puis il en suruint vne troisséme, où estoient les Procureurs des Maisons. A prés tous les bons accueils & les embrassemens affectueux mutuels donnez & receus, auec des sentimens d'vne charité extraordinaire, comme le sujet le meritoit, les Missionaires sont tout droit conduits à la maison des champs qui appartient au College.

La reception y fut digne du bon cœur des Peres qui receuoient, & du merite des hostes qui estoient reçeus. Quant aux derniers, le plus delicieux rafraichisment, c'estoit d'y auoir de l'eau qui ne fut point tirée depuis cinq mois. Il n'y auoit aucun breuuage, quelque exquis qu'il pust estre, qui sus plus à leur goust,

ny qu'ils beufsent plus volontiers.

Aprés vn peu de repospris en ce lieu champestre, l'on parla d'aller à la ville & au College: Ils en prennent le chemin, le Soleil s'estant couuert, escortez au

76 Relation des Missions

reste de toutes ces trois troupes des nostres, qui s'estudioient tous à l'enuy à donner aux voyageurs toutes les demonstrations possibles de ioye pour leur heureuse arriuée.

Ils se figuroient d'auoir veu tous les Peres de Goa: mais voicy que sur le milieu du chemin vne autre bande se presente auec de nouuelles marques de charité; dont les visages & les cœurs se monstroient épanoüis. Plus bas parut vne autre troupe des plus considerables, où estoient le Pere Superieur, & le pere Vice-Prouincial, auec les principaux de la maison Professe de Goa; & ce sut alors vn renouuellement de cheres embrassades, où les larmes de ioye ne furent point épargnées de part & d'autre.

Certainement ces venerables vieillards qui auoient blanchy dans les trauaux des Missions de ces Contrées, sembloient reuiure & raieunir d'allegresse, voyant cette compagnie si leste de ces ieunes Peres, dont l'ardeur, & le zele éclatoit sur leur visage, qui venoient prendre leurs places, & poursuiure la conqueste des ames, qu'ils auoient si fort auancée.

C'estoit aussi à nos Missionaires vn tresaillement de ioye incroyable, que leur cœur pouvoit à peine contenir, de se voir à la presence de tant d'excellents ouuriers de l'Euangile, vrais heritiers de l'esprit de S. François Xauier, aux glorieuses entreprises desquelles ils devoiét succeder. Aussise sent discours, si fort embrasez de ce beau seu de l'esprit Apostolique qu'il les emportoit desia de volonté au milieu des trauaux des Missions, il leur tardoit de n'y estre pas autant par esset, qu'ils y estoient de desir.

Mais il sembloit qu'il n'y auoit plus rien à attendre aprés tant de receptions si charitables reiterées les vnes sur les autres, ce n'est pourtant que la premiere partie de cét accueil qui venoit de la part

de nos Religieux de Goa.

Toute la ville qui se sentoit si fort interessée à la veuë de tous ces braues soldats de Iesus-Christ, comme sainct Paul appelle les Zelés Ouuriers de l'Euangile en la personne de Timothée son Disciple, & tout le Public se creust obligé de monstrer sa ioye par les marques de sa deuotion.

Voila donc que de sa part, paroist subitement vn chœur nouueau composé de plusieurs ieunes hommes de diuers âges, reuestus à l'Eclesiastique, auec de beaux Surplis. Tout d'abord qu'ils se presétent, entonnent auec vn concert de voix harmonicux le Pseaume Landate Dominum omnes gentes, puis le Cantique Benedictus Dominus Deus I fraël. Les haut bois par vn second chœur secondoient agreablement cette musique, ainsi nos Missionaires arriverent parmy ces chants de reiouissance aux portes de la ville.

Mais quand il y fallut entrer, les autres Peres se retirerent, on les laissa allerseuls, & separez, afin qu'ils fussent reconnus de tous les Habitans qui cstoient aux fenestres, aux portes, & dans les rues assemblez pour les voir pas-

ser, & pour les saluer.

A peine furent-ils entrez, que voila le carillon des cloches, qui sonnent par toutes les Eglises, & qui retentissent en diuers Hymnes de resiouissance.

Comme les Missionaires auançoient dans la ville, voila vne autre Compagnie de ieunes enfans richement couronnez qui redoublerent la musique, il les enuironnerent aprés de toutes parts, & les vns les couurirent de sleurs, les autres les arroserent d'eaux de senteurs par les ruës pendant qu'ils alloient dans vn bel ordre les vns aprés les autres, au trauers d'vn monde insiny amassé de part & d'autre.

Enfin ils se rendirent au portail de nostre Eglise où les nostres les attendoient sur les degrez auec le Surplis & l'eau Beniste, ils furent introduits dedans les louanges de Dieu resonnoient de tous costez: estant arriuez au fond du chœur, Monseigneur le Patriarche d'Ethiopie qui est de nostre Compagnie, les accueillit, & ils eurent l'honneur de luy baiser la main.

Enfin toute la reception se termina par vne faueur, qui causa à tous vne merueilleuse consolation, on leurs apporta vne belle relique de sainct François Xauier, qu'on presenta à tous, l'vn aprés l'autre, afin de l'honnorer, de la baiser, & de la voir à leur aise, ce fut à la veuë de ce pieux objet, que seur cœur & seurs yeux

se sentant fondre en larmes & en douceur de deuotion, ils creurent tous que les fatigues des einq mois de leur nauigation si ennuieuse, estoient hautement recompensez du bon-heur qu'ils auoient de iouir de la presence, & des merites de ce grand Apostre des Indes, en vne partie de son glorieux corps, qui par son incorruptibilité de plus de cent ans, est la plus rare merueille de tout l'Orient: mais nous en parlerons amplement plus bas.

Les Missionaires furent en suite conduits au College, où l'on commença à leur faire de grandes excuses de ce qu'ils n'auoient pas esté reçeus auec plus de demonstration de charité, & de ce qu'ils auoient vn peu attendu au porti C'est l'ordinaire quand il y a Mission, c'est à dire, vn nombre de Peres qui arriuent dans les vaisseaux de Portugal, pour les païs des Indes Orientales, de les aller prendre au port auec ceremonie: vne Galere qu'on équipe tout exprés va au deuant d'eux, portant l'étendart de la Croix, & où il ya des chœurs de musique, de voix, & d'instruments, puis fuiuent.

suivent d'autres Galeres qui doivent amener les Missionaires: mais auant que d'approcher du vaisseau où ils sont, elles font trois sois le tour en chantant le Laudate, le Benedictus, & d'autres Motets.

Cette saincte coustume n'auoit pas esté pratiquée au desembarquement de nos Missionaires, c'est de quoy les Peres de Goa s'excuserent, & la cause de l'excuse estoit, que les Peres du Collège cstant accourus sur le port au bruit du canon, ceux qui estoient dans la Patache, les auoient asseurez qu'il n'y auoit point de Missionaires venus d'Europe par la Flotte. Surquoy les Peres' s'en estant retournez, il n'y eust que le Pere Procureur qui s'estant arresté pour sçauoir des nouuelles de Lisbonne & pour tirer des vaisseaux les lettres qu'ils auroient apportées enfin il découurit que la Patache les auoit trompez, à cause du commandement qui luy auoit esté fait de ne rien deceler de ce qui estoit dans la Flotte.

Mais quoy qu'il en soit, il fallut que les Peres pour la satisfaction de la faute, telle qu'elle pouvoit estre, lauassent les pieds à leurs hostes, & les baisassent comme ils firent en les arrosant de leurs larmes? Ce ne sut en suitte qu'à chercher les moyens de les faire vn peu respirer aprés de si longues incommoditez & de reparer leurs forces alterées sans doute, & affoiblies par ces viures à demy corrompus de la mer & par ces facheuses veilles, à quoy le sifflement impetueux des vents, & le grondement surieux des flots les auoient obligez la plus part des nuits.

Ie passe sous silence toutes les autres marques d'affection, dont les Peres de Goa receurent nos Missionaires. Il ne faut pas s'en estonner: Car ils se figuroient de receuoir en leurs personnes le Sauueur, & son Pere Celeste, selon sa parole; Qui recipit vos, me recipit, & qui me recipit, recipit eum qui me misit, Qui vous reçoit, me reçoit, & qui me reçoit, recoit celuy qui m'a enuoyé.

Mais les Eglises des nouveaux Chrestiens que nos Peres servent, iugerent estre aussi de leur devoir d'honorer par de particulières demonstrations de respect & de charité, les Missionaires les considerant comme les descendants & les Successeurs desaince François Xauier leur grand Pere, pour ainsi dire, de qui ils tenoient la vie de la grace, & qui les auoit engendrez à Iesus-Christ par l'Euangile: Ego enim genui vos in Christo

per Euangelium.

Pour n'estre pas trop long, ie ne toucheray que ce qui se sit en l'vne de ces Paroisses. Comme donc ils en approchoient dans vne barque, voilà les autres barques qui enferment la leur, & la mettent au milieu, & alors le concert de voix, & d'instruments commença à se faire entendre, marchant parmy ces agreables diuertissements entre deux collines tresagreables: la mousqueterie aprés se monstre, & fait sessalves, & à châque portée de mousquet, paroissoient des batailsons rangez en vne belle ordonnance. Passant plus auant, ce fut bien autre chose : car la soldatesque qui estoit beaucoup plus nombreuse que la precedente, & les canons qui estoient des pieces de campagne donnerent à l'enuy. La nuit venue, les feux d'artifices, & les fusées de mille belles inuentions se firent voir.

Le traictement fut honorable, pour les autres marques d'allegresses sans les exposer en leur splendeur, ie ne fais que les nommer. Les representations pleines de traits d'esprit, & les dances à l'Indienne estoient merueilleuses, dont l'vsage est icy admis dans les ceremonies mêmes les plus saintes, à la mode de Portugal & d'Espagne; & ces peuples pour dire ce mot en passant, les croyent autorizées par l'exemple de l'Ecriture, qui dit de Dauid que Totis viribus saltabat ante Dominum. Ce sain et Roy dansoit de toutes ses forces deuant l'Arche du Seigneur.

le passe diuerses autres choses de même genre, qui pourroient sembler excessiues à ceux qui les prendroient d'vn autre sens, que ne les donnoit la charité de ces bons peuples: mais la même charité qui est vne maistresse, non moins sage qu'ingenieuse, persuadoit à tous ceux qui receuoient ces Missionaires qu'ils ne pouuoient assez reconnoistre la vertu & la generosité de leurs hostes: car ils scanoient qu'ils auoient quitté seurs biens, leurs amis, leurs habitudes, & seurs emplois, tout ce qu'ils auoient de cher, & d'attrayant dans l'Europe, asin de venir s'immoler pour le seruice de leurs pays,

aux trauaux, aux incommoditez, & enfin à mille martyres de la vie & de la mort, qui sont tous les gages & tous les

appointemens de ces Missions.

Ie ne puis toutefois obmettre ce qui réiouissoit pardessus tout nos Missionaires, qui ne goustoient ces autres diuertissements qu'autant que la ciuilité religieuse le permettoit: C'est que dans ces diuerses Eglises, les petits enfans, les garcons d'vn costé, les filles de l'autre, chantans des airs spirituels, les conduisoient assemblez en procession, puis l'on faisoir deuant eux la doctrine, c'est à dire le Carechisme, où ces enfans faisoient merueilles de bien dire, parce qu'ils estoient parfaitement instruits: en vn mot il leur sembloit voir vn petit miracle en ces enfans, qui dans vn païs d'idolatrie, parloient de Dieu auec vne capacité qui surpassoit la portée de leur âge. Cespectacle enverité les combloit de ioye, d'autant plus grande, qu'ils iugeoient de cét échantillon combien ces peuples sont capables de la connoissance de Dieu, & cequ'ils pouuoient eux-mêmes se promettre d'y auancer pour l'honneur de l'Euangile.

F iij

La charité, dit l'Apostre, espere tout, & même presume de faire le bien, qu'elle voit estre faict par les autres : car c'est sa voix que la voix de l'Apostre, omnia possumine o qui me confortat, le puis tout en celuy qui est ma force.

## CHAPITRE VIII.

Les raretez, & les autres curiositez naturelles remarquées en ce Voyage.

Blen que plusieurs de ces curiosités naturelles soient desia semées dans les parties diuerses de ce narré, ainsi que ceux qui en sont plus auides, les auront pû remarquer, i'en specifieray quelques-vnes, que i'ay reservées exprés pour ce

Chapitre.

La premiere, est que iusquà la coste de la Guinée fort prés de la ligne, il ne parut point de poisson prés de leur Flotte. Les experimentez dirent tous que c'estoit bon signe; parce que quand l'on voit quantité de poissons accompagner les vaisseaux, il faut s'asseurer de mortalité; car ils ont iene sçay quel pressentiment aux Indes Orientales.

de la proye qu'ils attendent des corps

morts qu'on iette dans la mer.

Pendant ce grand calme qui les tint exposez aux ardeurs de cette coste, ils firent la premiere pesche : le premier poisson qui se presenta estoit gros comme vn perit enfant, on luy ietta tant de lignes de tous costez, qu'il n'en deuoit pas échaper: Ce fut vn passe-temps tresagreable. Premierement on luy vit faire tous ses tours & ses retours auant que demordre à l'hameçon, puis quand il le faluttirer au haut de la voile de la Proue d'où l'hameçon qu'il auoit pris luy auoit esté ietté, le spectacle ne fut pas moins diuertissant de considerer comme quoy il se dessendoit auec tous ses esforts, & auec toute son industrie de monter si haur.

Tous s'estonnoient pourquoy le poisson auoit tant disseré à paroistre, quelques vns disoient que la mer auoit voulû qu'on luy payast son tribut auant que de rien donner: En esset le premier des Passagers estant mort dans le vaisseau, dés le lendemain, le poisson se monstra, & la pesche commença, qui sut suffisan-

F iiij

te pour seruir de rafraichissement en vn temps où pour l'intemperie de la Zone Torride, la chair fraîche estoit desia rare.

La seconde chose curieuse fut la pesche iointe à la chasse qui se fait sur mer. Ce diuertissement s'appelle ainsi, parce que l'oiseau s'y rencontre auec le chien: mais le mal-heur de l'oiseau est qu'il demeure la proye du chien, qui est l'vnique chasseur, & qui tire tout le prosit de ceieu.

Cét oiseau est vn poisson volant, qui pour sauuer sa vie, lors qu'il est poursuiuy dans l'eau, par le chien marin, sort de son propre element, & à la faueur de deux aisses qu'il a au lieu de pinnes, s'éleue en l'air plus haut que la portée d'vn mousquet. Il y demeure: mais peu de temps, autant que l'eau qu'il à enleuée auec luy, luy conserue ses ailes fraisches: quand elle est consumée, alors il tombe à bas: mais le chien-marin par vn instinct qui vaut bien celuy de nos chiens de chasse les mieux dressez, se trouue aussi à propos au lieu de la cheute, comme s'il l'auoit mesuré, que le poisson volant ne touche pas l'eau bien souuent en tombant : car

on voit le chasseur se lancer sur sa proye, & la deuorer quelque sois même qu'il est encore en l'air. Cette chasse se fait principalement le matin, & sous la ligne, il y a de ces poissons volans en si grande quanté, que non seulement ils égalent les plus grandes bandes d'estourneaux: mais qu'ils sont quelque sois vn nuage si épais, qu'ils semblent couurir le Soleil.

Le Pourceau - marin donne vn autre diuertissement par ses saults, & par ses capriolles aussi iustes, que pouroient estre celles du plus adroit maistre à danser. On les voit passer, quatre à quatre vne iournée entiere, venant les vns aprés les autres, & s'éleuer par des saults compassez au dessous de l'eau, comme vn chien qui saulteroit au dessus d'vn baston, & cela continuant dans vne méme route auec vne cadence que la nature leur apprend si reglée, qu'elle surpasse tout ce que l'art peut enseigner. Qui veut iouir de la veuë de ce ballet si bien dansé sur les ondes par ces baladins de la mer, qu'il se garde de donner la moindre épouuante à vn seul: car au plus moindre bruit qui les effraye, ils disparoissent

tous en vn moment. Au reste pour cequ s'en voit, ce n'est pas vn nombre, c'est vne infinité qui paroist à perte de veue, chargez sur le dos des uns des autres, si ce n'est lors qu'ils se mettent à saulter &

Vn Marinieren prit vn auec yn hazard estrange, le poisson ayant esté pris à la ligne, comme il s'empéchoit d'estre ietté dans vn basteau, & se deffendoir si vigoureusement qu'il estoit tout prest, de se sauuer, le pescheur qui estoit vn excellent nageur, se iette dans la mer pour gaigner la queuë du poisson, & pour faire d'autres caracolles, afin de reprimer ses fougues.

Aprés tout ce poisson estoit si furieux, que si vn autre marinier qui tenoit la ligne où il estoit acroché à l'hameçon, ne s'en fust bien seruy, en vsant comme d'yne -bride qui faisoit aller le poisson cotre son gré où il ne vouloit pas, & l'arrestoit d'executer les furieuses sallies de son instinct se portant haut & bas, à droit & à gauche, iamais le pescheur n'en seroit luy méme échapé. Ce fut vn des plus rares spectacles de la mer, & peut-estre l'vnique en son espece, que le combat de ce Pescheur contre ce Monstre marin dans son propre Element. Ensin aprés que ce duel eust duré assez long temps, il falut que l'ennemy epuisé de forces entrast bon gré mal gré dans le basteau pour seruir de proye, & de petit triomphe à son vainqueur, qui pour adiouster cette circonstance notable, estoit de corps plus petit que son captif, quoy qu'il fust de taille ordinaire, d'où l'on peut conjecturer la grandour de capaissen

la grandeur de ce poisson.

Les Balaines sembloient aussi suivre les vaisseaux pour leur prester vn autre sorte de passe-temps, & de rafraichissement ensemble. Il s'en presenta trois en même temps, qui durant les grandes chaleurs, leurs iettoient des tonneaux entiers d'eau par leurs ouuantes: ce sont ces vastes conduits qu'elles ont au idessus de la teste, il y en eust deux autres qui les accompagnerent tout vn sour, & qui seur restererent de sois à autres ce même seu. Il en parut d'autres en d'autres temps, mais aprés quelques heures, elles disparoissoient dans les abysmes.

Les Pigeons de mer qui commen-

çoient à se voir, comme l'ay desia dit, vers le Cap de Bonne Esperance, & les Itineraires dressez pour ces voyages, le marquent, ont vne proprieté bien remarquable, c'est qu'on les voit dormir sur la mer, & y reposer dans ses plus violentes agitations, & sur les plus grands slots de cet Element, aussi doucement que nos oiseaux demeurent à seur aise sur vne branche que le vent frize legerement.

Pour ce qui est du Mozambic, & de l'Isle de sainct Laurens qui luy répond d'vn costé, le premier a de l'or & du marphin en quantité. Tout ce qui s'en voit en Europe en vient, mais pour les commoditez du viure & du reste, il en est destitué totalement. On le pouruoit de tout comme vn nauire. Goa le fournit d'habits, & de nourriture, l'Isle de sainct

Laurens de tous biens.

Quant à ce qui est de cette Isle, sa fertilité en tous biens est prodigieuse. Les vaisseaux qui font les voyages des Indes, se trouuans dans la necessité, y vont faire leurs prouisions. Ce n'est pas chose croyable comme tout s'y donne à bon marché; on y a les grands moutons pour cinq sols, & de petites vaches pour quinze ou vingt, & encore pour moins car monstrer de l'argent de quelque saçon qu'il soit, c'est assez. Ces Insulaires le prennent, & le coupent aprés en pieces pour en faire des brasselets. C'est ce qu'en rapportent les Portugais qui l'ont experimenté en plusieurs voyages des Indes.

Au reste ces Insulaires se sont entre eux vne guerre cruelle. Ils vendent les Captifs, d'où quantité passent iusqu'à Goa. Pour le nombre de leurs Roys, ou plustost de leurs Seigneurs, eux-mémes ne le sçauent pas : car à mesure que quelqu'vn croist parmy eux en pouuoir, ils vsurpent le nom & le droit de Souuerain,

& puis fait la guerre aux autres.

Les Portugais selon qu'ils asseurent, auec six cent bons hommes, se rendroient aysément maistres de l'Isle, & ils la conserveroient encor auec moins de monde, & cela est assez croyable: carils ne scauent point le mestier de la guerre. La fureur & le desordre sont le principal de leurs forces: c'est merueille que les Portugais ne s'en sont pas saissi dés leurs premiers voyages aux Indes: car cette

Isle est parfaitement bien située pour le commerce de tout l'Orient, même pour aller à Macassar, & de là à Macao, l'on peut prendre sa hauteur pour éuiter les Hollandois. Adioustez que cette Isle, dans ses terres, produit force diamans, qui delà sont transportez iusqu'à Goa, & y sont fort estimez, & vendus cherement.

Mais ce que l'on doit déplorer, c'est que ce pays parmy toutes ces felicitez de la Nature, estant si grand, & si peuplé, n'a pas vn seul Chrestien, pas vn Prestre, ny même pas vn Ouurier de l'Euangile, comme les mêmes Portugais, l'asseuroient alors que se sit ce voyage. Quel objet plus digne de compassion, que de manquer de tous biens spirituels, & de les voir neantmoins passer prés de soy tous les ans depuis cent cinquante ans, que les Flotes Portugaises ont commencé à mener des Missionaires aux Indes.

Il y auoit quelques-vns d'entre les Peres qui estoient dans ces nauires dont nous parlons, qui eussent ardemment souhaitté, touchez de la perte de tant d'ames, d'y estre desembarquez, pour y porter la lumiere de la Foy, s'ils n'eussent creu manquer aux lieux où la vocation de Dieu les destinoit specialement, & pour le service desquelles les auoit tirez particulierement de France. Le zele du salut des ames multiplieroit volontiers ceux qu'il possede, en tous les lieux où il y en a, à sauver, si le pouvoir égaloit leur voloté, Non est qui se abscondat à caloreeius Il n'y a personne qui se cache à l'ardeur d'vn cœur allumé de cette saincte slâme.

Pour ce qui est de la nauigation, ce n'est pas vne petite merueille, ny peu considerable, qu'elle ayt esté heureusement acheuée en moins de cinq mois. Il falloit autres - sois, & méme il faut quelques-sois, encore employer huictou dix mois entiers, & ce qui est plus facheux, on est obligé de relâcher au Mozambic, & y passer l'Hyuer. On a fait enuiron cinq mille lieués dans ce voyage. Les vents generaux de la ligne (on les nomme ainsi à cause qu'ils sont ordinaites, les porterent sort vers l'Occident) l'amplitude de ces mers n'est pas presque croyable, si ce n'est à ceux qui l'ontexpe-

rimenté, sans vn vaisseau qui alloit fort mal, ils auroient fait le voyage en trois mois & demy, ce qui paroistroit estrange, si l'on considere ce que ie viens de dire.

Il semble que les bons Anges de la Chine, & des autres pays où nos Missionaire aspiroient auec tant d'ardeur, ayent secondé leurs desirs, leur rendant la mer, les vents, & tout le reste si fauorable, à proportion de ce qui s'est veu dans les

autres voyages.

Dessous la ligne il y a presque continuellement des pluyes, des neiges, & des nuës qui dessendent des ardeurs du Soleil. L'Ocean y est toussours grandement agité, même dans vne grande distance à l'élevation du destroit de Gibraltar, & de l'embouchure de la mer Rouge, entre le Madagascar & l'Afrique. Durant toute l'estenduë de l'Isle la mer a le cours d'vne riviere, ses ondes se voyent égales auec vn bruit & vn murmure semblable à celuy des ruisseaux, ce qui n'est en aucune autre endroit.

Son mouuement le plus impetueux est là du Midy au Nort. Dans le reste du voyage ils ont experimenté qu'elle a dides terres, ou des écueils, les poissons & les oiseaux, comme l'ay dessa dit, en marquent les voisinages; aussi à leurs diuersités, les Pilotes experts connoissent souuent de quelles terres ils approchent.

Ie finiray ce Chapitre par vn rare secret tres-vtile pour la nauigation, & qu'il est bon qu'on sçache, comme iel'ay appris par le recit sincere d'autruy, ie le communiqueray aussi sans enuie, pour meseruir des termes du plus sage des Roys, Sine sictione didici, & absque inuidia communico. Cesecret est pour conseruer, & même pour accroistre notablement la vertu de la pierre-d'aymant. Il faut donc la tenir enseuelie dans du poivre entier, & en changer tous les ans vne fois ou deux. Le Pere Pierre Albier de la Prouince de Bourdeaux, l'vn de nos genereux Missionaires, escrit ce secret, & asseure qu'il a experimenté sur sa pierre d'aymant, qu'elle estoit beaucoup plus forte, aprés qu'il eust vsé de cette industrie qu'elle n'estoit auparauant. Le méme poivre réueille & resuscite, pour ainsi

G

98

dire, cette vertu, quand elle est perduë C'est des Indiens Gentils qu'on a appris ce secret, & il est commun parmy eux pour les experiences journalieres qu'ils en font.

## CHAPITRE IX.

glur degré, que la grece de familia al freu

L'autre voyage par terre des Peres François de la Compagnie de IESVS, allans aux Missions des Indes.

VELOVES - VNS de nos Peres François ayans obtenu de nostre Reuerend Pere General la grace d'aller aux Missions des Indes, prirent le chemin de terre; parce qu'ils se persuaderent sur l'instruction de ceux qui auoient fait le même chemin auparauant, qu'il estoit plus seur, & plus court. Le desir donc d'arriuer au plustost au terme où leur zele les portoit, les incita à prendre cette route.

Certainement le puis asseurer que si leurs bons Anges leur eussent fait la faueur de les emporter en ces pays loin-

tains, où estoit leur cœur dés le moment qu'ils les aymerent pour Dieu, de la méme maniere qu'vn des bien heureux esprits transporta autrefois Abacuc en Babylone, ils leur en sçauroient d'autant plus de gré, que la grace du sain& Esprit, qui les poussoit à gaigner au plustost à l'Euangile tout ce Paganisme si estendu, ne sçait que c'est que de lenteur dans ses actions, Nescit tarda molimina Spiritus sancti gratia. En vn mot, comme ils sont du nombre de ces nües Mystiques d'Esaie; ils eussent desiré de voler, afin de se rendre incessamment au terme de leurs Missions, Qui sunt isti qui vt nubes volant? afin d'arroser au plustost ses rerres si seches & si arrides de l'infidelité des caux salutaires de la parole de Iesus-Christ. as intoxus: at necessarily

Ie rapporteray donc icy le plus brieuement qu'il sera possible, la route qu'ils ont tenue par terre, pour se rendre à Goa la capitale des Indes, & le rendez-vous, d'où aprés les Missionaires de nostre Compagnie, prenent leur departement vers les diuerses Contrées des Insideles, afin de trauailler à leur conversion. Ie marqueray aussi en passant ce qu'ils auront rencontré de memorable, & qui peut seruir, tant à la direction de ceux qui épris & guidez d'vn méme zele, pourront suiure leurs glorieus traces, qu'à la satisfaction de ceux à qui cette

lecture pourra plaire.

Ces Peres estans entrés dans la Turquie la trauerserent presque toute entiere. Quelques - vns sans s'écarter beaucoup de leur chemin, visiterent les lieux sacrez de la Palestine. Tous ensin se rendirent à Alep dans la Syrie; & comme alors il ne s'offrit aucune autre commodité, pour gaigner temps, ils se ioignirent à vne Carauane composée de deux cents Turcs, s'estant trauestis à la Turquesque, asin que n'estant pas découuerts si aisément il n'y eust point d'obstacle, qui les peust arrester.

Mais ils ne pûrent si bien se déguiser, que dés le second iour, ils ne fussent reconnus pour Chrestiens. L'odeur de la vertu se fait sentir par tout: Nous sommes, dit l'Apostre, la bonne odeur de Iesus Christ en tout lieu. Ce parfum a vne senteur si puissante, & si exquise, qu'il ne

peut estre supprimé: & de fait il découurit ces Peres, lors qu'ils se cachoient le plus. Ainsi se voyant découuerts par eux mesmes, & par leurs religieux deportemens, ils ne sirent plus de dissiculté de dire leurs Prieres, & de reciter leur Office publiquement & à la veuë de tout le monde: Et bien loing que les Tures sussent choquez de cét exercice de pieté, comme on leur auoit voulu faire apprehender, ils leur témoignerent d'en estre fort edisiez, & les supplierent de leur monstrer quelques Images deuotes, qu'ils auoient dans leurs breuiaires.

Il leur fallut passer toute l'Arabie deserte, pays, comme le nom le porte, le plus
sterile, qui soit au reste de la terre. De
vray en quarante iournées, qu'ils employerent en cette trauerse, ils ne trouuerent que deux méchants villages, presque pas vn arbre, point de ruisseau, ny
riuiere, si ce n'est l'Euphrate, qu'ils passerent à quatre iournées de Bagdad, qui est
l'ancienne Babylone si fameuse. Aussi
les occasions de sousserir ne leur manquerent point durant ce long-temps: car ils
marchoient parmy ces affreuses solitu-

G iij

des, où ils n'auoient pour leur subsistance que ce qu'ils portoient auec eux sur des Chameaux. Le tout ne cossissoit qu'en va peu de biscuit & de ris, & de l'eau le plus souuent corrompuë, qu'ils rencontroient de quatre en quatre sours, en quelques trous, ou dans des autres lieux relans; & cependant ils ne laisserent pas de garder exactement le jeusne du Caresme, qui estoit gardé alors.

Les froids de la saison, les neiges qui tomboient quelquesfois en abondance, en vn mot le sommeil qu'ils estoient obligez de prendre en pleine campagne, sans soulagement de seu, n'y ayant point de bois dans ces deserts, leur fournissoient vne amplematiere pour imiter leur digne chef, le grand Apostre, qui entre les épreuues de son Apostolat; compte la faim, la soif, les jeunes, le froid, les voyages penibles, & les dangers dans la folirude.

MI.

Leur Carauane passa tout au pied de cette si celebre Tour de Babel, où se sit la confusion des langues. Elle se voit plantée dans une grande plaine à neuf lieues de Bagdad. Sa hauteur est au moins

de vingt piques, sa largeur enuiron de vingt brasses, sa sigure quarrée au dedans, il n'y a point de vuide, elle est toute massiue, de sorte qu'on ne peut y monter que

par dehors.

Ils gagnerent enfin Bagdad ville extremement grande & tres-peuplée, qui auparauant appartenoit au Persan: Mais lo grand Seigneur l'alla en propre personne assieger, il y a pres de vingt ans auec vne armée de plus de cent mille hommes, quelques vns y mettent iusques à trois cent mille hommes, laquelle (pour noter en passant ce traict de la Police remarquable des Turcs, comme elle passa par Alep, on croyoit qu'elle y causeroit la famine, & neantmoins toutes les denrées n'y furent iamais à meilleur marché, que pendant les iours qu'elle y sejournat, & y fit alte. Or Babylone fut emportée en peu de temps par certe si puissante armée, & le grand Seigneur en est demouré maistre paisible iusqu'à ce remps.

Apres le sejour de trois ou quatre iours fait à Bagdad au logis des Reuerends Peres Capucins, qui les receurent aucc beaucoup de charité, ils s'embarquerenz

sur le Tygre, pour descendre à Bassora, qui est la derniere ville de l'Empire des Turcs de ce costé-là, & la premiere de l'Arabie Heureuse, assez grande & assez peuplée; mais tres-mal bassie. Le grand Seigneur n'en est Maistre que presque de nom; carily a vn Bacha perpetuel, qui en tire tout le reuenu, & n'en rend à la

Porte, que fort peu de chose.

Vn peu au dessous de cette ville-là, se fait le confluent des deux Riuieres tant celebres, du Tygre & de l'Euphrate, & le dernier perd son nom dans le premier, quoy que tous deux soient presque d'egale grandeur. Au reste ils paroissent plus grands, que pas vne de nos riuieres de France; si est-ce que la Seine, le Rosne, & la Loire en approchent de bien prés. Ils logerent à la Maison des Peres Carmes Dechaussez, qui ont là vne Mission, & ils en furent accuëillis auec beaucoup de bonté: Ils les inuiteret mesme de passer aucceux les Festes de Pasques:mais la commodité qui se presenta de s'embarquer pour Congo, port du Royaume de Perse, les obligea de se priuer de cette consolation.

rement Homorthon, qui est vn autre port du Roy de Perse. Come ils croyoient y trouuer les vaisseaux Hollandois, qui y estoient venus l'an passé, ils apprirent qu'ils en estoient partis quelques iours auant seur arriuée pour aller à Surrate. Il leur fallut attendre là vn mois entier le depart d'yn vaisseau de Mores qui deuoit partir pour le mesme lieu, qui estoit aussi seur chemin.

Le long sejour de ce lieu, où l'air est si malin, & si pestilent, que les originaires mesmes sont contraints de le quitter, & d'aller demeurer pendant certain temps de l'année dans des montagnes voisines, où l'air est plus frais & plus benin, altera si fort leur santé, que s'estant trouvez déja indisposez & d'ailleurs leur ayant esté necessaire de s'embarquer dans ce vaisseau More, deux d'entr'eux furent trauaillez si violemment d'vne siévre maligne, qu'en moins de dix iours ils en furent emportez: L'vn estoit de cette Prouince de France nommé le P. Paul Gobert, l'autre le P. Peyronnene de la Prouince de Tolose, heureux tous deux d'estre du nombre glorieux de ces grands hommes, qui comme parle l'Apostre en l'Eloge qu'il fait d'eux en peu de paroles, mais auec de tres-illustres sentimens, Tradiderunt animas suas pro nomine Domini Iesu Christi.

Qui ont donné leurs vies pour le nom de Nostre Seigneur Iesus-Christ, & à qui le martyre a plustost manqué, que non pas eux au martyre; puis qu'ils l'alloient chercher auec ardeur jusques dans les feux, & dans les fosses du Iapon.

Les autres furent aussi attaqués du mesme mal si griefvement, que peu s'en fallut qu'ils ne les suiuissent au tombeau, & cependant durant les violentes douleurs de la fiévre, ils n'auoient tous pour liet, que de gros cables de Nauire, & pour secours dans vne disette totale de medicamens, que la charité, & les bras du Pere Iacques de Faure, qui, bien qu'il parust le plus foible, demeura seul en santé, Dieu, par vne particuliere prouidence l'ayant conserué, afin d'assister ses compagnons, ainsi qu'il le fit auec tous les foins possibles. Ils ne laisserent pas pour, rant de gagner en dix-sept iours de nauigation le port de Surrate.

Il appartient au Roy de Mogor, & sans contredit est auiourd'huy le plus frequenté & le plus riche de l'Inde Orientale: Mais il y a vne douane la plus cruelle & la plus tyrannique que l'on puisse se sigurer: Car non sèulement on visite le bagage & les marchandises; mais on fouille mesme les personnes, & on leur fait payer quatre pour cent de tout l'argent qu'ils portent, sans compter les autres droicts, qui s'exigent pour les den rées diuerses qu'on y amene.

Nos voyageurs subirent ces extorsions, payant de gros imposts pour leurs petites hardes, qui n'estoient que des ornemens d'Autel, & vn peu de linge, outre qu'on leur en déroba vne partie, & le Gouverneur mesine leur prit deux belles branches de Corail, qu'on leur auoit donnée: Omnia detrimetum feci & arbitror, vi stercora, vi Christum lucrifaciam, porte la deuise du Missionaire, imitateur du grand Apôtre: Tout perdre, & n'en faire pas plus d'estat que d'vn fumier, pour gagner les vs-Christ. O que cette perte est vn riche gain!

Le P. lacques le Faure, qui auoit ius

ques alors resisté au mal, fut sais d'va rheumatismesi fort, qu'il le rendit aussitost paralytique de tous ses membres. Il fut transporté promptement à Damian petite ville à trois lieues de là qui appartient aux Portugais, & où il y a vn College de nostre Compagnie. Ils sejournerent-là deux mois entiers assistez par ces Peres auec tous les secours d'vne charité parfaite. Le sang se trouua si corrompu dans leurs corps, qu'il en fallut saigner vn iusques à dix-sept fois pendant ce tempslà, & ce seul remede fut sa guerison; de cecy l'on voit (ce qui soit dit à l'honneur de Messieurs nos Medecins de Paris) que la saignée frequente se pratique dans ces pays d'Orient, quoy que le climat y soit excessiuement chaud, & mesme brûlant, aussi bien que dans nostre air temperé.

Quand ils eussent jouy d'vne pleine santé, ils n'auroient pas pû partir alors de ce lieu; parce que c'estoit l'Hyuer, qui en cette partie de l'Inde commence en luin, & dure iusques à la fin du mois d'Aoust. Or cet Hyuer est bien different de celuy de nostre Europe; car il consiste

seulemet en pluyes & en tempestes, presque continuelles, qui n'empeschent pas qu'il n'y fasse bien chaud: mais ils arrestent tous les voyages tant sur mer que sur terre.

r terre. L'Hyuer estant cessé, & nos Missionnaires ayant recouuré leur santé, ilsise mettent en chemin pour venir à Bazain, qui est vne autre ville des Portugais assez grande & assez force, où il y a pareillement vn College de nostre Compagnie. Aprés qu'ils curent fait quelque sejour en ce lieu, & dans quelques autres de nos Maisons, qui sont dans les lieux scituez le long de cette coste-là, ils s'embarquerent pour joindre Goa : ce qu'ils firent le 19. du mois d'Octobre 1654. Dieu les ayant tirez d'vne horrible tempeste, qui les surprit au port, où peu de iours auparauant vn vaisseau, qui ne faisoit que d'arriuer de Portugal, encore chargé de touces ses marchandises, auoit fait naufrage par la violence d'un pareil orage.

## Linial sula sisserial sintensis sint

Les Missionnaires rendus à Goa, & les choses remarquables de cette ville-là.

Nfin nos Missionnaires François, qui auoient esté tant de mois separez les vns des autres à cause des diuerses routes qu'ils auoient prises, se virent rejoinces & reunis à Goal, où ils entent le loisit de respirer, & de se rafraischir, aprés de si longues, & de si penibles fatigues des chemins, en attendant la commodité de passer à la Chine, & aux autres lieux affectez de leur Mission. Or asin que nous prositions du sejour qu'ils y ont fait, nous apprendrons de leur lettres ce qu'ils y ont veu de memorable.

Le P. lacques le Faure, qui tient que Goa est plus grand qu'Orleans, dont il peut estre bon iuge, ayant veu l'vn & l'autre, la nomme à bon droiet, le Bouleuart du Christianisme dans les Indes. Quand on écriuoit ces années dernieres en Europe, qu'elle estoit assiegée par vne flotte des Hollandois, qui sont icy les en-

hemis des Portugais les plus formidables, comme ils sont les plus aguerris, & qui muguettent cette place il y a longtemps, c'est qu'on n'en scauoit pas la disposition & la situation. Elle est de telle sorte, qu'on n'en peut pas approcher par mer plus prés que de trois lieuës, deuant lesquelles, il faut attaquer quatre sorteresses bâties sur des rochers, qui au reste sont toutes quatre comparables aux meilleures de l'Europe.

Pour dire quelque chose de Goa, sans traiter des bâtimens publics & particuliers, les Eglises & les Monasteres y sont magnisiques. Presque tous les animaux s'y voyent différents de ceux d'Europe, aussi bien que les arbres & les

herbes.

Les arbres conseruent leurs feuilles toute l'année, & à chaque mois de l'année, il y a des fruicts nouueaux, qui seruent de refraischissement continuel, & de remede agreable contre ses chaleurs immoderées.

## CHAPITRE XI.

De l'Estat de la Religion Chrestienne, es les empeschemens qu'elle y souffre,

Vant à l'Estat de la Religion, elle y sleurit toussours par les soins des Ouuriers Apostoliques que N. Seigneur continuë d'enuoyer à la culture de cette

vigne

Il est vray, que les guerres suscitées par les Heretiques Europeans, qui ont enuahi déja Malaca & d'autres lieux considerables de ces Indes, apportent des obstacles tres grands à leurs saints trauaux, puisque mesme ils en prennent prisonniers, & les tiennent dans les cachots, les fers aux pieds, auec des inhumanitez qu'ils ne souffriroient pas parmy les Insideles.

qui ont passé par ces rigueurs: Mais ce qui leur sembloit plus rude dans toutes leurs peines, c'essoit que par leur detention, le salut des ames pâtissoit beaucoup, que grand nombre d'Insideles se dan noient

faute

aux Indes Orientales.

113

faute de secours, & le Ciel les perdoit pour iamais, les ayant pû gagner, si les Predicateurs eussententesté en liberté.

Quelle pitié, & qui ne pleure auec des larmes mesme de sang, ces dommages eternels, qu'on fait au sang de I es v s-Christ, sous pretexte de s'enrichir vn peu plus, se rendant les seuls maistres du trasse de la canelle, & d'autres telles denrées; Carensin c'est à ce seul but, où l'Heresse; Carensin c'est à ce seul but, où l'Heres

Vn autre empeschement du cours de la Religion en ce pays est venu de la part d'vn certain, sans le nommer (car il est plus à propos de le taire) que sa charge, & l'employ qu'il auoit pris, obligeoient plustost à l'auancer. Cét homme auoit obtenu vne dignité de grande consideration dans l'Eglise sur les promesses magnisiques qu'il auoit donné de s'employer à la conversion des Insidelles: Mais bien loin de s'en acquitter, ill'acm-

preschée autant qu'il a pû en diuerses manieres.

Il a premierement inquieté & molesté les Ouuriers Euangeliques dans leurs Missions, iusques à les faire emprisonner par ses calomnies dans les prisons de quelques Roys Infideles: Mais pleust à Dieu qu'il se fût souuenu, que les Iustes vn iour, selon la sagesse, poursuiuront deuant le tribunal de la Iustice Souueraine, ceux qui les ont affligé. De plus, le mesme a voulu mettre la ville de Goa entre les mains des Hollandois: outre cela, il est allé à la Cour du Roy d'Hidalcan, l'vn des plus puissans de ce pais, & Mahometan de Secte, pour le solliciter à faire la guerre aux Portugais; Mais cette perfidie derniere luy a tresmal reussi; car ce Roy irrité du manuais succés de son entreprise, comme il se dira plus bas, qui l'a épuisé en frais immenses, a fait prendre ce mauuais Conseiller, & l'a enuoyé lié & garroté aux Portugais, auec qui il veut faire la Paix; vn de nos Peres qu'il affectionnoit, y ayant heureusement trauaillé, & l'intention qu'il a euë en leur liurant, a esté qu'ils le traicassent comme il le merite.

Au reste Dieu a tiré vn grand bien de tous les malicieux desseins de cét homme; car ce Roy a deputé vn Ambassadeur vers les Portugais, pour lier & establir la Paix auec eux: Il a aussi assigné à nos Peres vne Maison dans sa ville capitale, qui se nomme Visapour, leur a octroyé vn plein pouuoir d'exercer leurs fonctions, & pour comble de sa magnificence, il leur a pourueu de son Epargne dequoy les nourrir, mesme durant les trois ou quatre mois qu'il a fait la guerre aux Portugais.

S'il plaist à Dieu de benir cette nouuelle Mission, elle est pour produire des fruits abondans au bien & à l'accroissement de la Religion Chrestienne, dans les terres qui sont de l'obeissance de ce Roy; car elles sont de tres grande esten-

duë, & tres-peuplées.

Ce qui nuit encore icy à l'auancement du Christianisme, aussi bien que dans toute l'Inde Orientale; c'est que cette ville n'a point de Pasteur, & tout ce païs est à la veille de se voit destitué de tous Euesques; car il n'y a plus en cette ville

H i,

que le Patriarche d'Ethiopie, qui s'y est retiré depuis la desolation entiere de son Eglise, & l'Euesque de Serra, l'vn de ses Suffragans, qui sont tous deux âgez de soixante & treize ans, & tous deux de nostre Compagnie. Or il est de soy visible, quel préjudice peut arriver au bien de la Religion, si elle vient à manquer totalement de Pasteurs; car peu à peu les Prestres, les saintes Huiles, le Sacrement de Confirmation, & mesme les autres luy manqueroient: Mais Dieu, qui a montré vne prouidence speciale sur ce païs iusques à cette heure, le pouruoira, comme il est à présumer de sa misericorde, de ces secours absolument necessaires à la conseruation du Christianisme parmy ces peuples. lo, sorres qui (nec do Lui, allabar de co-



eff a missificate fount deltime desenta East juce, the least a liberto occe ville

ananoup dias

0 11

they a method have been grande chees

## CHAPITRE XII.

De la merueille de l'Orient, qui est le corps entier de S. François Xauier, et des effets de sa protection sur la ville de Goa.

N belesprit a ingenieusement rencontré, lorsque faisant le parallele de sain & François Xauier auec le Soleil, il a composé ce Distic qui comprend sa pensée en peu de mots.

Nasceris occiduis, Eois occidis Indis,

Dissimile hoc vnum, catera Solis habes. Vous naissez à l'Occident, & vous vous couchez à l'Orient. En cela seul vous differez du Soleil: Mais pour ses autres perfections, vous les possedez toutes. C'est que ce grand Sainst est né dans le Royaume de Nauarre, qui est à l'Occident, & il est decedé à l'Isle de Sanchian, voisine de la Chine, qui regarde l'Orient.

Mais pour ne point exposer les autres H iij rapports de cette si illustre comparaison, ce glorieux Apostre des Indes a cette ressemblance auec ce grand Astre de l'Vniuers, en ce qu'en son corps il participe

à son incorruptibilité.

Quoy que la ville de Goa soit enrichie de plusieurs raretez, elle n'a rien pourtant, qui égale la gloire de ce corps qu'elle possede depuis plus de cent cinq ans, entier, sans aucune corruption. Il ne luy manque que le bras droit, qu'on coupa du reste du corps par ordre du Pape, afin de le porter à Rome, où il est en nostre Maison du IESVS, honoré aucc vne grande veneration. Or bien que depuis cette separation, il se soit notablement desseiché, si est-ce qu'il conserue tousiours son incorruptibilité, qui le rend la merveille la plus rare de l'Orient, comme durant sa vie il en a esté le miracle en sainsteré.

Mais puisque nous sommes tombez sur ce propos, il ne sera pas ennuyeux au Lecteur d'apprendre quelques raretez qui arriuerent au transport qui se sit de cette sainte Relique des Indes en Euro pe: Car outre qu'elles sont peu connuës, elles seruiront à connoistre dauantage le merite de ce grand Sainct, & l'honneur dont Dieu l'a voulu rehausser en cette rencontre.

La premiere chose remarquable est, que nostre Reuerend Pere General, qui estoit alors le Pere Claude A quauiua d'heureuse memoire, ayant fait grand instance, pendant trois ans pour faire porter à Rome ce sacré dépost, & le commandement du Pape Paul estant là dessuinteruenu, enfin les Peres de Goa ouurirent le sepulchre, à cette condition, que s'il arriuoit qu'en entamant ce precieux bras, le sang en coulast, on ne poursuiuroit pas dauantage de le separer de son corps.

Le sainct corps estant découuert, on le trouua auec l'œil ouuert, vis & clair; telles parurent aussi les lévres, & les extrémitez des pouces, & des deux doigts, dont ce grand Apostre auoit touché; & administré le tres-sainct Sacrement à tant de peuples, pleins de suc, & ayant encor la chair viue: Pour le reste du corps il auoit bien sa chair entière: mais elle estoit seiche & sans suc; & ainsi de l'incision qu'on sit pour auoir ce bras, il n'en

H iiij

coula point de sang.

120

La seconde chose, dont le Pere Sebastien Fontesca qui apporta de Goaà Rome cette tres digne Relique, est témoin oculaire (personnage, du reste pour la probité de sa vie, d'vne foy irreprochable) qui merite d'estre obseruée, comme fort merueilleuse, c'est qu'estant party de Goa au mois de Ianvier, il arriua à Lisbonne au commencement de May, de sorte que son voyage ne fut que de quatre mois, & le plus court retour des Indes qu'on ayt sçeu encor estre arriué: Car le retour de Goa en Europe estant plus long d'vn mois que l'allée, selon le cours ordinaire de la nauigation, on y employe communement du moins sept ou huict mois.

Mais la derniere merueille est plus illustre. Le nauire qui portoit ce precieux gage, estoit seul en ce voyage, fort petit, & presque de nulle dessense. Il arriue qu'il sut rencontré dans vn temps calme, & en pleine mer par vn Vaisseau de Pyrates tres-bien equippé. Aussi-tost qu'il eut découuert ce petit Nauire, il le poursuiuit si viuement, qu'il l'alloit ioindre,

M

& s'en saisir sans resistance. En effet le Pere & tous ceux qui estoient dedans, se tenoient perdus, sans quelque secours extraordinaire du Ciel.

Mais il ne leur manqua point dans cette extrémité: car sur ce peril qui sembloit ineuitable, vn vœu ayant esté fait à sainct François Xauier, & le Pere Sébastien prenant la layette où reposoit la saincte Relique, se mit à faire vne priere au Sainct; & voilà (chose merueilleuse!) que le vaisseau des Corsaires est arresté tout court par vne vertu secrette sans pouuoir aller ny en auant, ny en arriere, & cependant le petit Nauire poursuiuit lestement sa route, ayant le vent à pieines voiles, si bien que dans deux ou trois heures ils eurent perdu de veuë ces ennemis, & fe trouuerent heureusement guarantis de ce danger euident.

Le Vice-Roy des Indes alors auoit offert de faire faire à Goa vn tres somptueux Reliquaire pour y enchasser ce venerable dépost: mais les Peres trouuc-rent plus à propos qu'il fust fait à Rome, & à cetre sin enuoyerent ce qui seroit necessaire pour les frais de l'ouurage. Il se

voit donc en nostre maison Prosesse de Rome, & aux plus grandes solemnitez, outre ce, à la feste de Saint François Xauier, il s'expose sur son Autel, & l'on l'y honore en disant la Messe, & par les au-

tres exercices de pieté.

Nos Missionaires l'ont veu & consideré auec toute la curiosité, & toute la diligence que leur pieté donnoit à des cœurs, & des yeux également auides, à l'aspect d'vn objet rauissant. Ils le dépeignent en ces termes. Le visage, la main gauche, & les pieds qui paroissent découuerts, sont encore beaux, & pleins, les cheueux noirs, & assez longs, la bouche vn peu entre-ouuerte, & qui montre quelques dents fort blanches, le visage en certains endroits marqué de chaux, dans laquelle il fut mis incontinent aprés sa mort, afin qu'il fust plustost consumé; la pointe du nez vn peu abbattuë, les yeux fermez, & la teste vn peu panchante sur le costé gau-

Il est dans vn beau sepulchre d'argent auec ses habits Sacerdotaux. La Chasuble qu'il a maintenant, sut enuoyée par

la feuë Reyne d'Espagne, & mise entre les mains du Pere Marcel Mastrilli; qui depuis a esté vn glorieux Martyr du lapon, afin qu'elle cust la vieille, dont il estoit reuestu auparauant, comme elle luy fut enuoyée. Cette grande Princesse la receut auec les sentimens de veneration deuë à vne si saincte Relique.

Le concours des peuples à ce sacré monument, est continuel, & incroyable: non seulement les Chrestiens; mais encore les Gentils, dont il y a encore tresgrande quantité dans ce païs-là, tous vnanimement l'admirent, & l'honnorent. Le iour de sa Feste qui est icy trescelebre, vn de nos Peres François y estant en priere, ouit dire à vn Payen, qui le regardoit auec respect, que c'estoit vn vray miracle.

Certainement ce grand Sain& se montre le Thaumaturge de ces temps, parce qu'il opere des merueilles sans cesse par tout le monde, comme les liures imprimez en diuers endroits le publient, & ils pourront peut-estre dans peu de iours paroistre en nostre langue.

Mais pour ce qui regarde Goa qui a

esté tousiours sa ville cherie, à qui il a donné les premices de son Apostolat & la sleur de ses trauaux, qu'il a aussi honoré de ses tres-sainctes Reliques, il montre par ses graces signalées, dont sans cesse il comble, tant les particuliers que lo general, qu'il est son special Protecteur, & son tres-sauorable Patron: qui veille continuellement à son bien, & à sa deffense.

Ie n'en toucheray que deux marques qui sont les plus recentes, & qui témoignent les soins continuels qu'il a pour la conservation de cette ville, qui le tient aussi, & le reuere de son costé pour son Pere, & son Protecteur.

Il arriua l'an mil six cent cinquantequatre vn tremblement de terre à Goa, lequel sut si furieux, & si effroyable, que bien que cette ville soit sujette à de pareils desastres, il ne s'est iamais rien senti, ny ouy de semblable dans les siecles passez. Ce sut la nuit du treizième au quatorzième suillet, qu'il se leua subitement tout d'vn coup auec vne telle violence, que les lits, les murailles, & les maisons de l'Orient, & de l'Occident se balançoient fort sensiblement, comme aprés la tempeste, vn Vaisseau se balance d'vn costé & d'autre.

Les personnes rouloient auec leurs lits d'vn bout de la chambre à l'autre, & aprés s'estre leuez, ils se heurtoient les vns contre les autres dans les logis. Nos Peres remarquerent tousours que ce balancement de la terre estoit de l'Orient à l'Occident, & retournoit de l'Occident à l'Orient: Ils furent se prosterner deuant le tres-sain et Sacrement, comme au Souuerain, & à l'vnique ay de qui leur restoit icy bas.

Aussi est-il pour dire ce mot en passant Firmamentum in terra: Psal. 71. au sens que plusieurs donnent à ce traict du Psalmiste, le Firmament en terre. Et le Seigneur (dit-il) est l'affermissement de ceux qui le craignent, Firmamentum est Domi-

nus timentibus eum. Psal. 24.

Mais comme le tremblement redoubloit, tous les Habitans sortirent de la ville, attendans dans la campagne, à tous moments le renuersement vniuersel de toute la ville, parmy les cris, & les hurlemens d'vn monde infiny. Enfin aprés tout ce fracas, & ces menaces effroyables, il n'y eut que quelques tours, & quelques maisons abbattuës. Or comme dans vn danger si pressant, le recours principal de tous fut d'inuoquer ardemment saint François Xauier, la creance commune sut que la ville auoit esté garantie de sa ruine par les merites de ce diuin Protecteur.

Quant à l'autre faueur que tous attribuent encore à sa protection, il faut sçauoir que l'année precedente le Roy d'Hidalcan, le plus puissant d'entre les Scigneurs Mahometans de ces Contrées, vint auec vne armée de trois cent mille hommes assieger par terre Goa, dont il tenoit la prise asseurée, à cause d'vne si épouuentable multitude de combattans, à qui il ne croyoit pas possible qu'aucune force humaine peust resister: Mais sa presomption se trouua trompée à sa confusion, & luy frustré de son attente: Carla ville ayant son refuge à S. François Xauier, elle experimenta les effets fauorables de sa main contre cette grande armée, qui perit peu à peu, ayant esté ancantie par diuerses sortes de miseres.

Aside title I verter afternance and i some

## CHAPITRE XIII.

Merueille du tres-Sainct Sacrement, arriuée l'an 1654. au Territoire de Salsete de l'Archeuesché de Goa, & les deuotions publiques qui ont esté faites pour l'honnorer.

Carre merueille ne sera pas vn mediocre enrichissement de cette Relation. Tout ce qui regarde le tres-sainct Sacrement, qui est le Soleil de nos Mysteres, iette de si agreables clartez qu'il excite dans les cœurs tout ensemble, &

le respect, & l'amour.

Le iour qu'arriua cette merueille, fut la Feste de l'Annonciation, le vingt cinquième de Mars. Il semble que le Verbe diuin voulut en ce iour qu'il se sit chair dans les chastes slancs de la saincte Vierge sa Mere, faire reconnoistre par cét éclat de sa toute-puissance, la verité de sa chair en l'Eucharistie. Aussi sainct lean Chrysostome, & plusieurs autres saincts Peres la nomment grauement vne Incarnation renouuellée, ou estenduë.

Mais pour venir aux particularitez de ce miracle; il y a dans le Territoire de Salsete qui est vne Peninsule à trois lieuës de Goa, assez connuë par les histoires des Indes Orientales, & par les Martyres illustres du Pere Rodolfe Aquauiua, & de ses compagnons, vne Paroisse des villages de Benaux, de Canna, & d'Adfully qui sont de la Mission, & de l'administration de nos Peres.

Le Peuple estoit assemblé l'an mille six cent cinquante-quatre, le vingt cinquiéme de Mars pour la grande Messe de la Feste si solennelle de ce iour, dans l'Eglise qui est dédiée à sainct lean Baptiste, & le Curé administroit la saincte Communion à ses Paroissiens, selon l'obligation du Caresme qui est receuë en ce pais.

Entre les autres Communians, voilà que s'approche de la saincte Table vne ieune fille âgée de dix-huict à dix-neuf ans, nommée Ieanne Casta Sudra, qui demeuroit en ce Village de Benaux. Comme elle eut receu la saincte Hostie, elle eut l'audace de porter la main à sa bouche, soit par faute de soy au tres-

sainct

sain & Sacrement, ou par quelque mouuement de superstition, elle la retira dehors auec le bord du linge, dont elle auoit la teste couverte, qui estoit tout vsé, & qu'elle auoit emprunté, faisant du reste dés l'heure même plusieurs actions indecentes, qui donnoient assez de soupçon: comme la conscience troublée se sent piquée de facheuses apprehensions, semper prasumit saua perturbata conscientia Sap. 17. cette miserable creature aprés ce sacrilege commis, se leue brusquement de la saincte Table se tenant enueloppée de son couurechef, & se retire promptement toute effarée au bas de l'Eglise, en intention d'ensortir pendant que le Prestre acheueroit la Messe: Mais ayant trouvé fermées les petites portes, par où passent les femmes, afin de ne pas rencontrer les hommes, elle se iette plus auant dans l'Eglise, demeurant toussours cachée.

Ce fut vne prouidence diuine, que ces petites portes se trouverent alors fermées: car depuis pen le Curé au oit donné cét ordre aux Officiers de l'Eglise, qu'il les fermassent aussi-tost que l'Euangile de la grande Messe seroit acheué,

& qu'eux se tinssent à la grande porte pour empécher qu'aucun ne sortist, iusqu'à ce quel'Office diuin fust entierement accomply, & aussi pour noter ceux qui s'y rendoient trop tard. Or cét ordre ne commença à s'observer que le iour de l'Annonciation, auquel arriva ce miracle.

Cette fille donc ayant esté obligée de se retirer plus auant dans l'Eglise pour auoir trouué cét obstacle, elle se sent subitement saisse d'une grande frayeur, ayant apperceu le sang miraculeux qui couloit de l'Hostie sacré qu'elle portoit dans ce linge, & qui en estoit aussi ensan-

glanté.

Elle se resolut dans cette perplexité d'aller ioindre l'vne de ses parentes appellée Garcia, qui estoit en la même Eglise. Cette semme, & plusieurs autres qui estoient proche d'elle, toutes surprises, & estrayées de la veuë de ce prodige, luy dirent qu'il falloit monstrer cela au Pere qui faisoit alors l'Office de Vicaire. Elles appellent à ce dessein les officiers de l'Eglise, & mettent la Fille au même moment entre les mains de l'Huissier, celuy-cy la mene tout droit à vn Prestre natif du mesme lieu, qui alors entendoit les Confessions. Ce Prestre arreste la sille, & la fait mettre à genoux iusqu'à ce que le Vicaire qui s'alloit retirer de l'Autel, la Messe estant acheuée, sust dépouillé des habits Sacerdotaux.

Comme donc il eût veu le Pere libre, il luy amene cette fille, & la luy presente proche de la Sacristie, luy faisant entendre qu'elle auoit dans ce linge, dont elle estoit couuerte, vne saincte Hostie consacrée, qu'elle auoit voulu emporter de l'Eglise, aprés l'auoir receuë à la Communion. Le Vicaire ouurant à la presence de tous ce linge, y apperceut la saincte Hostie ensanglantée, & qui étoit sur vn grumeau de sang, qui paroissoit vif, frais & vermeil.

A ce premieraspect, il sut frappé d'vne si forte admiration, qu'il ne peût juger sur le champ autre chose, sinon que cét essect estoit miraculeux; mais pour s'en éclaircir auec plus de certitude, il commande à cette sille d'ouurir la bouche. Il la regarde sort exactement, & de reches auec vne bougie allumée la conside-

re de tous costez tres-curieusement; mais il ne reconnoist aucun signe ni soupçon de sang, ny d'autre humeur qui en approchast: il luy trouue plutost la bouche nette & seiche.

Il passe outre aux perquisitions & l'interroge, si elle n'auoit point quelque blesseure ou incommodité en la bouche, ou si elle ne s'estoit point fait quelque égratigneure, d'où il peût sortir du sang. Elle sit réponce à toutes ses demandes que non. Ensin le Pere luy ayant demandé si ce sang n'estoit point d'elle, ou arriué par quelques-vnes des façons préalleguées, & quel sang c'estoit, elle répondit hautement & distinctement en ces termes propres de sa langue naturelle. Par mes paraché ragata; ils veulent dire en nostre langue, sang du Seigneur.

Cét examen fait, le Pere tenant la chose euidemment pour vn effect miraculeux, leue en haut le linge ensanglanté auec beaucoup de respect, & le montre à tout le Peuple. Il prend de là suject de les instruire, disant auec vn sentiment extraordinaire comme Dieu auoit operé cette merueille pour la confusion de l'in-

fidelité de cette fille, & par sa misericorde, pour les fortifier tous en la Foy du mystère tres-haut du tres-saint Sacrement, & que tous devoient considerer & examiner serieusement auec qu'elle preparation ils devoient se presenter à la sainte table. Il adjoûta plusieurs autres choses semblables, qui regardent l'honneur deu

à ce tres-adorable Mystere.

L'exhortation estant finie, il porte ce linge sur le grand Autel, & en coupant tout au tour, où paroissoit ce sang miraculeux, il le prend & le depose dans vne custode, en attendant ce qui en seroit aprés ordonné plus meurement par les Superieurs Ecclesiastiques. Il auertitau plutost de tout ce qui s'estoit passé, le P. Recteur du College de Salsete nommé le P. Michel d'Almeida, qui est aussi Superieur de cette Mission, & tous deux ensemble informent en diligence le P. Hierôme Froes, Prouincial de la Prouince de Goa; Enfin ils addressent vne ample Relation, auec toutes les circonstances du fait au Chapitre de la Cathedrale, le Siege Archiepiscopalestantalors vacquant.

Ce dernier depute de son Corps le 15. Avril, des personnes de vertu & de capacité, pour dresser sur les lieux l'information iuridique, du cas suruenu en cette Eglise de S. Iean Baptiste du village de Benaux. On fit de plus vne information plus ample le 15. May suiuant. En suitte de quoy pour l'importance de la chose, tous les Chanoines, & plusieurs personnes doctes s'estant assemblez, les actes de toutes les informations differentes, & de la deposition des témoins, veus, leus, & examinez, aprés auoir inuoqué le nom de Dieu, ils prononcerent tous, & declarerent que c'estoit vn vray miracle extraordinaire, & que ce sang venoit de la sainte Hostie, sous laquelle estoit contenu le tres-sacré corps de Nôtre Seigneur Iesvs-Christ.

Là dessus fut ordonné, qu'en memoire d'vne si grande merueille, pour la confusion de l'insidelité, & pour la plus grande gloire de N. S. se seroit, le iour de l'Annonciation de Nôtre Dame, vne Procession solemnelle, où seroit portée la saincte Hostie, & le linge ensanglanté miraculeusement, dans vn reliquaire, qu'on feroit faire tout exprés, le plus riche, & le plus magnifique qu'on pourroit.

La publication de cette Sentence, & la declaration de ce miracle, se celebra auec vn applaudissement vniuersel, & auec vne splendeur extraordinaire dans la ville de Goa, le 24. de May, iour de la Pentecoste. Le 28. du mesme mois, cette Publication se fit en la Mission de Salsette, dans la mesme Eglise de S. Iean Baptiste de Benaux, où ce miracle estoit arriué, auec de semblables témoignages de ioye publique. : comme aussi en toutes les paroisses de cette Mission, qui sont au nombre de vinct-cinq, où l'on chanta le Te Deum laudamus, auec le verset Panem de cælo prestitisti eis, & l'oraison, Deus qui nobis sub venerabili Sacramento.

Ce ne fut que le commencement des actions de graces rendues à Dieu: Huick iours entiers furent dediez & employez dans les deuotions establies pour ce su et. Nous les parcourrons succinctement, asin qu'on voye que Dieu du mal d'vn particulier, tire de grands biens pour le Public. Aussi en cette matiere qui regar-

I iiij

de la Foy, S. Gregoire le Grand nous afseure que l'insidelité de S. Thomas, nous
a plus prosité pour la Foy, que ne nous a
seruy la Foy des autres Apostres, qui crurent plus nobis Thoma insidelitas ad sidem, quam sides credentium discipulorum
prosuit, homil. 26. in Euang. Ainsi l'incredulité, ou l'impieté de cette sille, par
ie ne sçay quelle secrette antiperistase,
que la grace ne menage pas moins à ses
auantages, que la nature a rallumé,
& enslammé la Foy & la pieté de tout
ce Peuple enuers le tres-saint Sacrement.

Pour le premier iour, la publication de cette merueille estant faite dans l'Eglise du village de Benaux, tout le Peuple de la paroisse, auec celuy d'une autre paroisse voisine, nommée V vergao, trespopuleuse sortant en procession, & toutes les Confrairies auec leurs Bannieres propres, auec les danses & les branles usitez à la mode du pays dans les solemnitez les plus Religieuses; ensin auec tous les autres appareils, surent à une Chapelle de S. Antoine bastie sur la cime d'une petite colline, qui est proche de l'Eglise de saint

Iean Baptiste, & dont elle dépend. On y auoit posé la saincte Hostie, & le linge miraculeusement ensanglanté dans vne tres-riche Custode. De là on raporta cét Auguste reliquaire en l'Eglise de la parroisse, où le grand Autel estoit magnisiquement paré de force luminaires de tous costez, & de force ornemens pompeux, au milieu desquels, il sut deposé auec vne singuliere déuotion. Aussi-tost la Messe sur chantée à diuers chœurs de musiques, & le Pere Emanuel de Souza y prescha. Et après le disné, les Complies surent chantées auec vne pareille solemnité.

Le second iour & les autres suivans de l'Octaue, les paroisses de cette Mission vinrent à leur tour, trois à trois, ou quatre à quatre, pour celebrer la Feste aux iours qui leurs surent designez, auec leur Confrairies, dans es musiques, qui ne surent en aucun iour moindre de trois chœurs. Au reste les gens-d'armes de ces villages marchoient deuant, en vne belle Ordonnance dans les processions qui se faisoient tous les sours, & où la sainte Relique estoit portée sous le dais. Les encensemens se continuant toussours tant dans

l'Eglise, que par les champs.

Les Predications se firent aussi tous les iours de suite par divers de nos Peres qui auoient esté inuitez à cette sainte celebrité. Le concours du peuple sut tresgrand; car outre les parroisses destinées chaque iour, plusieurs chomerent toute l'octave entiere, assistant à toutes les devotions avec de signalez témoignages de leur Foy, & de leur pieté envers le tressain & Sacrement.

Cette feste fut aussi authorisée par la presence du Vice-Roy Dom Bras de Castro. Il vint de Goa tout exprés accompagné de l'élite de la Noblesse, & d'autres personnes de condition, pour y assister le Dimanche, qui fut le 4. iour de l'Octaue: ce que sit aussi l'Inquisiteur general durant plusieurs iours.

Le fruict de ce miracle a paru visiblement en l'accroissement de la Foy des Chrestiens, & l'on espere qu'il s'étendra à beaucoup d'Insideles qui en ont esté viuement touchez, & se disposent, gagnez par ce diuin attrait, d'embrasser nostre

Sainte Religion.

## CHAPITRE XIV

Les Missionaires partent de Goa, es leur chemin iusques à Macao, ville frontiere de la Chine.

TOS Missionaires qui estoient renus à Goa par la voye d'Ormus, & auoient tenu le chemin de la terre, n'y sejournerent gueres plus de 15. iours: tous les retardemens étoient des tourmens à leur zele, & toute leur diligence leur sembloit negligente, tant ils brûloient de desir de se voir dans l'employ de leurs Missions dans la Chine, & dans la Cochinchine.

Le P. Adrien Grelon, qui du Canada, où il auoit glorieusement trauaillé, aprés la deroute des Hurons, & que la Mission de leur pays sut rompuë, estoit passé aux Indes Orientales, & portoit toûjours entre les autres ce mesme seu de charité, pour la conucrsion des Insideles. Il témoigne

donc en vne lettre qu'il écrit de Goa, le desir qui le pressoit de se rendre auplutost, au terme qui luy estoit écheu pour y trauailler au salut des ames. Vous sçauez (dit-il) le bon-heur, que i'ay d'estre destiné à la Mission de la Cochinchine, où il y a déja neuf martyrs, tous du pays mesme. Priez Dieu que i'en puisse augmenter bien-tost le nombre.

Ce Pere donc & tous ses Compagnons épris d'vne mesme slâme celeste, partent en diligence de Goa, le 3. de Nouembre 1654. en se jettant dans vne Galiote de l'armée que le Vice-Roy des Indes enuoyoit iusques au Cap de Comorin. Leur dessein estoit de courir par terre la coste de Trauancor, iusqu'à Iafanapatan, qui est vn port de l'Isle de Geïlan, puis passer de là à Negapatan, ou à Melia, pour y chercher quelque Vaisseau qui les conduisses au Royaume de Sian, ou de Sion, d'où il leur seroit facile de gagner Macao, partie par terre, & partie par mer.

Ils furent obligez de prendre ces longs & perilleux destours; parce qu'il n'y a plus de Vaisseau qui aille droit de Goa à

141

Malaca, depuis que les Holandois s'estant rendu maistres du détroit de Malaca, tiennent tout le pays & tous les passages, mesme par le chemin qu'ils prenoiet, qui estoit l'vnique, où il y auoit plus de seureté, ils n'éuitoient pas tout à fait le danger de tomber entre leurs mains. Car deux ans auparauant cinq autres de nos Missionaires, faisant le mesme voyage, furent pris par eux, & ils les tenoient encore dans les prisons, les fers aux pieds

Mais pour reprendre leur voyage, & ces suiure à la piste, afin de remarquer par ces lieux ce qu'ilsy ont veu de memorable de Cochin ville celebre dans la Prouince de Malabar, qui appartient aux Portugais, & où nous auons vn College, ils vinrent à Coulan, là ils laisserét le chomin de la mer, pour éuiter le danger des Pyrates Malabarois de nation, & Mores de Religion, qui infectent toute la Coste, depuis Ormus, iusques au Cap de Comorin. Ils se mettent donc survne grande riuiere où ils virent quantité de Crocodiles. Estant arriuez à vn certain endroit où l'eau leur manqua, de sorte qu'ils ne pouuoient plus nauiger, ils furent obligez de louër

vn Elephat qui traîna leur bâteau chargé de leurs hardes iusques sur le bord de

la mer, enuiron à vne lieuë au delà.

C'étoit vne merueille de voir cét animal traîner à belles dents ce fardeau si pesant auec vne facilité nompareille. Ils sejournerent quelques iours à Coulan, qui est vne petite ville des Portugais, où il y a College de nostre Compagnie, estably par S. François Xauier. C'estaux enuirons de ce lieu, où se receüille la plus grande partie du poivre, qui se porte en

Europe.

De Coulan ils passerent à la Coste de Trauancor, qu'ils trauerserent, puis le Cap de Comorin, & en suite la Coste de la Pescherie, logeans tous les soirs dans des residences où il ya des Eglises servies par nos Peres, & ce sont autant de Missions. La plus considerable se nomme Tutacarin, où il y a vn College de la Compagnie. C'estoit vne sensible & bien douce consolation à nos Missionaires de voir qu'en ce voyage ils suivoiet presque pas à pas, le grand S. François Xauier, & qu'ils passoient par les lieux, qu'il a sanctifiez autre sois par son zele,

& où il a conuerty tant de milliers d'Infideles. Ils sentoient mesme ie ne sçay quelle odeur de saincteté, que ce glorieux Apostre y auoit imprimée par ses vesti-

ges dans ses voyages si frequents.

Mais leur ioye redoubloiten considerant ces bons Parauas, ou Pescheurs de perles, pour qui ce grand Saint auoit eu tant de charité, & tant de tendresse, que lors qu'il parloit d'eux, il auoit accoûtumé de les appeller les deuots Parauas. Cette deuotion depuis ce temps-là a jetté dans ce peuple de si profondes racines, qu'elle y fleurit encore auiourd'huy, & y porte des fruicts de si souefve odeur, que nos Missionaires rauis de leur senteur, & des exemples d'vue si parfaite pieté, auouoient qu'ils n'auoient point veu en toute l'Europe de si feruens Chrêtiens, & qui eussent vne foy plus viue, quoy qu'ils soient au milieu d'vne nation Infidele, & sujets à vn Prince Payen.

Comme ils sceurent qu'vn des Peres auoit esté en Hierusalem, & qu'il auoit visité les sains lieux, Ils estoient si consolez de le voir, qu'il ne s'en pouuoient lasser, en sorte qu'il failloit, que pour eui-

Rélation des Missions ter leur rencontre, il s'allast cacher; car ils estoient continuellement aprés luy, & ne cessoient de l'importuner, en luy demandant sa benediction: ensin s'imaginant qu'il sussission pour faire des miracles, d'auoir esté à la Terre-saincte, ils le sollicitoient instamment de visiter leurs

malades, afin de leur rendre la santé.

De Tutacarin ils descendent à l'Isle de Manar, qui est proprement le lieu, où se fait la grande pesche des Perses; de là ils se rendirent à Iafanapatan, c'est vne extremité de l'Isle de Ceïlan du costé du Septentrion, & qui fait vn Royaume se-paré des autres, qui sont dans cette grande Isle, la plus belle au reste, & la plus riche sans contredit, qui soit au monde.

Et pour en dire quelque chose sommairement, elle a en premier lieu les choses necessaires à la vie humaine, comme le ris, & diuerses sortes de fruicts qui s'y recüeillent en abondance tout le long de l'année. Outre celail y a des mines d'or des perles, des pierreries, & des diamans. L'on y voit de plus des montagnes de chrystal, & des forests entieres de canelle.

Mais

Mais sur tout il y a vne prodigieuse quantité d'Elephants beaucoup plus estimez que ceux des autres contrées, & qui par consequent s'y vendent bien cher aux Estrangers, qui viennent de diuers endroits en achepter. Car bien qu'ils soient beaucoup plus petits, que ceux qui se prenent en Afrique & ailleurs, si est-ce qu'ils sont incomparablement plus courageux., & les autres n'osent pas seulement paroistre deuant eux; en sorte que s'il arriue quelquefois qu'ils se rencontrent ensemble, ceux de Ceilan se portent & se tiennent, comme les Roys, & les autres ne manquent point de leur faire hommage, & de leur rendre quelque soumission, comme s'auouans leurs inferieurs. C'est ce que l'experience fait voir tous les iours. Certainement des instincts si contraires en des animaux d'vne mesme espece, sont vn rare prodige, & vn grand secret de la nature. Ce que dit Aristote, que parmy les hommes, il y en a qui sont naiz, les vns pour commander, & les autres pour seruir, ne semble point si merueilleux: car la raison cau-se plus de diuersité, que le seul instinct naturel.

Or comme c'est la destinée, & la nature des choses creés de ne soussirir rien de parfait, cette Islea ses maux messez parmy tant de biens: car il y a force serpens de diuerses façons, & entre autre, il s' y en trouue d'vne certaine espece, qui sont si prodigieusement & gros & longs, qu'ils auallent vn bœuf tout entier, ou vn cerf auec son bois, & aprés l'auoir auallé, ils s'entortillent autour de quelque gros arbre, asin qu'en se serrant contre son tronc étroittement, ils en rompent, & en brisent les os.

Il y a encore vne multitude étrange de Crocodiles d'vne grosseur, & d'vne longueur enorme, qui surprennent sou uent les hommes, & les deuorent. Mesme vn des supplices ordinaires, dont on punit les mal-faicteurs qui ont merité la mort, c'est de les jetter dans vn lac, qui en est tout remply, afin de les faire manger, & ils en sont siauides, que c'est fait d'eux, & qu'ils en sont absorbez en vn clein d'œil.

Le feu de la guerre, qui demeure allumé dans les Indes, entre les Portugais & les Hollandois, est dans cette Isle, & pour cette Isle; les vns & les autres pretendans de s'en rendre les vniques maîtres, principalement à cause de la canelle tres-excellente qui y croist. Les derniers y ont deux forteresses, & les premiers deux autres, & outre cela le Royaume de Iafanapatan, qu'ils ont conquis

enuiron dépuis quarante ans.

Nos Missionaires furent contraincts d'arrester là prés de sept mois, d'autant qu'ils y arriverent en vn temps, où il n'y avoit dans tous le pays aucun vaisseau, qui deust cingler vers la Chine: mais ils n'y furent pas oisifs ny inutiles. Comme il y a beaucoup de Chrestiens espars en divers lieux de la campagne, ils furent distribuez en quelques-vns qui estoient destituez de Curez pour en faire l'Office.

Ils s'appliquerent donc incessamment à apprendre vn peu la langue Malabaroise, qui est la naturelle dup ays, asin de 
pouvoir entendre au moins les Confessions. Le reste des fonctions curiales, qui 
demandoient plus de discours, se faisoit 
aucc l'assistance d'vn Interprete. Aussitost que la Saison le permit, ils prirent 
vne certaine sorte de bâteau, qui se nom-

me là Calamaron, composé de quatre grosses pieces de bois, attachées ensemble, qui est fort incommode: Mais de peur d'estre saisse dans vne barque ordinaire par les Hollandois qui tenoit bloqué, comme l'on disoit, le port, d'où ils deuoient démarer. Ils leur auoit fallu choisir ce bâteau, auec lequel ils se pouuoient couler plus aisement, & échapper aux embuches des ennemis. Il ne laissoit pas d'y auoir du peril: mais il estoit honteux à leur courage, que la malice fist tien de si inaccessible, où leur vertu ne pût atteindre & penetrer. Ils aborderent enfin à Negapatan par cette voye, Dieu, par sa bonté les ayant garantis de toute mauuaise rencontre.

L'air de cette ville semble tres-salutaire aux habitans, & contribuer à la longueur de la vie; En essect on leur dit, que dépuis peu de temps, vn venerable vieillard y estoit decedé, qui a compté de son viuant cent quarante nepueus, descendus de ses enfans, & de ses petits enfans. Il auoit veu S. François Xauier, & mesme se souuenoit d'auoir souuent porté la clochette par les rues allant auec

aux Indes Orientales.

le Sainct, pour assembler le Peuple au Ca-

techisme.

De plus on leur fit voir vne femme natiue de Malaca, d'où elle s'estoit retirée dépuis que les Hollandois l'auoient prise, afin qu'elle peût viure dans la liberté de la Religion Catholique, en laquelle elle auoit esté nourrie depuis son enfance, iusques à l'âge de plus de cent quinze ans. Elle auoit aussi bonne memoire d'auoir veu S. François Xauier, & d'auoir fort souuent assisté aux Catechismes, & aux exhortations qu'il faisoit par les ruës, & dans les places publiques. Sa vie tres-exemplaire monstroit qu'elle auoit bien profité des instructions de ce grand Apostre, puis qu'elle l'auoit toute dediée à la priere, estant tousiours demeurée Vierge: & sa deuotion enuers le tres Auguste Sacrifice de la Messe étoit si ardente, que nonobstant ce grand âge, elle y assistoit presque tous les iours. C'estoit vne merueille de l'ouyr parler des choses de Dieu, & les Peres furent tresconsolez de ses pieux entretiens.

On les mena en ce mesme lieu à vn certain Pagode (c'est vn Temple des

Payens) à l'entrée duquel, il se voit vn Elephant de Pierre, & à ses pieds vn homme couché. Le sujet de cette sigure ajoutée est, qu'vn Hollandois pris de vin & enyuré, s'estant setté prés de cette statuë, il y mourut en dormant. Les Payens creurent, que cét Elephant l'auoit tué en punition de son peché, & en memoire de ce châtiment, ils sirent la statue du Hollandois, qu'ils mirent aux pieds de l'Elephant. La seule lumiere naturelle porte mesme les Idolâtres, à detester l'yvrognesie, & à punir la prophanation dessieux sacrés.

Nos Missionaires ayant là rencontré vn vaisseau Portugais, qui faisoit voile au Royaume de Sion, ou Sian, ils s'embarquerent pour gagner le premier port de ce Royaume, qui se nomme Tauasarin, d'où partie par la riviere, partie par mer, partie aussi par terre, ils se rendirent à Sion, qui est la ville capitale du

mesme Royaume

Ils y seiournerent prés de six mois, ayant esté forcés d'attendre les vaisseaux, qui tous les ans viennent de Macao, & la saison propre pour y passer. Que si ce re-

tardement donnoit de l'impatience à leur zele, elle fut au moins soulagée par les emplois charitables qu'ils exercerent auprés des Portugais qui y sont en grand nombre, & de quelques Holandois Ca-

tholiques.

Sur tout ils s'occuperent au seruice des bons laponois, bannis de leurs païs pour la foy: aussi ces feruents Chrestiens souhaitoient auec passion d'auoir quelqu'vn de nos Peres pour les Sacremens de la Confession & de la Communion, & ils auoient écrit auec instance aux Peres du College de Macao, pour obtenir d'eux ce secours spirituel. Quant à ce qui est de s'y establir, cela ne se pouvoit en aucune manière, dautant que cette Mission appartient à d'autres Religieux.

Cela n'empécha point que pendant le seiour qu'y sirent nos Missionaires, ils ne leur rendissent toute l'assistance possible. Et certes le seruice qu'ils rendoient à ces nobles Confesseurs de I e s v s-Ch r i s t, lesquels pour son amour ont esté exilez de leurs pais, & auoient soussert vne perte generale de tous leurs biens, estoit l'adoucissement des fâcheuses longueurs de

K nij

leurs voyages, qu'on faisoit autre-fois d'ordinaire en six mois de Goa à Macao, tandis que les Portugaistenoient Malaca, pource qu'on suivoit la route toute droite par cette ville. Auiourd'huy que les Holandois sont maistres de ce passage, il est entierement fermé aux Predicateurs de l'Euangile, sous pretexte qu'ils viennent de Goa, & ce leur est vne necessité bien amere de prendre ces longs & hazardeux destours, pour aller à la Chine, & aux autres termes de leurs Missions.

Helas quelle pitié, vn petit gain temporel cause la perte de tant d'ames, qui ont cependant cousté si cher au Fils de Dieu! Il ne les a pas rachétées, ny auec de l'or, ny auec de l'argent, ny auec d'autres choses corruptibles: mais il luy a fallu verser son sang tres-pretieux, & donner iusqu'à sa vie, d'vn prix au reste si inestimable, qu'vn seul de ces moments vaut mieux que la durée eternelle de ce desastreux trasse, qui perd pour des biens de la terre, ou plustost pour des choses de neant, des ames tant prisées, & tant cheriés par ce Seigneur, qui comme dit aux Indes Orientales. 153 la Sagesse, les regarde entre les creatures comme l'objet principal de son amour, Domine qui diligis animas, Cap. 7.

## CHAPITRE XV.

L'arriuée de nos Missionaires à Macao, leur entrée dans la Chine, (†)
l'estat où y est la Religion
Chrestienne.

fi longs, & de si ennuieux voyages, eurent le bon-heur d'en attteindre le terme l'an 1656. & de se voir heureusement rendus à Macao, qui est la ville frontiere de la Chine située dans vne Isle qui appartient aux Portugais, aussi bien que cette ville de méme nom, les Chinois leur ayant permis, il y a plusieurs années, de s'y establir, & de la fortisser.

Ils ne furent pas plustost arriuez, que sans prendre ny repit, ny repos, ils demandent au Superieur l'employ de leur Mission, & poursuiuent d'y estre incessament enuoyez. Aprés les huict ou dix

mille lieuës de chemin, faites par mer, ou par terre, ils paroissent aussi frais, & aussi dispos, que s'ils n'auoient fait qu'vne promenade de diuertissement. En vn mot toute seur demande estoit où il falloit aller, & tout seur desir d'y aller au plustost, & de mettre la main à l'œuure presque deuant que de la voir.

Les Peres du College de Macao ne pouuoient assez admirer, & louer la ferueur d'esprit qu'ils voyoient eclater en leurs chers hostes, & faire vn si excellent concert auec l'ardeur Françoise. Le Pere Iean François Ferari Procureur de la Prouince de la Chine, en rend vn illustre témoignage en ses lettres écrites du 16. Octobre 1657, lesquelles par vne diligence extrême, & presque incroyable, ont esté rendues en treize mois de temps de Macao à Paris: car on les y a reçues au mois de Nouembre de l'an passé.

Il dit donc qu'aïant trouué à Macao ces Peres, tout fraichement arriuez, qui au lieu de prendre le repos dont aprés les fatigues de si penibles chemins, ils auoient aux Indes Orientales.

tout à fait besoing, ils ne respiroient que l'employ de leurs Missions, sans pouuoir souffrir aucun delay, & que leur instance à les pourchasser sut si grande, qu'il sut contrain de quitter toute autre occupation, asin de satisfaire à leurs embrazés desirs, & de vaquer à leur donner leurs departements aux lieux diuers de la Chine, selon les plus vrgentes necessités.

Mais quel que puisse estre leur zele, il faut deuant que de les voir distribuez par les Prouinces de ce vaste Royaume, nous nous arrestions vn peu pour representer l'estat où se trouve la Chine, soit pour le gouvernement, ou pour la Re-

ligion.

Quant au premier, ie diray en peu de mots ce qui se sçait de plusieurs Lettres, que le Tartare est maistre absolu de la Chine, à vne ou deux Prouinces prés. L'on n'auoit point eu iusqu'àlors de nou-uelles de ce qu'estoit deuenu le Roy. Cette conqueste si prodigieuse ne s'est point passée sans des massacres presque incroyables. Le pillage de Pequin, qui est la ville capitale de cét Empire, comme

aussi des Sepulchres des Roys, & de leurs Palais, où il y auoit des richesses pardessus toute estime, a esté de mille sept cent chariots chargez d'or & d'argent, de piereries, & d'autres meubles tres-precieux. Le Conquerant domine auiourd'huy paisiblement par tout. Il a tousiours de grosses troupes sur pied, dont les vnes sont en garnison dans les grandes villes pour les tenir en bride, & les autres par la campagne, pour dissiper tous les complots, & toutes les intelligences contraires à cette domination nouvelle.

La reuolution de cét Estat, quoyque prodigieuse, à cause de l'estenduë tres-grande de ce Royaume, n'est pas toute-fois nouuelle. L'on dit qu'il y a deux cens ans qu'il y en arriua vne semblable, & que les Roys qui possedoient cette couronne, estoient issus d'vn autre Seigneur Tartare, qui alors l'auoit conquise. Si les Annales qu'on promet de cét Empire, se produisent au iour, on y verra d'estranges vicissitudes, & d'estonnantes peripeties dont il a esté dans les siecles passez, à diuerses reprises, & attaqué,

aux Indes Orientales. x57

renuersé, & bouleuersé. Ce sera vn riche thresor de l'antiquité, qui sera d'autant plus recherché des esprits curieux de l'histoire, qu'il a esté moins connu ius-

qu'à cette heure.

Mais pour ce qui regarde l'estat de la Religion Chrestienne dans la Chine, il y auoit sujet d'apprehender qu'elle se vit ruinée, & ancantie parmy les esfroyables confusions de ces longues guerres, sur tout les vainqueurs, luy estans opposez

& faisant profession du Paganisme.

La divine providence en a disposé autrement contre toutes les apparences humaines. Les desseins de la misericorde, qu'elle a pour ce peuple dans l'agiliation, & le renuersement general de toutes les choses temporelles, sont demeurez fermes, & ont triomphé de l'inconstance de la fortune qui a exercé icy vne tyrannie si cruelle sur toutes les grandeurs humaines.

Ce n'est pas que les Predicateurs de l'Euangile n'ayent eu leur part du Calice de cette affliction vniuerselle: car ils y ont souffert toutes les incomoditez imaginables de la diserte, de la

158

faim, & du banissement, les vns ayant esté dépouillez de tout ce qu'ils auoient, les autres pris, & percez de playes, quelques-vns mêmes massacrez: Mais aprés tout la main de Dieu a paru visible en la conservation du Christianisme, au milieu d'vne Nation ennemie, farouche de son naturel, & insolente par ses victoires.

Ie displus, bien loing que la Religion ayt rien perdu en vn temps, où l'on la tenoit toute perdue, elle semble y auoit gagné sur tout en deux choses, dont la premiere est que le Tartare donne à tout le monde la liberté de l'embrasser, & à nos Peres tout pouuoir de l'annoncer, & l'autre qu'on espere que Dieu se seruira de cette occasion pour la conversion des mémes Tartares. Ce seroit l'accomplissement de l'Oracle d'Isaie, Erunt capientes eos, qui se ceperant, & subiicient exactores suos, Ils prendront ceux qui les auoient pris, & ils assuiettiront leurs Conquerans, si ce bon-heur arrivoit aux Tarrares, aprésauoir mis ces peuples sous le tribut, il leur seroit meilleur d'estre vaincus par la croix, que d'auoir vaincu par le fer, & ils acqueroient plus

d'honneur de se soûmettre au seruice de lesus-Christ, que de iouir de la domination de la Chine.

## CHAPITRE XVI.

Les nouuelles escrites de la Chine l'an 1657, le 16 d'Octobre , qui regardent les particularités de la R eligion Chrestienne.

Le remercier les personnes d'honneur, & de vertu, qui par leurs liberalitez, ont pour ueu les Missions de la Chino, & des autres lieux circonuoisins, de si excellents Missionaires choisis de nos Prouinces de France, & qui conseruent les mêmes bonnes volontés, pour les faire subsissions le trauail de leurs employs Apossociations.

La premiere chose qu'il asseure, est que l'Empereur des Tartares qui est maintenant Seigneur Souuerain & paisible de la Chine, se monstre tres-fauorable à la Religion Catholique. La preuue qu'il en a donnée depuis peu, est authentique, & a fait vn grand éclat. C'est vn Edit public, qu'il a voulu estre proclamé de sa part par tous les lieux de cét Empire, par lequel il ordonne, qu'on ne fasse aucun obstacle à tous ceux qui voudront dresser des Temples au vray Dieu. C'est vne marque de l'estime que ce Prince, tout Payen qu'il est, fait de la Religion Chrestienne, & en suite il donne pleine liberté à tous ses sujets dela professer.

La publication de cét Edit est sans doute comme vne grande porte ouverte à nostre saince Religion: Car comme ces peuples en connoissent l'excellence & la dignité; parce que leurs esprits naturellement bien faits, & assez éclairez, sont capables d'en iuger, les milliers innombrables l'embrasseroien t sans aucune resistance, ou plustost de leur plein gré, à la faueur d'vne si belle occasion, s'il y auoit des Ouuriers Euangeliques, autant qu'il seroit necessaire pour vne moisson si plantureuse.

Et cependant, ce qui est bien sensible à dire, à peine y a t-il vingt-cinq Prestres

en comptant

en comptant même les Peres qui sont fraischement arrivez, & ne font quo d'entrer dans le champ de cet Empire si vaste, qu'il est ostendu au delà de tout ce qu'on en peut croire, ainsi que le Pere Ferari qui l'a veu de ses yeux, & presque mesuré de ses pas, y ayant trauaillé plusieurs années, l'asseure, comme témoin oculaire. Il passe iusqueslà, que de dire que la Chine seule seroit capable de tous les Ouuriers de la Compagnie, & cecy ne paroistra point sentir l'exaggeration, à qui pensera d'vn costé à sa grandeur, qui ne cede en rien à toutel'Europe, d'autre part au peuple innombrable qu'elle contient, surpassant sans difficulté en nombre de ses Habitans tout autre endroit de l'Vniuers.

Mais parcourons quelques - vnes de ses Prouinces pour nous instruire plus distinctement de l'estat du Christianisme: il y en a qui sont toutes entieres destituées de Predicateurs depuis long temps, auec vn notable preiudice de la Religion qui y storissoit auparauant merueilleusement. La Prouince nommée Honaa, se presente la premiere. Le Pere Rodrigués

Figueredo, personnage tout Apostolicque, la cultiuoit, & il y auoit grandnombre de Chrestiens tres-feruents. Il y a quatorze ans qu'il y est decedé, sans qu'aucun ayt pû estre subrogé à son ministère. Depuis la Capitale de céte Prouincedans le desordre des guerres, aprés auoir soutenu le siege d'une armée tres puissante, qui estoit un ramas de trois, ou quatre cent mille brigands, a esté ensin prise & ruinée, & ce qui est plus deplorable, le troupeau des Fideles dissipé sans Pasteur, & sans conduite.

Deux de nos Peres ont esté cruellemet massacrez dans la Prouince de Kiemsi par des soldats Tartares, lorsque ces
Conquerans poursuiuoient, les armes au poing, vn celebre Chef de guerre Chinois de Nation, qui s'estant soumis premierement à leures forces, en auoit aprés secoué le ioug, & s'estoit cantonné dans la Capitale de cette Prouince, ville forte, & bien pourueuë de toutes munitions de guerre, & de bouche: Mais que les Tartares emporterent ensin par assaut.
Et là aussi tous les Chrestiens, parmy les violences du sac de leur Patrie, sont de-

meurez à l'abandon, sans aucun secours

pour leurs ames.

Le Pere Michel Vvalta Bauarois, est mort en la Prouince de Xansi, d'vne blessure reçeuë au bras droict, par des Bandouliers, qui rodans la campagne impunément, dans la licence des armes, le prirent allant assister des Chrestiens, & de rage qu'ils conçeurent de ce qu'il ne leur donnoit pas l'argent qu'ils luy demandoient, parce qu'il n'en auoit point, ils le traisterent auec des inhumanitez horribles, en le laissant blessé à mort.

Le Pere Augustin Tedeschini Italien, qui auoit le soing d'vne autre grande Prouince, surpris dans vn vaisseau, comme il courroit aux necessitez de son peuple, & saiss par des Pyrates, qui dans cette même confusion, écumoient la mer, y a esté brussé impitoyablement par ces Barbares.

La Residence que nostre Compagnie auoit en la prouince de Huquam a esté enuahie par vn voleur tres-cruel, pillée, & ruinée, en sorte que le Pere qui l'administroit, a esté contrainet de l'aban164 Relation des Missions

donner. Ce même voleur qui renoit les grands chemins obsedez, auoit apprehendé deux autres Peres qui assistionent les Chrestiens de la Prouince de Suchuen &-les entraînoit auec violence pour leur oster la vie: Mais Dieu ayant permis qu'il tombast luy-même entre les mains des Tartares, qui le tuerent sur la place, ces Peres surent mis en liberté, & s'estant rendus à Peckin, obtinrent de l'Empereur nouueau des maisons commodes,

pour y bastir vne nouuelle Eglise.

Dans toutes ces Prouinces desolées, & dépourueuës de toute assistance spirituelle, il y a ençore grand nombre de Chrestiens, particulierement en celle de Kiamsi. Ils desirent ardemment un Prestre, & soûpirent continuellement aprés les Sacrements. Paruult petierunt panem, & non crat, qui frangeret eis. Peut-on dire en lamentant l'infortune de cette Eglise? Ces bons Neophytes crient sans cesse aprés le pain des Anges, & il ne se trouue aucun qui le leur distribue. Dans cette faim qu'ils souffrent, toute leur douleur parmy tant de mal-heurs, dont ils sont accablez, est d'estre priuez de cét ali-

ment, qui seul les pourroit renforcer, & maintenir dans leurs afflictions, vnus est nobis dolor hac esca privari disent-ils. Et aprés tout on n'a pû leur donner vn Prestre depuis plusieurs années, à cause du petit nombre qui reste maintenant. Pourcet te raison les Peressont obligez d'estre seuls en des Residences éloignées de cent, ou de deux cent lieuës, les vnes des autres, & de se priver de la consolation d'auoir aucc eux vn compagnon, quelque grande qu'elle soit, & même souvent necessaire dans mille sortes d'incommodités, & de sâcheries attachées à ces penibles sonctions.

La Prouince de Xantam, estoit écheuë au Pere Ferari, dont i'ay desia parlé; elle n'est pas des plus spacieuses, si est ce qu'elle a de largeur du Leuant au Couchant six vingt lieuës, & plus de cent du Nort au Midy Il y a trauaillé seul treize ans entiers pendant les troubles derniers, dans vne disete extrême de toutes choses, où la guerre a reduit ce Royaume, auparauant si riche, & si abondant de tous biens, & parmy des voyages continuels; Dieu du reste be-

L iij

nissant ses trauaux de fruicts tres - abondans: car il estoit appellé de tous costez à l'enuy, dautant que les mal-heurs qui inondoient ces terres, réueilloient, ce semble, les hommes, à penser tout de bon au Ciel, & à s'en procurer les biens par vne serieuse conversion à nostre soy, torsque ceux de la terre leur estoiet rauis.

La Prouince de Xansi, qui de l'Occident à l'Orient, enferme plus de deux cent lieuës dans son tour, a eu deux Peres, qui bien qu'ils se montrassent forts, & infatigables, comme deux Atlas chargez de ce grand monde, estoient neantmoins contraincts d'auouer, qu'ils succomboient sous le fardeau de ces fati-

gues si longues & si pesantes.

L'vn d'entre eux est vn personnage d'éminente saincteté, & d'vne rare addresse pour la conversion des Idolâtres. Il se nomme le Pere Estienne Faber, François de Nation, qui depuis peu a esté éleué au gouvernement de cette Vice Province de la Chine, avec vne approbation vniverselle de tous les Nostres. Or ce grand Missionaire cultivoit suy seul, & assistoit les Chrestiens des amples

aux Indes Orientales. 167

Contrées qui regardent l'Occident de cette Prouince. Certainement les trauaux qu'il luy failloit essuyer iour & nuit & sans relâche, surpassoient tout ce qu'on en peut croire: Mais les fruicts qu'il en recueilloit, égalant ses peines, luy inspiroient de iour à autre de nouuelles forces, & vn nouncau courage: Aussi la voix de son cœur, & de son zele, estoit celle de sain& François Xauier, Amplius Domine, amplius, Encore plus Seigneur, encore plus. Et de vray la charité, sur tout si elle est heureuse en ses entreprises, ne sçait point garder de mesure.

Le Pere Ignace Acosta Portugais, qui demeure dans la Capitale de cét Empire, porte luy scul la charge de cette Prouince fort estenduë; c'est pourquoy il est obligé de faire des excursions frequentes par les villes voisines, afin d'administrer les Sacrements aux Chrestiens dispersez de costé & d'autre. Aussi quoy que son zele seconde son cœur tres-genereux, enfin se sentant chargé audessus deses forces, il crie au secours par toutes.

ses Lettres.

La Prouince de Haa Kim, qui entre les plus grandes n'est pas la moindre, est tombée au partage du Pere François Brancati, Sicilien, il y a dressé tout recemment depuis l'Edit de l'Empereur, publié, comme il est à croire, plus de quatre - vinct dix nouuelles Eglises, & luy seul a la conduite de quarante mille Chrestiens, qui sont épars decà, & de là en diuers lieux de cette Prouince. Aussi est-ce vn personage, qui tout seul en vault plusieurs, & qui pour sa vertu, & pour son zele, ne se peut assez louer, ny estimer.

Mais si la grandeur de la besogne, & le petit nombre des Ouuriers, sont des actraits bien charmants pour gagner des cœurs, touchez de l'amour de N.S. & qui luy sont vnis en l'affection si ardente qu'il a pour les ames, que S. Pierre l'en nomme le Pasteur, & l'Euéque, Pastorem, & Episcoporum animarum. Pour les gagner (dif ie) & pour les attirer du fond de l'Europe à cette glorieuse lice, la qualité des Chrestiens qui composent cette Eglise naissante, ne les toucher a pas moins: car leur vertu est tout à faiç

attrayante, ainsi qu'il se verra par ce peu

que l'en diray.

Les Peres qui viuuent parmy eux, & qui sont spectateurs de leurs actions, en sont si rauis, qu'ils n'ont point d'expressions assez illustres pour l'expliquer, & asseurent en termes exprés, que pour la pureté de leurs mœurs, ils ne paroissent pas des Chrestiens du commun: mais des Religieux les plus reglez, & les plus mortisez. Ils ne suyent pas seulement les plus griefues sautes, ils ont même horreur des moindres, & pour s'en garantir, il n'y a point de rigueur, ny d'austerité, qu'ils ne pratiquent volontiers.

Les mortifications continuelles, sont leurs exercices ordinaires, & ils sont leurs plus cheres delices de l'vsage des plus aspres penitences. Ce qui rehausse cette merueille, & en quoy reluit auec plus d'éclat l'ardeur qui anime ces nou-ueaux Chrestiens à l'amour de la croix de les seunes silles, tout fragile & soible que soit leur sexe, ne se laissent pas surmonter par les hommes, en l'exercice

Relation des Missions des plus hautes vertus du Christianisme? La Croix de Iesus - Christ est leur vie, & leur vnique inclination. L'experience découure tous les jours que la Iubricité, & l'auarice, les femmes & l'argent, sont les deux Diuinitez, ou pour mieux dire les doux Demons des Chinois. Ce sont aussi les deux principaux empeschemens qui les destournent d'embrasser nostre sain&e Loy: C'est comme vn miracle visible & journalier, qu'aussi-tost qu'ils l'ont goustée, & ont succé ce premier laiet Rationabile, & sine dolo, le nomme sain & Pierre, le lai & spirituel & pur de la doctrine celeste, ils se sentent changez en d'autres hommes, dépouillent ces vices, quoy qu'inueterez, & comme entez dans le naturel du pais, & se reuestent des affections du Ciel, & de la pureté du Christianisme.

Ce qui fait que nos Peres rendent auec verité ce témoignage à la vertu de ces Chrestiens c'estqu'ils les voyent chez eux en de certaines occasions de voyages, qu'ils sont obligez de faire de fois à d'autres: car comme allors on les reçoit par hospitalitéchez nous, nos Peres sont ray

fauis en observant leur modestie, leur pieté: & même ils se sentent couuerts de confusion de voir des Idolatres, qui ne sont que comme dans l'enfance, & dans le bas âge de la vie Chrestienne, aller à si grands pas à la perfe-Aion, & laisser bien loin d'eux, ceux qui dés leur naissance sont entrez dans la carriere, & qui la courent depuis tant d'années. Iene puis dissimuler vne chose que ie ne touche neantmoins qu'auec regret, comme vne playe, qu'il est honteux & facheux à vn cœur genereux de découurir. Il est à craindre que l'esperance de la moisson se montrant à cette heure si belle, cét Empire estant aussi dans de si auantageuses dispositions pour receuoir nostre saincte Foy, puisque les Puissans de la terre, s'ils ne le commandent, au moins ils y inuitent les Chinois par leurs fauorables Edits; Il est dif je à craindre que le besoing d'Ouuriers, causé par la disette extrême de la Mission & cette disette suiuie des rauages de la guerre, n'arrestent tous ces grands biens, & ne frustrent l'attente de ces magnifiques accroissements de la Religion.

Pour ce qui est de la disette de la Mission, ce qui la rend plus intolerable, c'est que le prix de toutes choses est crû à vn point, qui à peine se peut criore depuis le desordre des armées qui ont mis à seu & à sang les Villes, les Campagnes, & les Prouinces entieres, & dans cette licence qui l'accompagne, a consumé vn bien infini, & destruit les moyens de le reparer si-tost.

Il faisoit auparauant bon viure dans la Chine, & l'abondance de toutes les choses necessaires à la vie, y regnoit: Maintenant la cherté y est vuluerselle, & la pauureté accable les maisons les

plus aisées.

On doit adiouster vn autre mal-heur qui augmente cetté disette, comme si l'esprit malin vouloit renuerser de sond en comble cetté Mission, qu'il préuoit par ces commencements si heureux, luy deuoir arracher tant d'ames, qu'il auoit dessa comme deuorées par l'esperance, & par le desir de les perdre. Il semble dis-je que ce mal-heureux esprit, non moins second en inuentions peruerses, que puissant à les executer, déploye, &

toutes ses ruses, & tous ses efforts, asin de reduire à neant ce qu'elle pouvoit avoir de fonds assigné à l'entretien des Missionaires. Ce fonds n'est point en terre: car Macao où il est assis, n'a aucun fonds de terre que les ondes de la mer. Il ne consiste qu'en quelque somme de deniers constituez en rente. Or il est arrivé depuis peu coup sur coup, tant de naufrages sur mer, que la plus part de ce fonds se trouve absorbé dans ces pertes.

Aussi il y a des Missionaires qui ont passé les neuf & les dix ans, sans tirer de ce fonds aucun subside parmy leurs continuelles fatigues, d'autres n'ont vécu les douze ans entiers dans ces penibles emplois, que d'herbes, & d'vne sorte de miler, plus menu que celuy d'Europe, qui est vne fort chetiue nouriture, & ce par pure necessité, si ce n'est qu'ils faisoient de cette necessité vertu. Pour la chair, ou du vin, des œufs mémes, ou du poisson, qui sont icy les aliments des plus pauures, à causé qu'ils y sont en grande abondance, ils n'en n'ont point veu, excepté peut-estre quelques Festes plus solennelles, qu'on leur fai-

soit quelque aumône: Et cependant dans se ieusne de toute l'année, & dans co Caréme perpetuel, il leur falloit trauailler iour & nuit à l'administration des Sacrements, courrir de costez & d'autres en diuerses villes, ou bourgades éloignées, pour assister les Chrestiens qui y sont dispersez: ensin leur rendre en la santé, en la maladie, en la prosperité, dont à peine quelque petit rayon a t'-il luit icy depuis plusieurs années, & en l'aduersité que la guerre y a fait dominer sans cesse, en toutes les aduersitez les plus cruelles, de renuersemens de maisons, d'incendies, d'emprisonnement, de captiuité, de massacres d'amis, de Domestiques, d'Enfans, de Peres, de Meres, de Femmes & de Maris, au milieu de mille autres miseres, leur rendre, dis-je, parmy tous ces objets d'affliction, les essistances de bons Pasteurs, qui exposoient leur vie à toutes rencontres, & plusieurs fois en vn iour pour leur trou-

Aprés tout, ie ne dois pas taire que cette Mission dans les angoisses qu'elle soustre pour les causes maintenant de-

duites, commence toutesfois à respirer par le premier essay qu'elle experimente de la liberalité de tant de personnes illustres en naissance & en vertu, dont elle a receu vn soulagement si notable par les excellents Missionaires qui luy ont esté enuoyez de nostre France, & d'ailleurs.

Mais comme les œuures de Dieu sont parsaites, Persetta Dei sunt opera, dit Moyse, tant celles qu'il fait luy seul immediatement, que celles qu'il produit par le moyen des causes qu'il daigne associer à ses actions, la même Mission qui en ces temps derniers est l'vne des plus dignes œuures de la misericorde de Dieu, ose se presonnes vertueuses, luy sera vne pleine resource dans ses miseres, & vn riche sonds, d'où tirant dequoy subsister, elle remplira l'Eglise de Payens conuertis, & le Ciel de Predestinez Sauuez.

Enfin ces nobles cœurs, qui pretendent au titre de Sauueur des hommes le plus glorieux qui soit entre tous les eloges d'honneur, Ascendent saluatores in

montem Sion, comme Dieu parle par vn Prophete, se peuuent glorisier pour parler auec l'Apostre, en N. S. de ce qu'ils l'imitent en l'action, qui est au sentiment de sainct Denis, la premiere entre toutes les diuines, à sçauoir au salut des ames. Iesus - Christ l'appelle aussi son œuure, & sa nourriture, dit sain & Iean Chrysostome, & certes luy qui n'a point donné son sang pour la creation du Ciel & de la terre, l'a donné pour la redemption des ames; que peut donc refuser vue ame vrayement éprise de son amour pour auancer le salut des ames: & puis s'il s'agit du propre interest, contribuer à la conuersion du prochain. C'est felon sainct Iacques sauuer son ame propre, & meriter la remission de ses pechez, Qui conuerti fecerit peccatorem ab errore via sue saluabit animam suam, commo tourne Bede, & cooperiet muliitudinem peccatorum. Le Syriac adiouste Saorum, & couurira par vne œuure si charitable la multitude de ses pechez.

## CHAPITRE XVII.

Les Missionaires sont partagez dans les lieux de leurs emplois.

D Est e pour l'accomplissement de Cette Relation, de conduire, ou plustost de voir nos Missionaires dans le champ, pour ainsi dire de bataille, & dans le trauail, Funes mihi ceciderunt in praclaris, disent leurs cœurs zelez qui parlent bien plus haut que la langue: aussi s'entendent-ils de plus loing & il me semble que ie les entends de la distance de dix mille lieuës qu'il y a d'icy à la Chine, se feliciter eux-mémes de leurs emplois, & dire. Le sort est tombé pour moy dans vn beau champ: Etenim hereditas mea pralara est mihi. Ce partage qui me vient de l'ordre du Ciel, m'est vn Paradis delicieux, où Dieu m'a mis pour le cultiuer, & pour le garder.

Les premiers qui ont esté enuoyez du College de Macao, aprés peu de iours de repos dans les Missions, furent des 178 Relation des Missions

Peres de grand merite, comme d'abord leur vertu & leur capacité les fit reconnoistre; ainsi que le mande le Pere Ferari dans ses lettres. Le Pere Iacques le Faure estoit le Chef, puis le Pere Edmon Auger, & le Pere Nicolas Motel. Leur departement sut Pequin, la ville capitale de cét Empire, auec la grande Pro-uince qui en dépend immediatement.

Dans leur voyage, qui fut remply de fatigues, leur patience fut exercée de deux accidens bien rudes. Le premier fut la mort du Pere Nicolas Motel, l'vn de leurs compagnons. Vne violente fievre le saisit tout d'vn coup, & dans le manquement de tous remedes, l'enleua presque deuant qu'il sentist son mal & qu'on peût le secourir. Sa perte leur fut tres-sensible pour l'excellence d'vn tel Ouurier qui valoit beaucoup, & pour la necessité d'vn secours si necessaire. Son bonheur a esté d'auoir trouué la recompense du trauail, dés l'entrée de la carriere. Il est à croire que parmy les delices du Ciel qui l'a raui si tost, il ne contribuëra pas moins par ses prieres au bien de cette Mission, que ses Compagnons s'euertuëront de l'auancer par leuss trauaux.

L'autre accident qui pensa estouffer dans le berceau toutes ces belles esperances, tomba sur le Pere Iaques le Faure. Comme il poursuiuoit auec la compagnie qui luy restoit son chemin vers Pequin, ils donnét malheureusement dans vne bande de Brigands Tartares, quiles attaquerent & les saisirent. L'yn d'entre eux décharge troix grands coups de cimeterre sur la teste, sur les épaules, & sur les bras du Pere, auec telle furie, qu'il le iette par terre à demy mort, & la cruauté de ce brutal qui se deuoit esteindre dans le sangoù il voyoit nager ce pauure Estranger estendu à ses pieds, s'enflamma tellement à ce spectacle de pitié, qu'il cut la main leuée pour luy passer son épée au trauers du corps, & il l'eust fait, si vn ieune homme Chinois Chrestien, qui leur seruoit de guide, ne se fust ietté entre-deux se presentant pour receuoir le coup, & priant ce voleur, qu'il le tuast plustost que ces hommes qu'on auoit confiés à sa foy. Enfin ces Brigands de la cruauté passant à la rapine, se lancent sur ce qu'ils auoient, & leur

180 Relation des Missions

enleuent tout sans leur laisser que des

blessures, & de la pauureté.

L'on attendoit à tout moment la mort du Pere le Faure; & c'est merueille comme il en a pû échaper, la misericorde de Dieu dans cette extréme necessité a esté l'vnique baume, non seulement qui a gueri ses playes toutes iugées mortelles: mais qui en peu de temps luy rendit sa premiere vigueur, pour continuer son voyage, & pour en atteindre le terme. Il y est arriué heureusement: ces premieres épreuues, n'ont serui qu'à aiguiser son courage, & ce premier sang n'a serui qu'à échauffer dauantage son zele, pour entrer dans le combat auec plus d'ardeur: De cetero, peut-il dire auec l'Apostre, nen o mihi molestus sit, ego enim stigmata Domini Iesu in corpore meo porto. Que nulle personne, ny quoy que ce soit ne pense estre capable de m'effrayer: car ie porte sur mon corps les stigmates de Nostre Seigneur Iesus - Christ. De son costé elle sont des armes qui me dessendent contre toutes les frayeurs; & du mien, des asseurances de ma resolution de mourrir pour son seruice. La charité se

montre si partiale pour les cœurs genereux, tel qu'est celuy de ce Pere, qu'elle tourne à leur aduantage, tous les obsta-

cles qui leur arriuent.

Mais pour nous remettre à la suitte des autres Missionaires. Le Pere Claude & Iacques Motel, freres du desfunct, le Pere Louys Gobert, tous trois François, & le Pere Gonsalue de Oliveria Portugais, ayant trouvé la porte fermée de la Mission, où ils auoient esté destinez dés l'Europe (c'est le Iapon, comme ie le coniecture de ce que ie diray cy-aprés) ils ont souhaitté d'estre employez à celle de la Chine, & l'ont obtenu du Pere Visiteur, qui les a dépechez aux lieux les plus abandonnez de secours.

Ils seront suiuis aussi-tost de deux autres Peres. L'vn est le Pere George Keinen Anglois, qui sera incontinent de retour des Isles Philippines, où vn grand vaisseau Anglois l'a mené pour expedier quelque affaire: l'autre est le Pere Iean Dominique Gabiani Italien, qui ayant esté arresté par vne griefue maladie à l'Isle de Macassar, ensin aprés vne parfaite guerison, est abordé à Macao au mois de Iuillet 1657. & y apprend à fond, les lettres Chinoises, qui font la grandescience de ce pays, & dont la connoissance sert beaucoup aux Pre-

dicateurs de l'Euangile.

Ce Pere, & le Pere Dominique Fusiti, aussi Italien, qui ont seiourné ensemble vne année entiere à Paris en nostre College de Clermont, où ils attendoient la commodité de passer en Portugal, & de là aux Indes, ont porté par tous les lieux de leur voyage, & iusqu'à la Chine, l'eloge de la charité religieuse, auec laquelle ils ont esté receus & traitez en France, & ne peuuent assez la loüer: Mais certes le bon exemple qu'ils y ont donné, meriteroit bien vne loüange reciproque: ils l'ont toute entiere deuant Dieu, où elle est plus estimable, & plus asseurée.

Le Pere François Baudet, auec le Pere Fusiti, se sont embarquez pour Camboia au commencement de la même année, afin de tenter le passage de la Cochinchine, par l'entrée qui se pourra presenter. Ils auoient gagné ce premier poste dés les premiers iours; mais pour aux Indes Orientales. 183

l'autre, ils ne voyoient encore rien d'asseuré sur la sin de Iuin. Et cependant cette Mission demande du secours,

comme nous le verrons aprés.

Le P. Iean Forget, & le P. Adrien Grelon, ont si ardamment pour suiui l'exercice de la Mission, que pour les contenter, on les a enuoyez à Hainam, Isle de la Chine: Mais qui est du ressort de la Prouince du Iapon, à cause de son voisi-

nage.

Les autres Peres, venus de France, attendent la saison propre pour se rendre au plustost à leur Mission, & cependant ils s'y disposent par l'estude des langues, dont la connoissance sert de clef à ouurir le chemin à tous les employs Apostoliques ! Helas si le don des langues se renouuelloit pour ces dignes Ouuriers qui ne demandent non pas combien il y a d'ennemis à vaincre à Iesus-Christ: mais où ils sont: & qui vont aueuglément en gens qui cherchent des ames à sauuer, à quelque prix que ce soit, ce seroit bien de la peine, & du temps épargné à leur zele: mais ce don est à Dieu, &ill'a donné à son Eglise, quand

M iiij

Relation des Missions il l'a iugé bon, & il ne le donne pas maintenant, parce qu'il iuge meilleur de ne le donner plus, hors de quelques occasions rares.

## CHAPITRE XVIII.

L'estat de la Religion Chrestienne dans les Royaumes du Iapon, de la Cochinchine, de l'Ethiopie, & du Tunquin.

Relations ne seroit pas pleinement satisfait de celle-cy, & il n'en sentiroit pas sa soif esteinte, si l'on n'aioûtoit quelque chose de ces Royaumes, dont il s'est fait si frequente & si ample mention dans les autres precedentes. Ie mettray donc icy ce que i'en ay pû apprendre de diuerses Lettres écrites en diferentes années, comme ie le specifieray.

Pour ce qui est du Iapon, les Lettres de Goa de l'an 1654, mandent qu'il est fermé aux Predicateurs de l'Euangile; les Portugais neantmoins esperoient mieux, depuis qu'ils sceurent la mort de l'Empereur de Toxogunsama, grand persecuteur des Chrestiens, & qu'ils pourroient restablir le commerce auec cette Nation, & par méme moyen y enuoyer des Ou-

uriers Apostoliques.

A la verité depuis la mort de cét Empereur, la violence de la persecution a cessé en quelque façon, & on ne pour-suit plus les Chrestiens par la voye des supplices, & des rigueurs: mais par des plaisirs, & des delices, comme autrefois dans les temps de l'Eglise primitiue, les Princes Idolatres ne reussissant pas à exterminer les Fideles par les tortures, y employerent aprés les voluptés.

Il n'y a plus que deux de nos Peres qui restent dans ce Royaume, ils sont en prison depuis long temps, & leur constance est continuellement éprouuée par ces artifices, vrayement diaboliques, beaucoup plus rudes, & plus dangereux que les tourments du feu, de l'eau, & que tous les autres dont ils ont fait tant de Martyrs. Nostre Compagnie pour sa part y compte vne centaine entiere de sesenfans. Ainsi ces deux Peres dans les prisons souffrent vn continuel Martyre, n'estant seruis que par des semmes esfrontées, dont la nudité indecente est à leurs yeux, & à leur cœur vn traict, ou plustost vne trousse de traits de seu, Tela ignea nequissimi; Selon la parole de l'Apostre, décochez par l'esprit tres-malin. Aussi apprenons nous que c'est vn malheureux Apostat de la soy qui a enseigné aux Iaponois cette inuention infernale pour tourmenter & pour peruertir, s'ils peuuent, les Predicateurs de l'Euangile.

Mais aprés tout Dieu qui a conserué au milieu des flames de la fournaise de Babylone ces trois ieunes Seigneurs sans aucune lesion, a daigné preseruer ces deux Martyrs déja deux ans entiers parmy ces seux de l'Enfer de la subricité dans l'integrité parfaite, & son Ange, comme la saincte Iudith disoit de soyméme, lorsqu'elle retourna victorieuse de l'infame Holoserne; Non permittet eos coniquinari, sed sine pollutione peccati reuocabit eos gaudentes in victoria sua é in euasione eorum. Il ne soussiria point qu'ils soient souïllez: mais il les fera sortir du combat purs, parce qu'ils y sont entrés

ioyeux de sa victoire, & de leur euasion

glorieuse.

D'autres lettres du troisième Auril de 1656. mandent que la persecution continue tousiours dans le Iapon: car encore que le Tyran qui a vsurpé cét Empire, & qui auoit fait mourir son legitime Successeur, y soit mort miserablement selon les cruautés qu'il a exercées tant d'années contre l'Eglise, celuy qui luy a succedé, marche sur les mémes traces, & a renouuellé la persecution, & pour preuue l'on écrit que deux de nos Peres y ont esté encore depuis peu martyrisez.

Le méme se consirme par des lettres de Macao du 27. Septembre 1657. qui marquent expressement que ce Royaume demeure fermé aux Predicateurs de l'Euangile. I'appris l'an passé au mois de May du Pere Lobo qui arriuant des Indes, vint surgir au Havre de Grace en Normandie, que l'Empereur nouueau du Iapon auoit publié des Edits encore plus rigoureux contre les Predicateurs de la Foy. L'vn estoit que tous les vaisseaux qui seroient convaincus d'en auoir amené quelqu'vn dans les terres

188 Relation des Missions

de son obeissance, seroient pris, pillez, & brûlez. Le second que les maisons qui en receuroient aussi aucun, seroient saccagées & reduites en cendre; & méme que tout le voisinage qui en auroit eu quelque nouuelle, si l'on ne le denonçoit aux luges, passeroit par la même

rigueur.

Mais quoy que le diable s'efforce de boucher toutes les auenues de ce pays à la Religion, le sang de tant de Martyrs ne demeurera pas sterile. Il sera sans doute malgré toutes les puissances de l'Enfer & de la terre, en son temps, selon les ordres de la diuine Prouidence, la semence des milliers de vertueux Chrestiens dont cette Eglise se verra repeuplée, & plus florissante que iamais, Fiat, fiat.

Quant à ce qui est de la Cochinchine, les lettres de l'an 1654. asseurent que la persecution y dure: Mais la ferueur des Chrestiens croist de iour en iour. Le Roy a banny deux de nos Peres qui y estoient, aprés les auoir tenus en prison quelque temps, & les auoir fait tourmenter. Vn de leurs Domestiques qui

les seruoit, a eu plus de bon-heur: car

il a cula teste tranchée pour la Foy.

Cette Eglise compte déja neuf Martyrs, tous du pays, qui ont constamment enduré la mort pour la foy de Iesus-Christ. Le premier est André Catechiste, âgé seulement de dix-neuf ans, que le Pere Alexandre de Rhodes assista au Martyre, & dont il a raconté les exploits genereux dans ses Relations: Les autres sont aussi la pluspart Catechistes, l'on n'en scait encore rien en particulier.

L'on a confirmation de ce que ie viens de dire par des lettres de l'an 1656. & 1657. qui ajoustent que les entrées des ports sont gardées par ordre du Roy, afin d'empescher que les Predicateurs ne passent point dans son Royaume. Il permet toutes ois à vn ou deux de nos Peres de viure parmy les Portugais, auec qui il ne veut pas rompre pour l'interest qui luy reuient de leur commerce, & auec les Iaponois Chrestiens qui y sont resugiez par sa permission.

Ces Peres pourront assister sous main les Chrestiens du pays, & les fortisser dans la resolution qu'ils témoignent de 190 Relation des Missions

vouloir viure & mourir dans la Religion Chrestienne. Il y a de nos Missionaires François, comme l'ay desia touché, destinez pour le seruice de cette Mission si desolée, qui se sont rendus sur les frontieres de ce Pays, & qui épient sans cesse l'occasion d'y entrer, à quelque prix que ce soit.

Le renuersement de l'Eglise de l'Ethiopiese consirme par des lettres de l'an 1654.
& 1656. C'est vne chose deplorable au
dernier point, que cette Eglise se voyant
en vn si bel estat, & le Schisme y estant
presque tout esteint, vne mal-heureuse
passion qui s'est allumée dans le cœur de
l'Empereur, a ruiné tout cét excellent
ouurage de la main de Dieu, & mis le
feu dans cette plantureuse Mission, qui
promettoit au Ciel la recolte d'ames
innombrables: Mais il y a vne Relation
toute entiere de ce sujet sitragique, qu'on
attend tous les iours de Portugal.

Ie toucheray seulement icy en passant ce que i'en ay appris dans les Lettres dont ie viens de parler, que la persecution y est plus cruelle que iamais, que depuis assez long temps il n'y a plus de Missionaires, ny des autres Religieux, ny de nostre Compagnie, dont au moins sept y ont suby vn glorieux martyre. L'Empereur allant de mal en pis est sur le point d'embrasser la Loy de Mahomet, & de la faire receuoir dans son Empire, qui iusqu'à ce temps s'estoit guaranty de cette tache, quoy qu'il soit tout enuironné de Mahometans.

Ce même Prince forcené de sa brutale passion qui l'a precipité à ioindre la cruauté à l'impieté, a fait trencher la teste à son propre Oncle nomme Rasse las Christos. Ce Prince si vaillant, & sirenommé, frere de l'Empereur Sultan Segued, lequel auoit si puissamment fauorisé les Catholiques contre les Schismatiques, & auec l'authorité que son frere luy donnoit, & par le maniment de ses armes qu'il gouvernoit avec plein pouuoir, auoit restably la Religion Catholique, & chassé le Schisme de l'Ethiopie; enfin Dieu a voulu recompenser la vertu de ce grand Prince de la couronne d'vn illustre martyre. Il a eu pour compagnon vn excellent Ecclesiastique Portugais, nommé Iean Bernard de Noguera. Ils estoient tous deux les Colomnes de cette pauure Eglise qui par leur perte, est sur le penchant de sa ruine totale, sul ne plaist à Dieu la soûtenir par sa main

toute-puissante.

Mais si ces Eglises que ie viens de nommer, ne nous ont monstré qu'vn visage couuert de sang & de cruautés sous lesquelles elle gemissent, celle du Royaume de Tunquin ne nous en presente qu'vn tout épanouy des ioye & d'allegresse pour la fecondité d'enfans que nostre Seigneur luy donne par la conversion prodigieuse des Payens qui croist tous les iours. Matrem Filiorum latantem, la pouuons-nous nommer, en vsant des termes du Psalmiste, une mere ioyeuse d'vne si belle lignée d'enfans nez pour le Ciel. Ce que les Lettres nous en écriuent, rendra la fin de ce Chapitre plus agreable.

Les lettres de l'an 1654. & 1656. asseurent que le Christianisme est dans ce Royaume plus storissant, & plus multiplié que iamais, qu'il n'y auoit au reste plus que cinq de nos Missionaires: mais accablez, & presque mourans de fatigues,

d'autres

d'autres Lettres de la méme année disent vn peu plus en particulier que cette Eglise croist tousiours en ferueur, & d'vne façon presque incroyable: car on asseure que dans vn an soixante & dix mille Idolatres ont receu le sainct Baptéme, n'y ayant que quatre ou cinq de nos Peres: Mais sans doute ils se seruoient des Catechistes, qu'ils instruisent, afin de pouuoir à leur dessaut, baptiser ceux qui sont les plus pressez pour quelque necessité, & de là l'on peut montrer combien des Eucsques y sont necessaires pour affermir l'Estat de cette Eglise, qu'on fait desia monter à plus de trois cent mille Chrestiens.

Enfin les Lettres de l'an 1657, mandent qu'il y auoit six de nos Peres, & que pas vn des Missionaires venus recemment d'Europe, n'y auoit pû encore penetrer. Le vaisseau qui y alloit de Macao l'année precedente, se perdit. Ils attendoient que le voyage de celuy-cy seroit plus heureux, afin que les Peres, qui surchargez de tant d'occupations, ploient sous le fardeau, & n'en peuuent plus, connoissent par le secours qu'on leur

N

194 Relation des Missions

porte, qu'on ne les a pas mis en oubly dans l'Europe, & que nostre France entre autres, comme le Royaume tres-Chrestien, & l'aisné en la Religion, s'interessant au bien de l'Eglise, leur enuoye vne troupe de Missionaires d'élite, qui entrent dans leurs trauaux, & leur succedent en la conqueste des ames? De vray quelle charge est ce à six Prestres de cultiuer ce grand nombre de Chrestiens, & tout ensemble de trauailler à la conuersion de tant d'Infidelles qui se presentent. Aussi quand ils vont visiter les Chrestiens, à peine leur donne-t'on le loisir de prendre vn peu de repos, leurs Eglises estant iour & nuit pleines de monde qui demandent à se confesser & communier.



edia angli, cont. 1262 de la viene y est mich mus

and a successor of the Line Carlo successor

increase, an encougant is sure in green

## CHAPITRE XIX.

Les dernieres nouuelles de la Chine, & des autres pays voisins, receuës cette année presente 1659. au mois de Mars.

Le recit des dernieres nouvelles que ie viens d'apprendre de la Chine, & des autres pays voisins, par vne lettre que le Pere Alexandre de Rhodes écrit d'Aspaham le vingtième de May de l'an dernier 1658. Comme il a esté long temps Missionaire dans ce pays là, il a contracté d'anciennes habitudes, & de bonnes correspondances auec les Peres qui ont travaillé auec luy dans ces Missions, c'est par eux qu'il a de sideles informations des choses qui s'y passent, & il nous fait le bien de nous les communiquer.

Pour ce qui regarde la Chine, ses lettres portent que le Pere Iacques le Faure est entré déja dans le milieu du Royaume, & a penetré bien auant dans les Missions auec cinq autres Peres François, qui rencontrent à pleines mains vne moifson abondante, & trauaillent infatigablement: mais triomphants de ioye, Sicut
qui latantur in messe. Ainsi que les Moissonneurs se reioüissent au milieu d'vn
champ chargé en abondance de beau
bled. Cette ioye du Seigneur est leur
force parmy leurs fatigues, & ils sont
rauis d'auoir trouué à la Chine les biens
àsquoyils aspiroient dés la France, à sçauoir force trauaux à sousser: mais aussi
force ames à gagner.

Le Roy Tartare qui commande maintenant à toute la Chine, excepté deux Prouinces qui obeissent encore au Roy ancien nommé Iullié, a consirmé l'ample pouvoir qu'il avoit donné à nos Peres de précher l'Evangile, & à ses Sujets de

l'embrasser.

Il se monstre aussi fauorable, & méme aussi familier à eux, que le pourroit faire en Europe vn Prince Chrestien tres-affectionné à nostre Compagnie. Il boit & mange familierement chez nous, & auec nous. Il traite auec vne priuauté particuliere auec le Pere Iean Adam tresaux Indes Orientales.

197

excellent Mathematicien. Il va dans sa chambre, & s'asseoit sur son lict, tandis que le Pere luy explique quelque secret de cette science: En vn mot il l'ayme, & l'estime iusqu'à ce point, qu'il l'a declaré publiquement la seconde personne de son

Royaume.

Mais les preuues effectiues de l'inclination qu'il a pour nostre saincte Foy, sont aussi tres-illustres: Car il nous a fait bâtir vne belle & grande Eglise dans Pequin, qui est la ville Capitale de cét Empire, & maintenant on y préche publiquement auec grand concours de peuple, nos sacrez Mysteres: & ce qui est encore plus remarquable, l'on a fait dans la méme ville, auec son bon plaisir, vne Procession solemnelle, & tres-magnifique, où le tres-sain& Sacrement a esté porté par les ruës, auec vne pompe, & vne splendeur merueilleuse. Les Chrestiens l'accompagnants en tres-grand nombre auec vne deuotion singuliere.

Or cecy témoigne quelle est la liberté & l'asseurance dont commence à jouir nostre saincte Religion dans la premiere ville de cétte Monarchie. Aprés la bonté

N iij,

de Dieu, d'où naissent toutes ces benedictions si extraordinaires, & qui montre plusque iamais sa protection sur cét Eglise: plusieurs attribuent ce succez si heureux aux merites du Pere Estienne Faber, depuis peu Vice-Prouincial de la Chine, & homme d'vne saincteté eminente, reconnue, & venerée de tous. Nous auons déja remarqué qu'il est François, & que la France l'a donné il y a plus de quinze ans à la Chine, pour conquerir ses Habitans à l'Eglise, & au Ciel. Il s'est acquitté tres - dignement iufques auiourd'huy de ses employs, auec vne prudence qui va de pair auec son zele tres-ardent. Or dans la charge qu'il a en qualité de Vice-Prouincial de toutes les Missions, on espere qu'il attirera les graces du Ciel auec de nouueaux accroissements sur les trauaux de tant de braues Ouuriers que la France, & les autres Contrées de l'Europe viennent de luy enuoier,

Mais comme Dieu presente de si belles ouuertures à l'Euangile, la Prouidence, qui dispose toutes choses doucement & efficacement, prend le soin d'y destiner des Ouuriers de diuers endroits: En effet outre nos Missionaires François, & quelques autres Italiens, & Portugais qui sont entrez dans le labourage de cette vigne, comme il s'est narré dans cette Relation, i'apprends que d'autres de nos Religieux les y suiuent à grands pas, & que d'autres ont déja pris leur part à cette culture.

Ainsi le Pere Bernard Diestel qui est parti d'Allemagne auec cinq ou six de nos Peres, aprés auoir trauersé la Turquie, & la Perse, passant par Aspaham, puis prenant la route de Surrate dans le Royaume du grand Mogor, est arriué

heureusement à la Chine.

Le Pere Michaël Boym Polonois, estant retourné en Europe de la Chine, où il auoit déja trauaillé plusieurs années, ainsi que les Relations qu'on a euës de luy le narrent, a repris le chemin de sa premiere Mission auechuist autres Peres qu'il a leuez, & qu'il a acquis en diuers lieux, & tous sont déja abordez à Goa, d'où ils doiuent incessamment se rendre à la Chine.

Enfin le Pere Martin Martinius de la ville de Trente, lequel auoit déja fait

N iiij

parcillement vn fort long sejour par les diuerses Prouinces de ce grand Royaume dans les employs des Missions, ayant aussi amassé de nos diuerses Maisons d'Europevne troupe choisie d'excellents Missionaires iusqu'au nombre de

trente - six, a regagné Goa.

Il est vray que la perte qu'il a fait de sept d'entr-eux dans le voyage des Indes luy a esté tres-sensible: mais les vingtneuf qui luy sont restez, & qui sont déja passez dans la Chine, luy seruent de consolation pour l'esperance qu'il a, que si sa troupe est diminuée en nombre, certainement elle ne l'est ny en vertu, ny en courage: car ils se promettent tous de tenir & leurs places, & celles de leurs Compagnons, qui du Ciel, lequel les a pris, comme pour gage de leur generosité commune, les assisteront si fortement, qu'il n'y aura rien qui ne cede à cette ionction de forces de l'Eglise militante, & de la triomphante.

Ie ne dois pas obmettre plustost pour le service des gens du merite, qui honorent les belles lettres & en font profession, que pour la recommandation du méme Pere Martinius, que comme il auoit pris fur les lieux vne connoissance tres-exacte de toute la Chine durant les longues années qu'il y a seiourné, & l'a parcouruë, il en a dressé les Cartes Geographiques auec vn grand soing & les a fait imprimer à Amsterdam, où elles se debitent auec grande reches che des Curieux, qui depuis long-temps attendoient cét accroissement, & cét ornement de la Geographie.

Car bien qu'on ayt veu il y a long temps quelques Cartes de la Chine en general, toutesois iusqu'à l'année 1658. Il ne s'en estoit iamais veu de ses Pro-uinces si en particulier: comme le Pere y a trauaillé aucc vne exactitude qui ne sera, ainsi que l'espere, ny desagreable ny desaprouuée des Sçauans. Il se voit de là que le zele des ames contribüe aussi à l'accroissement des sciences naturelles, & que les Ouuriers de l'Euangile portant ces lumicres au Monde Nouueau, y découurent beaucoup de belles veritez, dont nos Arts sont enrichis, & perfectionnez.

Pour le Tunquin, les mémes dernieres lettres specifient que quatre de nos Missionaires François y sont destinez, &

qu'ils attendent de iour à autre la commodité d'y passer. Au reste les auancements de la Religion y continuent auec vne pareille benediction Les Idolatres à miliers embrassent nostre saincte Foy.

Quelques vns des mémes Missionaires estoient nommez pour le secours des Chrestiens du Iapon, destituez entierement de Prestres depuis le martyre du dernier de nos Peres, qui a acheué le centenaire de nos Religieux qui ont donné leur vie pour lesus Christ: mais l'entrée de ce Royaume est bouchée auec vne telle rigueur aux Predicateurs, qu'il faut vn peu surseoir auec patience iusqu'à ce qu'il plaise à Nostre Seigneur de l'ouurir; Il en sçait les voyes, & les peut mettre en execution quand il voudra, Aperit, & nemo claudit. Il ouure, & pas vn ne luy ferme, Claudit, & nemo aperit. Il ferme, & pas vn n'ouure, c'est ce que l'infidelité endurcie de ce pays, doit craindre que Dieu enfin ne luy ferme la porte de la Foy, & qu'aucun aprés ne l'a luy ouure.

Le Pere Ignace Baudet est enfin entré dans la Cochinchine, où la persecution est autant allumée que iamais, & tout fraîchement yne Dame de tres-noble extraction, y a souffert yn genereux martyre pour la Religion. Les particularitez s'en

sçauront auec le temps.

Mais deux autres de nos Peres François sont arrivez dans l'Isle de Hainam trespeuplée, & qui est du ressort de la Chine: ils ont pour associez deux autres Peres, l'vn Italien, l'autre Portugais: car l'on y espere vne moisonaussi plantureuse qu'au Tunquin, comme les premieres dispositions qui paroissent, le promettent. Dominus det verbum Euangelizantibus virtute multa, pour conclure auec ce traict du Psalmiste, en souhaitant à ces genereux Ouuriers de l'Euangile, que Dieu leur fasse la grace de porter sa parole auec vne vertu, & vne fecondité si abondante, qu'elle remplisse l'Eglise d'enfans de benediction, & le Ciel de Sain & glorieux qui le louent à iamais. Ainsi soit-il.



## CHAPITRE XX.

Du voyage du Pere François Clement à la Chine, & de ce qu'il a appris à Goa.

Le viens toute à cette heure receuoir la Relation que le Pere François Clement, excellent Missionaire, que la France a donné à la Chine, a dressé de son voyage aux Indes, & de ce qu'il a appris à Goa. Comme donc de la Prouince de Bordeaux d'où il estoit, il se sur rendu en Portugal, il partit de Lisbonne le vingt-septième de Mars de l'an 1657, auec cette slorissante & nombreuse troupe que le PereMartinMartini, ayant leuée de diuerses endroits de nos Prouinces d'Europe, a menée auec luy en son retour à la Chine, ainsi qu'il a esté dit cy-dessus.

Leur nauigation ayant esté assez heureuse à quelques maladies prés, qui leur rauirent quelques-vns de leurs Missionaires, sans parler de plusieurs autres Soldats ou passagers qui en furent consu-

205

més, ils aborderent enfin au port de Goale cinquiéme Septembre, aprés cinq mois

& dix iours de passage.

Or du narré qu'il a composé de son voyage, & qu'il a enuoyé en Europe, i'en tireray ce qui pourra seruir à cét Ou-urage d'vn surcroist, d'enrichissement, & comme d'vn comble plein & parfait à la curiosité du Lecteur, desireux de nouuelles de ce Noueau-Monde.

La premiere chose, & qui merite d'estre mise à la teste de toutes les autres, c'est ce qu'il raconte de la vie, & de la mort du Pere Nicolas Lombard, le plus illustre en ces temps derniers, & le plus ancien des Missionaires de nostre Compagnie dans la Chine.

Il estoit Sicilien de Nation. Son decés arrriua à Pekin le premier de Septembre de l'an 1654, le quatre-vingt dix-huitiéme de son âge, & le soixante & dix-huictième de son entrée à la Compagnie.

Il a trauaillé l'espace de cinquantehuist ans dans les Missions de la Chine, dont il en a employé les premiers treize ans dans la Prouince de Canton; de là il visitoit troutes les Eglises, & toutes les

Residences de la coste Meridionale de cét Empire. Il passa aprés dans les parties du Nort, où il a dedié le reste de sa vie & de ses trauaux.

Il a esté au iugement de tous ceux qui l'ont veu, & qui l'ont connû, vn homme veritablement Apostolique, brûlant sans cesse d'vn zele incroyable du salut du prochain. Il n'a iamais, non pas méme dans l'extrême vieillesse, resusé aucun trauail, ny craint aucun peril, pour grand & pour estroyable qu'il peust estre, où il s'est presenté occasion de

gagner des ames à Dieu.

Il auoit si bien appris de Nôtre Seigneur la premiere vertu de l'homme Apostolique, qui est d'estre debonnaire, & maistre de ses passions, qu'il n'aiamais eu dans tous ses disserens employs, ny en tant de lieux diuers où il a esté, aucun debat auec qui que ce soit. On ne l'a non plus oüi, ny murmurer, ny seplaindre iamais de personne. Il s'est tousiours monstré tres-humble, & tres deserent à tout le monde; Aussi il gagnoit, tant les nôtres que les Estrangers, par son admirable debonnaireté. Dans la pau-

ureté extréme, où il a vécu parmy ces peuples, il a gardé vne netteté si agreable, que ceux qui viuoient ou conuersoient auco luy, en estoient rauis: car cette vertu plaist à merueille, & est tout à fait du genie de cette Nation, de soy fort polie, & toute attachée à cette bien-seance exterieure.

Mais les deux grandes vertus si propres, & si necessaires à la vie Apostolique, l'Oraison, & la Mortification, dont cette-cy éleue l'homme au dessus de luy-même, & cette autre l'vnit auec Dieu, ont esté rares en ce grand personnage, & y ont fait vn concert merueilleux. Pour l'Oraison dans la multitude de ses emplois qui sont liez à la vie Apostolique.

Il a vécu comme vn Ange, attaché tousiours à la pensée de Dicu, & à sa face par vne contemplation continuelle. Le cœur de ce Missionaire si zelé, se portoit auec vne si douce pente à la priere, que nonobstant les ocupations des Missions qui portent de grandes distractions, il se trouuoit sans cesse dans vn doux entretien auec Dieu; il luy donnoit tout le temps qui pouuoit luy rester libre, & ce

dans l'Eglise, où il estoit assidu, & comme dans son Element.

Quant à la mortification, il en faisoit ses delices, & l'a aimée presque iusqu'à l'excés: il traitoit son corps tres-aspremét. Sa temperance paroissoit prodigieuse, il ne prenoit en table que les choses les plus viles, & iamais n'vsoit de sel, ny de vinaigre, ny d'huyle, ny d'aucune autre sorte d'assaisonnement. Il a gardé tres - exactement dans sa plus decrepite vieillesse, âgé de prés de 100. ans, le ieune du Caréme, des Vigiles, & des Quatretemps. Pour le sommeil, il le prenoit toûiours vestu, couché sur vne table de bois, auec vne méchante & legere couverture, passant ainsi tous les Hyuers, sans mattelas, ny autre commodité, bien qu'à Pekin, où il a vécu fort long-temps, & où il est mort, le froid y soit tres-cuisant pour les gelées, & pour les neiges qui y sont ordinaires. A ces macerations, il aioûtoit les disciplines rudes de tous les iours, qu'il a continuées même dans son âge extréme où il n'auoit plus que la peau & les os : de sorte qu'on peut dire de luy, ce qui se dit de sainct Basile le Grand

Grand, Spiritu tantum viuens prater pellem & ossa nulla praterea corporis parte constare videbatur. Viuant seulement de l'esprit, il ne sembloit plus auoir aucune partie du

corps, que la peau & les os.

Il a esté orné d'insignes talens pour les fonctions Apostoliques; il sçauoit la langue Chinoise, parfaitement, & en possedoit la beauté, & l'eloquence iusques à vn si haut point, que les Mandarins qui y estoient les plus versez, & les plus intelligens, l'auoient en admiration. Aussi il a composé, & fait imprimer grand nombre de liures en ce langage, qui ont fait, & qui continüent de faire des fruicts inestimables pour le bien des ames. Quant à la conuersion des Insideles qu'il a attirés à la Foy, la multitude en est si digieuse, qu'on les tient pour innombrables.

Ce sainct personnage, s'estant epuisé, & tout consumé dans les trauaux de son Apostolat, estoit tombé sur les derniers mois de sa vie dans vne telle foiblesse, que les forces luy desfaillant pour les sonctions de la vie, il ne pouuoit plus lire son Breuiaire: Mais pour y suppléer, selon

qu'illuy estoit possible, il recitoit le Pater, & l'Aue, autant de fois qu'il estoit necessaire pour égaler toutes les paroles de l'Office de châque iour, & ce tres-deuot vieillard estoit si exact à payer à Dieu ce tribut de pieté, qu'il se faisoit declarer la moindre Commemoraison qui se deuoit dire selon les Rubriques, asin de satisfaire à toute rigueur par la compensation de ces autres prieres.

Trois iours deuant son deceds, comme il se trainoit à l'Eglise, il arriua que par mégarde hurtant du pied, il tomba sur le sueil. Cette cheute en vn corps si vsé de vieillesse, luy sut la derniere cause, & tout ensemble vn auertissement de sa sin prochaine. Il commença donc de luyméme, sans attendre l'auis d'autruy à s'y preparer, bien que toute se vie ne luy eust esté qu'vne preparation continuelle à ce

grand passage de l'eternité.

Le sage Missionaire trauaille de telle sorte pour le salut des autres, que sa pensée principale, est la sin heureuse de sa propre Mission, qui est sa vie: Sicut misit me pater, ita ego mitto vos, dit le Sauueur à ses Apostres, comme mon Pere m'a enuoié, ainsi ie vous enuoye; c'est à dire, ayez tousiours la mort en vostre souuenir, comme ie l'ay euë sans cesse presenteen mon esprit, estudiez-vous de finir vostre vie sainctement, comme i'ay fini la mienne.

Le Pere Nicolas Lombard s'appliqua de toute sa pensée à cette derniere preparation à la mort, premierement par l'exercice frequent de la Confession, c'est le Purgatoire où l'ame deuant que de paroistre deuant Dieu, se laue dans le sang de l'Agneau, y dépoüille ce qui peut rester des ordures de la vie, & satisfait à la Iustice souveraine, V sque ud nouissimum quadrantem, iusqu'au dernier denier autant qu'il se peut. Il receut aprés le sacré Viatique & l'extréme-Onction, auec vne deuotion tres-parfaite.

Il souhaitta qu'en suite on luy leust la Passion de Nostre Seigneur. Comme elle sur acheuée, le Pere Adam Schallabelle qui estoit son compagnon, luy ayant demandé si rien ne luy faisoit de la peine, ce sainct homme baigné de larmes, & leuant les mains & les yeux au Ciel, répondit: le meurs maintenat plein de ioye,

& comblé de consolation, puisque i'ay eu le bon-heur d'entendre à cette heure derniere de ma vie la Passion & la mort de

mon Seigneur.

Le iour suiuant le même Pere Adam dît la Messe dés la pointe du iour pour l'agonie où il estoit, le Pere Gabriel Magalien luy ayant succedé à l'Autel, au même moment qu'il y faisoit l'eleuation de la tres saincte Hostie, l'ame de ce sainct Personnage, deliée du corps par vne mort tres-douce, monta ainsi que nous croyons au Ciel, comme vne victime de charité, & de zele des ames.

Son decés estant sceu, les Chrestiens accoururent en tres-grand nombre autour de son liet, tous le reuerent comme leur Pere, & l'honnorent comme vn Sainct. Cette nouvelle aprés s'estant portée par les quartiers de la ville, tous les autres Fideles se rendirent chez nous en diligence, pour luy rendre les mémes témoignages de respect. Les pleurs, les gemissements inconsolables, dont ils regrettent la perte de ce grand personnage, éclattent si haut que les Payens méme touchés du bruit de ces lamenta-

tions si extraordinaires, vinrent en foule à nôtre Maison, prenant part à ces ressentimens communs: Mais ce qui est plus remarquable, les plus illustres des Mandarins, & toutes les autres personnes les plus qualissées, se rendant chez nous, honorerent le corps du Pere des marques de dueil, selon la coustume du pays, en frappant du front trois sois la terre en sa presence. Cette coustume est mystericuse, & semble dire, Pensez à la mort.

L'Empereur Tartare qui auroit admiré les vertus du Pere, & en conseruoit vn souvenir plein de veneration, commanda qu'on luy sist des obseques auec toute la magnisicence la plus haute qu'il se pourroit, & pour y contribuer, luy même il enuoya aussi-tost de son épargne à nos Peres trois cent taïs, qui est vne monnoye de la Chine, dont châque piece vaut enuiron cinq liures dix sols, pour vne partie des frais de la pompe funebre.

Le corps du dessunct sut portéen terre auec vne splendeur tres-grande: quatre cens des premiers de la Cour l'accompagnerent au lieu de la sepulture, que le Roy de la Chine nous auoit donnée depuis plusieurs années, éloignée de la ville, selon l'vsage du pays. La biere dans laquelle le corps fut enseuely estoit tresprecieuse; de plus, tout le chemin par où passoit le conuoy, estoit enbaûmé de parfums, & de senteurs, que le peuple pour témoignage de son estime, & de son amour enuers le Pere, allumoit & brûloit de toutes parts.

Il fut inhumé prés du tombeau du Pere Matthieu Ricci, qui est le premier, qui aprés la mort de sain& François Xauier a porté la lumiere de l'Euangile dans la Chine, & dont ce Pere auoit esté Compagnon quelques années. Par ordre exprés de l'Empereur, vne table de marbre fut dressée sur le monument auec cette inscription grauée en caractere Chinois.

Le Pere Nicolas Lombard Sicilien, Profes de la Compagnie de Iesus. Il a vécu en la Compagnie soixante 🤁 rreize ans. Il en a employé cinquantehuict à précher Iesus - Christ parmy les Chinois. Et aprés auoir suruécu

aux Indes Orientales. 215 long-temps, le Pere Ricci de qui il auoit esté Compagnon, plein de iours, & de bonnes œuures, il est decedé à Pekinl'an 1654. le premier de Septembre, & de son àge le 98.

Mirabilis Deus in Santtis suis, se doitil dire pour conclusion, Dieu se montre
admirable en ses Saincts, de les rendre
si glorieux, non seulement aux Chrestiens qui l'adorent: mais aussi aux Insideles qui ne le connoissent pas, méme à leurs
plus grands Seigneurs, & iusqu'à leur
Monarque, tant la saincteté de nostre
Religion s'attire de veneration de faire
honnorer si hautement à ses propres
ennemis, ceux qui l'ont dignement professée, & par les œuures, & par la parole.



## CHAPITRE XXI.

Diuerses autres choses remarquables de la méme Relation.

'V N E des plus importantes, est le narré qu'elle fait en détail des fruicts que cette Mission commence à porter pour le salut des Ames, depuis que cét Empire de la Chine se trouve libre du tumulte des guerres, & iouit de la

douceur de la paix.

Il rapporte donc que l'an 1655, quoy qu'il n'y eust que seize de nos Peres, dont quatre estoient inutils, & comme hors de combat pour leur grand âge, si est ce que le reuenu qui se recueillit du trauail des Missionaires, monta iusqu'à cinq mille cinq cens soixante & dix - huict Payens gagnez à nostre Seigneur, & incorporez à l'Eglise par le Baptéme.

Ce qui merite d'estre obserué dans ces conversions, c'est qu'en premier lieu, ils ne sont pas seulement de Chinois: mais aussi de Tartares. Si bien que cette Nation victorieuse dans ses conquestes, com-

mence à se soûmettre au joug de l'Euangile, & offrir au Roy des Roys les premices de ses hommages: Mais outre cela l'on peut tirer vn heureux presage de ce succez pour les années suiuantes, d'autant qu'entre ces nouueaux Conuertis, il s'en compte plusieurs de condition releuée, dont l'exemple a touché déja beaucoup d'autres, & les attirera bien tost, comme l'on espere, à la Foy. Leurs seuls domestiques, & ceux qui dépendent d'eux, ne manqueront point de les suiure, & augmenteront l'Eglise d'vne multitude tres-considerable.

Le nouueau Conquerant Tartare continue ses faueurs enuers nos Peres, comme il ne peut les auoir tous auprés de sa personne, selon qu'il témoigne le desirer, il en a tousiours pour le moins deux dans sa Cour, & pour les y tenir attachez, il leur a acheté vne maison, fait bastir vne Eglise, & leur a assigné vn fonds stable à perpetuité.

Les visites dont il les honore, sont tresfrequentes, & mélées de toutes les demonstrations de faueur, & de bien veillance qui ont paru encore plus visibles,

depuis qu'on a eu nouuelles certaines de de la mort du Roy dernier., & de son Fils, comme aussi de sa Mere, & de sa Femme, lesquelles ont eu ce bon-heur particulier, qu'elles sont mortes Chrestienes, comme depuis quelques années elles auoient esté instruites dans nostré saincte Religion, & baptizeés par le Pere Iean Xauier de nostre Compagnie, le Roy leur en ayant donné toute liberté. Ainsi l'Empereur Tartare est Seigneur absolu, & paisible de tout le païs. Il n'y a plus qu'vn Seigneur Chinois; qui dans la Prouince de Fokien a vnc armée Nauale assez considerable, auec laquelle il court ces mers, & exerce quelque piraterie: mais ce reste de forces ennemies sera bien-tost dissipé, & mis à neant par cette grande puissance qui domine auiourd'huy.

Le bruit de ces prodigieus conquestes s'estant porté iusques dans la Moscouie, le Grand Duc a deputé des Ambassadeurs pour en feliciter le Conquerant, qui les a receus auec une splendeur extraordinaire. De là il se voit qu'on peut de l'Europe passer dans la Chine par la Moscouie, & le voyage seroit, selon plusieurs apparences probables, & plus court, &

plus commode.

Au méme temps, des Deputez des Hollandois parurent en cette même Cour, pour demander à l'Empereur la liberté du commerce sur les terres de son obeissance, & pour reüssir dans leur negotiation, ils sirent de grandes offres. D'abord ils surent assez bien receus, dautant qu'ils auoient esté recommandez de la bonne sorte par les Gouuerneurs des Prouinces, par des Mandarins, & par les Generaux, tant Tartares, que Chinois de la Prouince de Canton, que ces Deputez auoient tous corrompus, & gagnez par argent, & à force de presents.

Mais l'Empereur aprés vne meure deliberation sur cette affaire, ayant esté mieux informé, & sur tout par les memoires d'vn certain Iean fameux Pirate, qui auoit esté pris auparauant, & estoit detenu prisonnier à Pekin, qui auoit pendant la confusion des guerres passées, infecté, & écumé toutes ces mers, y faisant d'estranges rauages auec les Holandois; l'Empereur, dis-je, leur a dessendu tout trasic, & l'entrée même dans ses Etats.

Ainsi ils furent contraincts de se retirer aprés auoir déboursé plus de trois cent mille écus en cette sollicitation. Il semble que Dieu par vne conduite speciale, ait destourné le cœur de ce Prince de cette alliance, afin qu'elle ne fust point vn obstacle, & vn écueil à la Predication de la Foy Catholique, & à la conuersion de ces Peuples, à quoy ils monstrent de si belles dispositions, & paroissent tendres à bras ouuerts: Car, & le Iapon, & plusieurs autres Contrées des Indes rendent témoignage par les effets non moins certains, que lugubres, du prejudice que la Religion Catholique a receuë, & reçoit encore tous les jours de la confederation que contractent ces Heretiques auec les Potentats de ces Nations.

La ville de Malaca que sain Errançois Xauier auoit autrefois d'Idolatre qu'elle estoit en partie, & pour le reste corrompüe de l'infection de tous vices, conquise toute entiere à la Foy, & rendu vn sanctuaire de toute pieté, n'est plus auiourdhuy depuis que l'Heresie s'en est emparée, qu'vne retraicte de l'erreur, & du Paganisme, comme aussi de tous les

crimes que ces deux monstres attirent à leur suite. Le bruit est venu à Goa que le Roy Achien Maure l'assiege, les Portugais le desirent pour l'esperance qu'ils auroient de la reprendre plus aisement. On asseure que ces Heretiques disoient qu'ils n'auoient pû encore habiter la maison que nous y auions, à cause que ceux d'entr-eux qui y estoient entrez les premiers, y auoient esté receus si rudement par des hostes inuisibles, que les autres n'ont pas eu le courage ny l'asseurance d'en faire vne nouuelle experience.

Ils auoient fait ligue depuis enuiron six ou sept ans auec le Roy d'Hidalcan, dont nous auons déja parlé, tres-puissant, qui regne presque depuis Goa dans la terre serme, iusqu'aux terres du grand Mogor, asin qu'il vinst assieger par terre cette ville, qui est la principale dessence, & l'appuy vnique de la Religion Chrestienne dans les Indes, eux promettant de la bloquer par mer. Ce Roy Maure ne manqua point de son costé à enuoyer vne tres-nombreuse armée qui emporta d'emblée vne Isle nommée Bardeis, de neuf lieuës de long

entre la terre-ferme & Goa.

Cette ville se sentit alors reduite à de grandes extremités pour les viures: car les auenues de la terre-ferme, & des Isles voisines, d'où elle les tirepour la meilleure part, elle n'en pouuant fournir que fort peu à cause de son terrouer sterile, estoient tenuës & bouchées par les ennemis. Dans ce desespoir, & cette consternation publique, Dieu suscite vne pensée en l'esprit du Gouuerneur, qui fut de ramasser tout ce qu'il pouuoit auoir de cheuaux dans la ville. Voilà donc qu'il sort auec deux escadrons de Caualerie, & fond auec telle furie sur les Mores, qu'eux saiss subitement d'vne terreur panique, s'enfuirent en desordre, & ainsi la ville sut deliurée du siege: Mais ce Roy ayant sceu que les autres luy auoient manqué de paro-& n'auoient point paru deuant Goa, enuoya dire au Vice-Roy pour couurir sa honte, & pour excuser sa faute le mieux qu'il se pouuoit, que cette entreprise s'estoit faite sans ses ordres par quelques troupes mutinées, & qu'ils vouloient viure desormais amis des Portugais.

La nouuelle est aussi venuë à Goa de la mort du grand Mogor. Les quatre enfans qu'il a laissez, disputent la couronne par les armes, & le victorieux l'emportera: le fils aisné, qui seul de ses freres viuoit auecson pere dans la ville d'Agraou, est la Cour de ce grand Royaume, a eu tousiours proche de sa personne quelques-vns de nos Peres qui ont là vne Mission sixe & stable. Il s'est pleu tousiours extremément à voir des tableaux de nos diuins mysteres, donnant à connoître par ces signes exterieurs son inclination à nostre saince Religion.

Le Royaume des Moluques à eu depuis peu vn Roy More de Religion, lequel dans vn climat barbare a esté vn des plus beaux, & des plus polis esprits du siecle, tres - eminent dans la connoissance de toutes les belles lettres. Il estoit parfaitement versé dans toutes les histoires de l'Europe, intelligent das la langue Latine, Grecque, Hebraïque, & Portugaise: mais ce qui est plus merueilleux, il auoit acquis vne si profonde, & si parfaite science des verités de nostre Foy, qu'il en disputoit contre les Heretiques Hollandois, iusques à conuaincre, & à confondre leurs Ministres. Le mal-heur de ce pauure Prince est de p'auoir pas vsé de tant de belles

lumieres pour son propre salut: car il est decedé dans son insidelité.

Dieu a permis que les Heretiques ayent pris l'an mil six cent cinquante six le douziéme de May la ville & la forteresse de Colombo, que tenoient les Portugais dans l'Isle de Ceïlan aprés neuf mois de siege. Les vaineus qu'on accuse d'auoir apporté beaucoup de negligence au secours de cette place, perdent en suitte tout le trafic de la Canelle, & des pierreries qui ne sont que dans cette partie de l'Isle: Mais ce qui est bien plus important, & plus lamentable, la Religion y perd beaucoup: car nous y auions vn College & vne Mission qui conseruoient dans la pieté les Originaires desia conuertis, & qui gaignoient d'autres Infideles tous les iours à l'Euangile.

Le bruit court à Goa, & on le donne pour asseuré, que le Zeingala, qui est le Roy de cette Isle, assiege auiourd'huy ces Vainqueurs dans la même place. La raison est qu'ils ne la luy ont pas remise entre les mains, ainsi qu'il auoit esté conuenu entr'eux, lors qu'ils l'appellerent à leur secours pour la prendre, luy ayant promis

qu'il

qu'ils ne s'en reserveroient que la liberté du commerce: mais ils l'ont retenuë toute entiere, & s'y sont fortifiez le mieux qu'ils ont pû. Pour ce sujet, ce Roy Idolatre a inuité les Portugais de se ioindre à luy en ce siege, lequel s'il reussit, les affaires de

la Foy s'y pourront restablir.

On nesçait pas quel est leur dessein: mais il se voit dans le port de Goa vne armée nauale de neuf grands vaisseaux, dont le moindre est aussi grand que l'Admiral des Hollandois, & cinquante Galliotes faites comme des Galeres qui sont de meilleur seruice, lors qu'il n'y a point de tempeste, que les vaisseaux de hault bord. Tout le bon-heur de l'Inde que ces Heretiques ont reduit à vn pitoyable estat, sur tout pour ce qui regarde la Religion, dépend du bon succez d'vn cobat, si toutefois l'ennemy l'accepte, ce qu'on ne croit pas. Les dernieres nouuelles qui sont du vingt-cinquiéme de l'anuier de l'an passé, & les plus recentes qu'on puisse auoir, asseurent que cette Flotte s'estant mise en mer, & poursuiuant l'ennemy, elle ne l'auoit sceu ioindre, parce qu'il auoit tousiours pris la fuite à la faueur du vent.

Seulement il est arriué le vingt-cinquiéme de Ianuier de l'an dernier que le Vice-Admiral Portugais s'estat détaché du corps de l'armée, & vn tourbillon l'ayant emporté assez loing, sans qu'il peut estre secouru des autres vaisseaux, voilà que l'Admiral des ennemis escorté de tous les autres nauires, les meilleurs de sa Flotte, viennent à fondre dessus, & à l'inuestir de tous costez auec vne horrible décharge. Le combat fut rude, & acharné de part & d'autre pendant plusieurs heures. Il y eut des ennemis qui se lancerent même dans ce Vice-Admiral: mais ce ne fut que pour y trouuer la mort. Enfin comme la chaleur des Soldats s'enflammoit, & que le Portugais serré plus estroitement, courroit risque d'estre forcé de se rendre, le General ayant fait bracquer tous les canons, & charger extraordinairement, fit tout d'vn coup vne si furieuse, & si heureuse descharge, qu'il écartast bien loing les vaisseaux Hollandois, les ayant presque tous endommagez auec notable perte d'hommes: mais luy aprés vne si genereuse défaite, se rendit victorieux à sa Flotte: Or cét aduantage

remporté par les Portugais, peut seruir de presage heureux de la victoire que Dieu, s'il luy plaist, semble leur preparer sur les ennemis de sa Religion, comme l'Eglise luy demande tous les iours, qu'il les dai-

gne humilier.

De cecy, il se voit comme ie l'ay déja touché, que ce sont faussetz manisestes qui se debitent en Europe presque tous les ans, que ces Heretiques ayent assiegé Goa. Tout ce qu'ils ont pû entreprendre, bien que dés long temps ils muguettent cette place, n'a esté que de la blocquer de loing par mer, asin d'en empecher le commerce. Ce qui leur a reüssit car ce port qui a esté autre fois plein de vaisseaux de toutes sortes de Nations auec vn trasic le plus riche de toute l'Inde, ne voit plus auiourd'huy que de petits bateaux.

Mais ce qui est plus à déplorer, la Foy qui sous la couverture & l'occasion de cét opulent commerce, se preschoit à tous ces peuples estrangers, demeure maintenant muette, & ne fait plus ce grand gain des Ames, qu'elle auoit coustume de faire auparavant. Que si cette Flotte est fauorisée

des benedictions du Ciel, pour chasser & exterminer ces ennemis, on espere de voir dans peu resleurir la Predication de l'Euangile, & qu'elle y portera des fruicts aussi abondans qu'elle en ait iamais produits.

l'auois cy - dessus obserué que toute l'Inde alloit estre destituée d'Euéques, auec vn dommage tres-notable de la Religion, lequel seroit causé de cette destitution. Cette Relation asseure que le Patriarche d'Ethiopie, & son Suffragant, tous deux de nostre Compagnie, & qui s'estoient retirez à Goa, sont enfin decedez. Ainsi il ne reste plus que l'Euesque de Cochin, âgé de quatre-vingts ans, & ce qui est encore tres-fâcheux, il a esté chassé de son Eglise par ses Chanoines, & par ses Prestres, qui par vn attentat presque inouy, ont osé mettre en sa place l'Archidiacre de cette Eglise, lequel est naturel du pays, & fils d'vn Roy, aux enfans de qui cette dignité, à ce qu'on dit, est attachée par succession. Quel peut estre ce droit, ie m'en rapporte.

Or cet Eueque intrus a tenu les Ordres, fait des Prestres, & exerce toutes les fon-

ctions propres de ce si auguste caractere. Le Pape aduerty de ces abus, y a enuoyé des Commissaires; mais cét Euesque pretédu n'a point coparu. Ce desordre est enorme, & cause vu grand scandale dans tout le pays. Vn des Commissaires a dit au Pere qui écrit ces choses, que plusieurs de ces Schismatiques estoient desia retournez à leur Pasteur, qui a esté contrainct de se retirer dans les montagnes voisines du Royaume de Maduré: Mais l'Intrus se voyant peu à peu abandonné de vingt Eglises, & qu'il n'y en a plus que cinq ou six qui le reconoissent, a traicté auec les Hollandois, pour se maintenir dans son vsurpation, & ils luy ont promis de luy amener au plustost vn Euesque Schismatique de Babylone pour le fortifier du nom du Patriarche d'Alexandrie, contre l'authorité du Pape. Ce sont là des entreprises, & des attentats ordinaires de l'heresse contre le Chef vniuersel de l'Eglise.

l'adiouste de la même Relation, à ce qui a esté raconté du corps merueilleux de saince François Xauier, deux choses memorables: l'vne est que ce Pere qui asseure l'auoir obserué auec toute la diligence possible, a remarqué que la plus saine partie de ce sainct corps, sont les pieds: car le dessus garde encore son teint naturel, & l'on distingue mesme le sang dans les veines. Ainsi le traict du Prophete se verisse pleinement en luy. Quam pulchri sunt pedes annunciantis, or pradicantis pacem, annunciantis bonum, pradicantis salutem! Combien sont beaux les pieds de celuy qui annonce, & presche la paix, qui annonce le bien, qui préche le salut!

Pour ses entrailles, & ses autres parties nobles interieures, l'on en a fait vne masse, de laquelle on distribuë des Reliques que Dieu honore dans toutes les parties de l'Vniuers, où elles sont dispersées, de fa-

ueurs singulieres.

L'autre est, que quand on luy couppa le bras, qui a esté transporté en Europe, selon qu'il a esté narré, l'Eglise où estoit ce sacré dépost, & dont cét Apostre des Indes auoit de son viuant ietté les sondements, trembla sensiblement, & s'ouurit par la moitié en long, depuis la voute iusqu'au pied de la muraille. Les Peres pour obuier à sa ruine totale, qu'il y auoit sujet

d'apprehender, firent dresser au dehors des arceaux pour la soûtenir, & au dedans mettre des barres de ser, qui trauersent & passent dans les murailles, afin de les tenir dans vne liaison & assette plus serme. L'vn & l'autre se voit encore auiourd'huy, & même paroissent quelques tra-

ces de la fente qui se sit alors.

Finissons par la Chine. Ce Pere consirme cette Procession magnifique du tressainct Sacrement, qui auec l'agréement de l'Empereur Tartare, s'est faite dans Pekin, Capitale de cét Empire: mais ie ne puis oublier quelques circonstances de cette action, si éclatante, & si glorieuse à l'honneur de nostre Seigneur, dont le recit augmentera la consolation que les bonnes Ames en receuront. L'vne est que six des principaux Mandarins, personnes comme l'on sçait, les plus qualifiées dans ce pays, portoient le Dais, qui estoit tresriche. L'autre que les Dames Chinoises & Tartares, qui selon l'vsage de ces contrées, ne paroissent point aux ceremonies publiques, enuoyerent quantité de parfums exquis pour honorer la presence de Nostre Seigneur, comme substituant à leurs places, ces illustres marques de leur pieté. Enfin les Payens mémes furent notablement touchez du spectacle de cette

solemnité si auguste.

Parmy les succés si aduantageux dont il a pleu à Dieu fauoriser les trauaux de nos Missionaires, il y a voulu méler vn peu de sa croix, & destremper la douceur de leurs ioyes de quelques gouttes de son fiel. Il me suffira de raconter la chose auec toute la brieueté possible, sans nommer, ny même indiquer les Autheurs de cette persecution, qui n'a pas esté petite, puisque l'éclat a passé cette grande estenduë de mers & de terres pour venir iusques à Rome, & dans Paris. Ie ne diray pas pour nous blesser, car aucun n'est blessé que par soy-mesme, dit l'incomparable S. Chrysostome; mais pour nous réueiller, & au plus pour nous estonner de son bruit, comme en effet il est estrange & surprenant. Certains Missionaires entendans les couersions qui se faisoient dans la Chine auec toutes les bonnes volontez que le nouueau Roy témoignoit à nos Peres, se rendirent dans ce Royaume, de quelques lieux voisins où ils estoient oisifs, ou peu occupez, mon-

strant au dehors qu'ils y venoient portez d'vn bon zele pour trauailler auec eux à cette moisson si abondante. Ils y furent accueillis auec toute sorte de bien-veillance, & on les laissa même se saisir, & posseder des Eglises que nos Peres auoient fondeés & establies, parce qu'estant si peu d'Ouuriers dans ces contrées tant spacieuses, 10an. 3. ils ne pouvoient secourir eux seuls tous les Epist. nouueaux Chrestiens, outre qu'ils ne souhaittoient rien plus que d'auoir Cooperatores veritatis, comme parle sainct Ican, des Cooperateurs à la Predication de la verité de l'Euangile, lesquels de concert, & auec l'vnion d'vne charité parfaite, trauaillassent au bien de ces peuples.

Mais comme l'effet l'a monstré, quel- 10. ques-vns de ces Ouuriers nouueaux venus estant du nombre de ceux, dont parle l'Apostre, Emulationem Dei habent, sed non secundum scientiam, ont vsé d'vn zele à la verité assez ardent: mais qui n'estoit pas selon la science, ny conduite auec la prudence, qui est necessaire parmy cette Nation, où les esprits sont merueilleusement delicats, & capables de se rebuter

des meilleures choses, si elles ne leur song

proposées auec toute l'adresse, & toute la discretion que la charité requiest en

telles occasions.

1. Thef-

[al. 2.

Ainsi sain& Paul tout brussant de zele, qu'il estoit, escrit qu'il ne donnoit que du lai& à boire, & non pas vne solide viande à cause que les Payens Grecs, dont il menageoit la conuersion, estoient des esprits de même humeur, faciles à s'aliener de nos Mysteres, s'ils n'eussent esté maniez auec vne condescendance, & vne patience de nourrice, & de mere, comme le dit ailleurs le mesme Sain&.

Comme donc ces Missionaires furent chassez à cause de leur zele peu discret, de quelques lieux d'vne seule Prouince de la Chine où ils estoient entrez, & se forgeant que nos Peres y auoiét cooperé, bien qu'au contraire ils les eussent protegez, & assistez en tout, vn de ces exilez a esté piqué d'vne si violente passion contre nous, qu'elle l'a porté à venir du fond de l'Orient iusqu'à Rome, pour nous accuser à sa

Saincteté d'estre des Achristes, homines sine Christo, selon le stile de S. Paul, hommes sans Iesus-Christ, ou pour mieux, dire ses ennemis, & d'entretenir dans ce aux Indes Orientales. 235 Royaume l'Idolatrie au lieu de la destruire.

Quelle calomnie plus maligne & moins probable, que des Religieux quittent leurs pays auec tout ce qu'ils pouuoient auoir de plus cher, trauersent les mers, & les Contrées barbares au trauers de tant de hazards pour précher l'Idolatrie, dont dés le berceau ils ont de l'horreur, n'ayant à l'opposite que de l'honneur, & de l'amour pour Iesus-Christ, qu'ils ont succé dés la mammelle, & qui par le long vsage de leur profession, se sont comme naturalisez dans leurs cœurs. Ceux qui debitent de telles calomnies, soient au moins touchez de l'interest de leur reputation: car auprés des gens d'honneur & de sens, venir à ces medisances, ce n'est que faire valoir la passion, ou la malice, ou peut-estre l'vn & l'autre au dépens du jugement.

Mais pour acheuer ce narré sans m'arrester à vne plus longue resutation qu'vne
accusation si ridicule ne merite pas, il sap. 10.
pleust à la diuine sagesse de faire découurir
le mensonge de celuy qui pretendoit noircir nostre Compagnie d'vn crime tant
attroce. Mendaces oftendit, qui maculaue-

236 Relation des Missions

runt illum, dit le sainct Esprit, qui permet que les gens de bien soient quelque fois chargez de calomnies, mais non pas accablez.

Aussi il disposa qu'au méme temps que cét accusateur iettoit son venin contre nous, le Pere Martin Martini se rencontra à Rome, tout fraîchement venu de la Chineoù il auoit longues années trauaillé dans nos Missions. La verité donc triomphant du mensonge par sa bouche, le Souuerain Pontife pleinement satisfait de la conduite sage, & charitable de nos Missionaires, sit expedier en leur faueur des Bullestres-amples, où l'innocence de leur vie, & leur integrité au ministère de. la Predication, sont dignement attestées. Le Pere Martini les a portées à la Chine afin qu'elles leur seruent comme d'vn bouclier qui les couure, & les garantisse des traicts de telles langues enuenimées, & le Pere François Clement asseure les auoir veuës & leuës, & méme en auoir enuoyé quelques coppies en Europe.

le finis en supliant le Lecteur de ne se point scandalizer s'il entend que l'enuie & la ialousse se fourrent quelque fois par-

Philip.

my les fonctios de la vie Apostolique, où la seule charité deuroit fleurir & regner entierement. Sainct Paul dés la naissance de l'Eglise témoigne auec des expressions assez sensibles, combien violemment il auoit esté attaqué de cette persecution où il prenoit cette resolution qu'en toute maniere que ce fust, soit par enuie, ou par vn vray zele que Iesus-Christ fust préché: Et in hoc gaudeo, sed & gaudebo, ie m'en réiouis, disoit-il, & de plus ie m'en reiouiray, c'est le sentiment de nos Missio-Ioan. 3. naires, dont les ioyes croistront à mesure que l'honneur de Iesus-Christ, leur bon Maistre, croistra par quelque voye que ce soit. Illum oportet crescere, nos autem minui, disent-ils aprés le fidele Precurseur: il Rom. 9. faut qu'il croisse en honneur parmy les homes, aux dépens de nos corps, de nos ames, de nos vies, de nostre honeur, & s'il se pouuoit de nostre propre salut; selon quel' Apostre souhaittoit d'estre anatheme, & separé de Iesus-Christ pour ses freres.

Mais ils possederont l'objet de leurs vœux, & le comble de leurs desirs, s'ils voyent plusieurs braues Missionaires de quelque profession qu'ils soient, animez

d'vn bon zele, leur prester leurs mains, & leurs insignes talens, comme sainct François Xauier inuitoit par ses lettres des Vniuersitez d'Europe, tant d'excellents hommes qu'il y auoit connus, afin de luy tenir compagnie, & d'employer tant de belles sciences, dont ils estoient doüez, aux trauaux de la conuersion des Indiens, & à la plus grande gloire de Ies vs-Christ.

## FIN.

## Permission du R. P. Prouincial.

I E lacques Renault, Prouincial de la Compagnie de I Es vs, en la Prouince de France; suiuant le Priuilege qui nous a esté octroyé par les Roys Tres-Chrestiens, Henry III. Henry IV. Louys XIII. & Louys XIV. à present Regnant, permets à Iean Henault, Marchand Libraire à Paris, d'imprimer ou faire imprimer, par tel Imprimeur que bon luy semblera, vn Liure intitulé, Relation des Missions des Peres de la Compagnie de I ESVS, dans les Indes orientales, &c. dressée par vn Pere de la Compagnie de I es v s, & approuuée par trois Religieux de la mesme Compagnie. En foy dequoy i'ay signé la presente Attestation. A Paris, le 21. Iuillet 1659.

IACQUES RENAVLT.

## Extraict du Privilege du Roy.

Par grace & Privilege du Roy, don-né à Paris, le 28. iour de Mars 1659. Signé Fillacier. Il est permis à I e a N HENAVLT Marchand Libraire à Paris, d'imprimer ou faire imprimer, vendre & debiter vn Liure intitule, Relation des Missions des Peres de la Compagnie de IESVS, dans les Indes Orientales, &c. dressée par vn Pere de la mesme Compagnie, pour le temps & espace de cinq ans consecutifs: Auec defenses à tous Libraires & Imprimeurs, d'imprimer ou faire imprimer, vendre & debiter ledit Liure sans le consentement dudit HENAVLT, à peine de cinq cens liures d'amende, & de confiscation des Exemplaires; comme il est plus au long porté audit Priuilege.

Acheué d'imprimer pour la premiere fois le 6. Aoust 1659.

Les Exemplaires ont esté fournis.





EXL 1455.









